

# Ejautene Loka Etunganan Loitekooro

Jeffersonville, Indiana, U.S.A.

62-1014M

1 Eyalama, Onac Neville. Kisirereng Ejakai ijo.

Erai naejok abongun bobo okanisa atupuruc na. Atupuruc naka aibuses "najokan," neijaas yesi kere. Ido amuno eong ebe ebuni na araut apaaran naejok kanuwok kere. Kakonyen nuka Ejakaitiwok. Ido kwana kijaar eong asisia atupuruc na. Akoto eong arasakin alomar toma aisia na, naarai erai e...amuno eong ebe epol ajokis. Ido erai e...Kasodi aidar esipan kinyekik aita kadikin, ijani ijo, aiboi adaun aojau, luipu ebwoiete. Abuni eong alosit arasakin alomar toma aisia.

2 Ido kwana, atibong na akoto eong einer kotoma akou naka akirot naka Ekengarenikinan Loka Aijaraka. Ido amuno ebe luipu luepedorete, luepedorete kere, epote ajaun kotoma apak kangin, kanuka atibong kana. Ejaas ngun da, arai ejai ijo ekanisakon, isio...ebe, ikoto isio ajaun o-okanisakon. Erai ngol epelukon ajaun ngina, neejai aiboisitikon naka aswam, kanu ainakin aicakon aica.

Kwana, inyikokinit oni amuno ebe, kangin pak naibongunio ijo ijaun kede agoola adio naiyatakina kane. Konye ejai isio ationis kede ngin, oo, nginiboisit kere. Atukos ngin naka lumonon adulokinos kesi toma nginibore. Ido ijukarete kesi neejai aiboisit adiopet, ocamunete ngul kosodete kesi aijukar aiboisit ace ido kongerokiniete ngul ngin. Kosodete ainyakun, ecamunito kesi kane, ka kau. Oo, ikoni bo lolo ai apak nakijaunor isio! Konye, ijani ijo, erai duc Satan nges loitijie iboro luedolito. Kiitu ebe iyapikinit duc ijo...

3 Ajai eong aingitanakin neijai ijo, Anthony. Etei eong ebe abu ijo iriamunos kede papakon. Ido akaulo naka eong angoliar ngina, toma osipan. Abala ngesi ebe iboie ijo kangina. Iyalama isio ajaun kede ijo ne ka papakon kasio, Onac Milano lo New York. Amuno ebe, ilosi akwapisinei nuka okinga lolo kana, adumuni eong aceporo, kokinga naka New York, kokinga kangina kanenice, arai kitojok Ejakait.

Ido kanuka ngun iyalama isio noi kanuka nginidiopet kayesi. Ejok noi yesi ajaut ne.

Ido kipou ajaunos kede apak naejok noi akuar natubor, arai abu ber eong ajaun kede. Abu eong ajaunos kede a...[Kotemari atukos ebe, "Amen."-Ekewa.] "Ido Isaia kotoma oyekalu." Ido kwangin ijo...

Ido atupuruc na, ikoto oni ainer kotoma akirot naka, arai aisianakin, atemas, arai ipedori oni, "Aiduk Eyekalu lokajaran; aiduk e-aiduk Eyekalu lokajaran loka aiboisit naiboio Edeke lokajaran, Etunganan loitekooro; Eyekalu lokajaran loka Edeke lokajaran, neiboio Ngesi." Ido arai...

4 Apupunit eong ebe ejaatar kesi ace kotoma owoere kana najokan kane. Mam eong adolokit apupu ngin. Ido atibong na, alosi eong aitam alosit kwap lailo. Elimonokinit eong akaberu nuikamunito Onac Ungren, acamaunit eong ebe arai ngol ekekior, lo kalaije kotoma-kotoma Tennessee. Kwana, ajai ngesi ne akuar naka bian. Mam eong aseseni nges atupuruc na, konye aomit eong ebe ejai ngesi ne nenice. Ido akoto eong apupun nges awoi atibong na, arai apedori eong, ebe, arai ekosio loenyaritai Kokwap Kotoma Aibusesike, araibo Eipone Lokiumokinar Ijo. Abuni eong aipudakin apupun ngul. Imwaasi ai ipudakin apupun Onac Ungren? [Kotemari atukos ebe, "Amen."-Ekewa.] Oo, aminakit eong-eong awoere nakajokan. Ido abala Meda ebe ejaatar ngol eipone loka eporoto loka ekiliokit, da, kwape kijenia oni kere. Ido ekosio loenyaritai Kokwap kotoma Aibusesike, arai Eipone Lokiumokinar Ijo. Acamunit eong ebe aanyu eong nges kwana, kalaije...Biai ngin ebuni ajokunar, Onac Ungren, atibong na, arai ipedori ijo, arai kisalok ijo? Ijo ilosi asalakin, arai aitam asalakin kanuka aijaanakin naka akuar? Eebo, eong-eong...Eebo, mam... alimokini eong ijo, dobodo na, arai ...Mam eong akoto adupor idiotunganan adumun aridakinio. Konye kankiinyo mam, arai ti oni apedorete, kotoma apak naka Aipuceta Akanyaare, apak nailimonokinia oni ngun, arai ti ijo kopedori abunore. Abuni eong akotokin akamun ngol atepu, itei ijo, aikamun ngol, Eipone Lokiumokinar Ijo, kosodi, Kokwap Kotoma Aibusesike, da, kotoma apak kangin.

5 Oo, biai mam eumokina aijaanakin Ejakait? [Kotemari atukos ebe, "Amen."-Ekewa.] Mam eong ajeni nutikeswama eong korai mam eong arai Ekristayot!...?...Ejok noi araut Ikristayot. Apupi eong bala ti asomanar kuju ka kwap kosodi ailulukin, kede ekaporot kere. Araut Ikristayot, koomoom nuikamunitos ngin, aibubukin kere toma Kristo!

Ajeni eong ebe anyaraenenei eong ekior loka etunganan kalo erono ngolisawa. Erai arai S.T arai T.S., arai icebore kwape kangin. Sumner, Onac Sumner. Nges...Akoto eong aisialamikin nges ka akeberu naketiai. Aomit eong ebe abu koyangaik nges nepetai, asubit bala, nepetai ilapio ikanykape, kotoma aiwadikaun Aturio Akanyaare Nuka Ekanisa. Konye inyak oni ngol ne, edaunitai aiwadik, ekapakina kanu aitogogongoorio, ka aitolomikinio toma adoketait naka iitabon, Aturio Akanyaare Nuka Ekanisa. Inac Sumner, kaneijai ijo kere, abeit cut ibuni ijo ainakin isio aitac ijo kanuka ngun. Ngin, nayangaiki aswam naepol. Inyobo, eburo noi koipone kangol. Eyangaikini eong ilapio ikanykape kanu aisiom kiton angetakin ngol, kilema ber ijo nuka alemun ngol kotoma atepu, kasodi aibelokin kosodi alemar nuebongobongoto awai, kosodi abwaikin ngol toma otabo. Ibuni isio aisikapikin kasodete aijukar ngol kotunga katipet, naarai iomit isio ebe erai ibore yenebeit itunga itingata kwape kwana, ido ipedori ijo aisia ngol. Ido ajai Billy aitodianakin eong, nealomunia eong toma ngina, idakikan idis kau, ebe-ebe-ebe adaunit akapakin-akapakin kwana alosit neejas luijereite iitabon. Aso, inac, ebuni ekanisa aitac ijo kanuka ngun. Mam

eong amuno ijo aswam ngun titai. Ido-ido erai isio...Arai kidum isio etabo ido ejaun aitutub etiai loka ngol, arai icebore, ibuni aibwaikin etiai loibunio ijo adumun idiobore nakegwelariata kesi ngol kere, kaneejai kere. Kinerakinos do ijo kede atukos, atukos naka lumunon, arai ice kotoma kakesi kangina, ido epote kesi aitemokin ngun kanukon. Kisirereng Edeke ijo ejok noi.

6 Onac lomojong ka Inac Kidd iboiete kangina, kwap mot kwap naka akwatat, motimot. Ido abu eong eriamunos kede nges ipak edit, ido abala ngesi ebe, "Eebo, epedori aticepak na korai apak nakawasia eong aanyun ijo, Onac Billy." Ebalala ebe, "Ajai eong amojong noi."

Abu eong atema ebe, "Oo, ikatunga! Mam eong akoto aipup ijo inera ngun. Iraas yesi kwape bala toto kede papa lumojong." Imina isio Onac ka Inac Kidd. Isio, nginidiopet, imina yes. Ido erai bon...

Iswamaikini eong icebore neangoliara eong kesi elomunete okanisa, ido koraas iarei luedukokina koipone kangol. Ido koomoom ber ijo, alimonokinete kesi Eijiri eroko eong keuruunia. Ido arai eong etunganan loamojongit. Eebo, koomoom ber ber ijo, alimonokinete kesi koroko eong keuruunia. Ido eong lo ne kwana, amina eong adolonokin aomoom ebe ajai eong amojong. Ayapikinit eong nepetai apalaun. Aseseni eong Onac ka Inac Kidd elomunete toma, "Aibuses kojai neejai Edeke! Aleluia!" Abala eong ebe, "Mam, apupi eong ejok." Eebo, ipa. Aanyun kes, eipone loepedoritotor kesi, eipone lokisinyikokinatar kesi ijo!

Akepolou imisiikini ijo ebe, nepetai aturika, bobo, ido oroko elosete oisawa. Abunore ne atupuruc na kosodete ailip iitabon, arai tikopedorete kesi ayangar iitabon kosodete agwelar. Akotosi ateepon, kokar nepetai akwatat lukapolou. Kwana aibodo ejaas akoni "abebenoka aarei" nuinera oni nukec akuar kaya? Eebo, ageuni eong aomoon nuikamunito, "Aibo ejai naka?" Nealimuna ngesi ngun-ngun bian. Ikonikar imwaas ai, Inac Kidd? [Ebalala Inac Kidd ebe, "Arai ikar akaisakanykauni ka idiopet."-Ekewa.] Akaisakanykauni ka ludiopet. Irai ijo lokapolou anyoin, Onac Tom? [Kotemari Onac Kidd ebe, akaisakanykauni ka luaarei."] Akaisakanykauni ka ludiopet kede akaisakanykauni ka luaarei lukapolou, ido oroko itwasamaete abebenokakec, kotoma aswamisioit, eroko elosete.

7 Idiobore kere yeneroniar ko Ohio, Inac ngin Kidd ejeni nuikamunito ngun, koruuni esimu kuju ore. Kapaaran kaya, abu ngesi inom, ido ajai imukeru yenididi, imukeru yenipese, acamunit eong ebe arai, auruunitai, ido kojaas amooteka kingake. [Kotemari Inac Kidd ebe, "Esao loka ekulam."-Ekewa.] Esao loka ekulam, kokinga naka imukeru. Ido mam emuron ajeni nuabeit aswam kanuikamunitos ngin, ido akurianikit ngol aijeng. Apotu isio elipata. ["Abu ojengai, Onac Branham, kosodi ainyakakin ngin, naarai, abalas kesi ebe, 'mam abuni aijar.' Ido apotu kesi kinyakakisi amooteke toma."] Abu inyakak amooteka toma, kede ajengio, ido koomitos ebe mam apedori aijar. Ido abu ojar. ["Amamei erot."] Amamei erot kapak kangin kanuka-kanuka e...anyoun kaneejai oisao loka inyammat, kanuka inyammat aitor toma. Kosodi Inac Kidd ainomun bobo. Apotu isio elipata bobo, ido kwana ejaatar erot lokajokan. Ido ejai kwana ne, kwape ajenan; emuron, da. Ianyu? Erai ekajenan ebe erai Ejakait Yesu, Ekasuban lokapolon! Koany nuabu Satan kotamite aswam? Atubor aijar naka imukeru kangin awai, kosodi do, koany, acamunit eong ebe abu aberu kobong neejai Ejakait. [Abu ngesi kobong neejai Ejakait cut kotogoka."] Abu kobong neejai Ejakait. Abu Inac Kidd kingarenik ngin abongun neejai Kristo, akaulo naka aumokinet ngin aswamaun kanuka ikemukeru.

8 Abu eong kadum esimu ko California, bian, ejaanakin kangina, loajai eong kede nealosio eong California nasodit, ikar kau. Aponi kourunai etataitike kede-kede aongon...ipiin iuni egolokina kotoma otauke. Kasodi eong alimokin nges nuka ejautene kangol. Abu eong atema ebe, "Edeke loapedori aswam nuce nu kosodi aitagaleun ngol ejok, epedori kaitebeikin aitagalaeun etataitikon." Kolimok bon ijo esapata atitingor.

Ido ajai esapat toma atukonokin neajaar eong California nasodit, nepetai ikar itomon ka lukanykauni kau kwana, ikar itomon ka lukanykape kau, nges adau. Ido ajai eong California. Ido arai nge-...Abu ariamun ngin isidik esapat ngol kiton...Neasdumuniata kesi imukeru, ido aurunitai, kosodete kesi aanyun ebe ajai ibore yenarono, arai yenibululu, ido aponi kotamai aisikakin ekwam tomake, kaceda. Ido mam asubit bala ebuni aijar, kosodete imurok apak ngin aanyanar, kosodete adumun ebe agolol ipiin iuni kotoma otauke. Amamei neapukoro cut, itei ijo, epii ediopet bon nges eyenga. Kosodi ngesi ainomakin papake esimu, kosodi atemar, "Papa, kinomaK Onac Branham esimu, katipet. Kolimok nges ngun kere..." Ilip Kristo. Ebuni Ngesi aswam ngun." Ikoni nen. Oo, ikatunga! Aisidikpoikinet ngin, nuebalas kesi, itei ijo, apotu enerata ngun akuar naka bian. Ibore yenibecokina kotoma apak naibecokina.

9 Eebo, ilot oni ngaren einer, mam do oni ipedori alomar toma aisisia da, biai mam? Esubit bala emina loecunonio okajo (molasses) kotoma atupuruc naelilim, idik noi kwape epedoria kere, ijani ijo, ido imkanakin kere nepepe. Iyalama oni noi ajaun kede eidicane koipone kangol. Eebo, ipa.

Aso kwana elilingikisi, kwana, kasodete alosit toma aisisia kwana. Ilosi aticepak...Mam eong ajeni arai ipedorete yesi aseseni ngin araibo mam, kotoma abao. Arai canat ebelok eong ngin kuju kwangin, kotoma apak naedit, inyobo, ibuni oni apedor, kwana, ice kotoma kayesi, da...[Kotemari Onac Edgar "Doc" Branham ebe, "Akoto aigirakinet kotomake?" Mam, mam eong aomit kwangin, kwape kwana, Doc. Arai

canat motimot.] Eebo, ibuni oni-ibuni oni aswam ngun neadumunia eong idis...Ejai aigirakinet ne? Eebo. Ebelokinos ber oni neejai ngin. Isesenete yesi kokau kangina? Yesi ipedoritos asesen? Arai ipedoritos yesi asesen, ikeutu akusikanin kaju. Arai ipedoritos yesi asesen abao ngin kosiomata akiro ngun nuejaas nen. Mam. Eebo. Kolemutu agirakinet. Kwana, kwape kejakare aitemokin ngun...

10 Eyapit eong ageun atupuruc na; arai, mam, mam, nepetai alingakinit eong idakikan atomon ka lukany eroko. Ido kanuka ngun, do, ibuni oni alosit mot kwana, naarai mam oni ikoto aisuburikin. Kisuburik ijo imunaari ijo iboro luilosi ijo alimun. Kwana, ajai eong aipup ateepu, kapaaran kaya, kwape kalimokinit eong yes, ido apotu eong ileic kerumata; mere kanuajai eong alimun, konye eipone loajaar eong alimun katipet, erai eporoto loemaran. Apupi eong bala ti aidareun. Ngin...

11 Abu eong kaany kapaaran kaya neabeit adukokin aiboisit naati naidarere itiang, kane kakidingos naka Louisville. Kosodi ejakait Brown, acamunit eong ebe arai, kalaije, ainakin idolai emilionit kanuka aiboisit naidarere itiang. Eebo, korai ti eong ajaatar ngul, ti eong nepetai ainak kes ngul kanuka alacanakan itiang ngul. Mam eong eyuunit aigalunit idiobore kiopone kangol. Eong...alosit eong aiboisit naidarere itiang kasodi aanyun itiang ngul lukican, eseseu lokapolon, ka ingatunyo, ka iboro, elosite ngaren ka kau, eyenitai angetakin aijar kere, itei ijo. Einakini ijo aipup erono. Ejaas ngun da, ikamunonio kes kede acoa naka etunganan lokacoa adepar kes kosodete aibwaikin kes toma obulesene.

Ido aoomooi eong nuikamunito: ajokit iswamai ngun. Elemuni ngesi itunga luketiai luebeit arim aiboisio nukapolok nuka Edeke, ka oisawen, ka iboro kwape kangul, kosodi aibwaikiin nges toma ajeera loka ediini, arai etalece, arai icebore, kosodi aiyenikin nges tom angina. Ido etonio bo lolo ibore ngin biai.

Ido mam ong amina aiboisit naidarere itiang. Apupi eong icebore bala kwape itiang kangul, nakigolokinitere yes kere ido kotamitos alacakin, ijeni ijo, alomun konga kosodi aitam aswam icebore.

12 Kwana, eroko oni edolokina Akirot, adolokisi ber Elope Akirot, kwape kitulurwo awokokwes kwap kototoma ailip.

Papakosi lokasianut lokotoma Akuj, kitukokina isio atupuruc na Kokiror loka Ejakait Yesu Okokukon loketiai loka Edeke enapit akuan, abu koby toma akwap, kanuka alucio naka akosidiakanareta, kosodi atwanare, Ekedoliton, tetere isio kanuka Adoliteke, kwape kiraar lumam idolit, kitaraunio luidolit KotomaKe. Kibunit kalimoritos ebe mam isio ibunsakinit, Ejakait. Emamei ibore yenejok yenikamunit isio. Ido ijai isio kere togo ediopet looti loka aenio. Mamace esooda loibwoi isio kotoma, iroko isio ijai ojeera. Mam idiopet apedori aingarakin yenice. Konye, Edeke, kotoma aitimike naemai esange, abunore kwap kosodi angaar ikekia luka ejeera, kanu alacakin isio. Mam bobo isio igoloro kwana. Mam isio ijai toma aidaris naka itiang naka akwap, konye kwana ilacakina isio. Ijai isio kinga.

13 Oo, eipone lokiminar isio Nges ido ainakinitos Nges aibuses! Eipone lokipedoritor isio alosit kotoma amanikoria lukapolok luka aisumuneteKe, kasodete asesen kes kitodiario kakonyenekosi! Ido kede akosikonye obe, asesen Edeke lokapolon loka Aijar Namam Edaun, epukor Elopit kakonyenekosi, kosodi araun ibore ilopet, kwape abu Ngesi kiswamaikinia inabin lukolo. Kajenete na, ebe iyengete ngul kede aitogogonget, ebe apak adiopet kinyakinio bobo isio, kengetakina aijar na, kotoma ajarun, kiton Aijar Namam Edaun Namam emunaar. Mam awatekosi epote amojong. Ido mam isio kiyari etengei. Ido mam isio ejaun ekadakada. Konye kibuni alosit kotomaKe. Ikoto isio akiirar Nges ebala ebe, "Kolomutu yesi toma aiyalama naka Ejakait, nakitemonokitai kanukus eroko apetetait naka akwap." Kokau cut eroko adiakar elomunia toma, eipone loabu Nges kodaunitor aitemonokin, kwape Adam ka Keba, ebe mam kes abeit adekakin arai ajaun kede ationis. Ido kwana etemonoki Ngesi kanuwok, ido ajeni Ngesi sek ebe abeit oni abunore. Abu adiakar koyangau aigalisit, ido kwana alemar adiakar awai, kede Aokot nuka Yesu. Kwana, iyenikina oni kanuka akwap naka aisumunet, kanuka aisumunet naka Edeke, Namam Edaun.

14 Kisirerengioi isio kwana, Papa, kwape kisia Akirotokon. Ikoto isio ajenun eipone loka itunga luibusakinit isio araut, tetere ipedori ajaun Ngina. Kingarakinai isio lolo kotoma osomero kalo, tetere isio ijaun kede Ekesisianakinan Lokapolon kede isio, Emoyo Lokalaunan, loebuni kwap kosodi apukor mamakosi, kede Akekirot. Naarai kilipi isio ngin kokirorKe ido kanuka aibusesiKe. Amen.

15 Kwana, nasodit, akoto eong ijo apukor kede eong Petero Lokiareit, esula lo 1. Ido akoto eong aisiom atutubet naka Naikwadikaere kana, Petero Lokiareit, esula losodit. Ido kwana kanuka yesi lujjaatar ikalamunukus ka apapulai...

Ido eyuunit eong ebe aponi kalimokin eong atupuruc na ebe-ebe acepakio, aibelokin akakou awai kanen, itidisiari eporoto loka ateepu. Mam cut eong apeleikinit aswam ngun. Ido eyuunit eong ebe. Ecepakio, korai ti oni aoomoo adumun a-amaik (mike) naikami kokwam, kasodete aikajakin kaju naka esiling (ceiling) ne. Mam do bobo ti ace aiboisit najai ijo, edumuni ijo idolit. Ebuni araut ibore yenijok noi, kere airimor, amaik kaju naka esiling.

16 Ido kwana, kwape apak edit ajai eong einer; ido arai ipedori ijo, akaulo naka aijanakin, arai ikoto, arai ipedori ijo ainomakin epureemu lo loka akojo ne. Kasodi do eong aijerun ngol kane. Alemuni emina kasodi

aikajakin ngaren ne, arai ikotosi yesi aswam ngin acesawa. Kolomutu toma sek alingakin paaran lolo, tetere oni ipedori amisiikin.

17 Kwana ijai oni adolokin Aipuceta Akanyaare. Adaun oni napena Aturio Akanyaare nuka Ekanisa. Ido erai na Aisiraret kotoma aisisianakin, naimorikikit etunganan toma, loebait alakunio kede Aokot nuka Ejakait Yesu, ido elosi ajaun kotoma atur ngin naka Ekanisa, atur ngin naka Ekanisa Namam Edaun kangeset naka Aipiceta. Kwape kijenia oni ebe kijaar Arupepen Akanyaare, aitakaneta akanyaare, atanyia, kaceda, nuilomari oni toma, kwape kilosio ngaren. Konye kidarit oni aiboisit ace tetere itunga iboikinos.

Kwana, ido aomit eong ebe apedori na alomar toma aiboisit naomit eong. Mam eong aomit ainom epureemu loka akojo, konye apaaran kaya ajaas eong epaperoka ece loketiai, Coxes, kalaije ko Kentucky. Abu eong alot ngina, aomit eong alomar toma amej adiopet naka ikunyuko eroko apak agolokinio. Ido ajai eong laije amagoro kede opaperoka, Charlie, ebwoi kangina. Aomit eong bala abu eong erengia kes kere awai, neabu eong ageunia acelanar kotoma amagoro. Nu kes nuapotu kabunokisi eong, isap kede-kede Inac Nelie ka Magie, ido neabu eong alimokina yes ebe abeit eong alimokin yes Naesabiiti adolok eong ngin. Ngun kes apotu adolokisi eong, kotoma aisiraret nabeit eong alimonokin. Ido eipone loabu ngin kere kolomaria tomake! Ido, oo, aminakit eong ngin. Abu eong ajaunos kede emoyo obe loka acelanar, kokuju kalaije kotoma amagoro.

18 Aso kwana, kasiomata kwana, Petero Lokasodit, arai...Petero Lokiareit, atemasi, esula losodit, atutubeteke.

*Simon Petero ebulesit ekiyakia da loka Yesu Kristo, mama ejaas ngul luadumutu aiyuun naketiai loepol naeriakasi kanakosi kotoma adolit naka Edekewok, Eketajaran da Yesu Kristo:*

Aminakit eong eipone loelimunitere ngin kanen, naarai akaisisianakin kere atupuruc na epesikinitai neejai aiyuun. Ianyu? Ber eong asiom ngin bobo. Kopupok ejok.

*Simon Petero ebulesit ekiyakia da loka Yesu Kristo, mama ejaas ngul luadumutu aiyuun naketiai loepol naeriakasi kanakosi kotoma adolit naka Edekewok...Eketajaran da Yesu Kristo:*

Koany, ebalan ngesi, ebe, "Adum eong aiyuun na, ajai eong alimokin na neejaas ngul luadumutu aiyuun bala ngin naketiai." Akoto eong...mam erai neejai akwap kokinga. Erai na neejai Ekanisa, itei ijo, ngul luejaas toma Kristo.

*Kiyatanakin asianut ka ainapakin mamakus toma ajenun Edeke ka (kotoma) Ejakaiiwok Yesu Krsito,*

*Kwape abu apedor naka edekeoneke koinak oni akiro...edekoneke kwanaainaki oni akiro kere nuka ajar ka nuka ayongit Edeke, kanuka ajenun ngol lokiyangauni oni kanuka aibusesuke ka ajokisiKe elopet loabu koyarau oni toma aibuses ka agogong.*

*Nakiinakinia oni aisumunetake nuepolok nuketiai loepol; tetere kotoma kangun (aisumuneta ngun) iraunete ikamorak luka einono loka Edeke, nuipotu kokuiata anyoun kotoma amudiaro naejai toma akwapin kanuka aingobel.*

19 Kwana kocamak ngin koloma toma noi kwana. Mam eong ajainalimonokin atupuruc na; ijai oni aisisianakin akirot na. "Einono loka Edeke." Ber bobo eong asiom ekokoro lokiwongonet bobo kwana, tetere mam ijo itwaniari ngin. "Nakiinakinia oni..."

*Nakiinakinia oni aisumunetake nuepolok nuketiai loepol; tetere kotoma kangun (aisumuneta ngun) iraunete ikamorak luka einono loka Edeke, nuipotu kokuiata anyoun kotoma amudiaro naejai toma akwapin kanuka aingobel.*

Itei ijo, "akwapin," iku oni ngun kwana. Ajai ngesi alimokin nu neejai Ekanisa. Ngun kes kijaar oni ne atupuruc na, erai kanu ajenun ebe anibo erot, inyobo ipuda Edeke. Emamei itunganan kotoma kane, yenemina Edeke, dimarai yenekoto-yenekoto araun noinoi kwape Kristo. Kwana epesikinitai kinga ne. Nginikristayot! Arai eong emojong. Kosesen ber ijo onac ka inac Kidd kane, eraas kesi aticepak luemojongito kakere kotoma togo. Konye korai ti eong aingit kes, "Inyobo eipud loka ikusitauon?" Ti eraun ebe "Ajaut die naka Edeke." Kisisiau ijo nuka Kristo, ejai icebore yenikamunit Nges yenerai yeneminat noi, ejaun ijo aitam alomar cut tomaKe.

20 Itimitos alimunet. Abu eong alimok akaberu, kane pac, nges...isio iarei kere ijai amojong, ido abu eong alimok nges, eong ebe, "Ijo imina eong kwape abu ijo kominar?"

Abu ngesi kotema ebe, "Cut kaitebeikin."

Abu eong atema ebe, "Ijeni ijo, amina eong ijo noi kiton neakotor eong aangar ijo ka ariun ijo tomaka, tetere oni ipedori araun, cut teni, idiopet."

Kwana, ngin, irwanaik ngin irwan imilionin akwatat, ido idumuni do ijo eipone loekotor ekeyuunan, loeminanaros kede Kristo, alomar tomaKe, naarai erai amina. Ido kane elosi Ngesi aitodikin oni eipone loeraar ebe, kotoma aisumuneta kanu, iraun oni ikamorak luka einono loka edekeone loka Kristo. Lu, akuan naetwani, eipone lokipedoria oni araun ikamorak.

21 Aticepak abuni eong alimun icebore. Apolou naeyuunitor eong...Abu icetunganan komisiik eong erono kere, kane pac. Kijaar eong ebalua loebunit kotoma atukos naka ijaanakinak, loabala ebe eyuunit eong ebe ajai..." Irai oni luidukokina kotoma omoyon. Ido ebe ibusakinit oni ajalakin itunga luidukosi kaoni arai mam oni idukokina kotoma omoyon kede kes, kanu adukokin ice yenidukokinor oni kotoma omoyo." Oo, ikatunga!

Abu eong atema ebe, "Mam eong ekamunitos akiro nuka aingal kwape kangin." Etepegit duc eong ngin. Mam eong eyuunit ngun. Mam cut teni. Eyuunit eong ebe einakini Edeke ipaup. Erai ngin nakabeit. Ido eroko etunganan edukokina, ekoto nges aoomoom ibore lu, aisia ngingin.

22 Abu atumunan kengit eong kapaaran kaya, ebalu, "Iomit ijo ebe apedori eong, ibusakinit adukokin, Onac Branham, kede apese mutan?"

Abu eong atema ebe, "Ioomoomoi ijo nukeng biai?"

Abu ngesi kotema ebe. "Oo, amina eong nges."

Abu eong atema ebe, "Eebo, arai mam ijo ilosi aijar komamei ngesi, ekoto do ijo adukokin kede nges. Konye arai ipedori ijo aijar komamei ngesi, ejok do ijo ainyekikin. Aso, konye arai elosi aiar ijo, abu eong atema ebe, ekoto-ekoto do ijo alosit ngaren kosodi adukokin ngin." Ido kwangin ibore yenatamit eong aitodolikin ngesi, nges na, ebe, arai imina ijo nges noi!

Kwana, kwape kwana, eroko ijo idukokina, nginibore kere ejok ido ibus. Konye akaulo naka ijo adukokin, kolomunete do ican ka aitemisio nuka aijar toma. Apak ngin nges ebeitor do ijo ajaut toma amina noi tetere imisiinikinos idiopet kayenice. Nakitakadikinor ijo kede nges, kitakadikina ngesi da kede ijo, oroko yesi kimisiikinitos idiopet kayenice.

23 Eipone ngol ejaar kede Kristo. Ianyu? Ebeit oni ajaut toma amin naepol noi kede Nges, kiton nekilipia oni icebore, kosodi Ngesi mam ainakin oni, komam ngin ijangari oni nepecepe da. Ianyu? Ianyu? Inyobo? Ido eipone ediopet bon lokipedoria ijo aswam ngun, nges araun ikamorak luka einono loka edekeoneke, akepolou imisiikini do ijo apolou naamam Nges abu koinakina ijo. "Ikamorak luka einono loka edekeoneke."

Ido koany, "Kwape kidaunia aiku amunaara naejai toma akwap kotoma aingobel." Aiku ngin! Koany ber ijo arai ingai ngol? Erai Ekanisa, ngul luejaas toma Kristo, etopoloor kes adepar iboro lu. Mere ngesi elopet etopoloor bon, konye Kristo ekeuni nges kuju.

24 Neejaas inacanaka lurionok ka anacan luejaas ne atupuruc na, mam eong apeleikinit na kotoma aimusung idio. Konye, abu eong ajai toma airiamun apak kau, mam eong ajeni arai alimunitor eong ngin kotoma okanisa. Alimunun eong ngin irwanapu. Ajai inac nairionon nabala ebe, "Eong apedori ajaun kede ajenanut, arai aitejenun?"

"Abeit cut, inac, kolot ngaren."

Abala ngesi ebe, "Akoto eong ainakin ajenanut na kanuka aibuses naka Edeke." Abala ngesi ebe, "Ijeni ijo, mam eong-eong arai nuibusakinit eong araut," kosodi ngesi atemar, "mam eong-eong arai nuakoto eong araut, konye," abala ngesi ebe, "ibore idiopet bon yenajeni eong ejok, mam eong arai nuabu kolo eong arai."

25 Ianyu? Abunit ngesi kanenice. Aponi ikeunitete nges.

Eipone ngol nges ijenunia oni ebe kitubun oni anyoun kotoma atwanare kiton Aijar. Kingolia oni kau aipany nakiwadunere oni kotoma. Ianyu? Mam oni irai nuikoto oni araut; mam oni kirai ber nuibusakinit oni araut da; konye ibore idiopet yeniyalar oni, mam onin kirai liukipou karaas. Edolit ngin. Ijai oni orot.

"Ido kwape kikuiata amudiario naka akwap." Akaulo naka aiku ngun, aingobel naka akwapin ka amudiario naka akwap, idepasi yesi ngun.

26 Kwana ngin-kwana ngin nges eipone loka itunganan yenikineratar Ngesi, itunganan yenadau aiku iboro lu, itei ijo, amudiario naka akwap.

*Ido kauka ngupe kangun da kodunyakisi noi ayatakin ajokis toma aiyuunikus, kotoma ajokisikus da ajenun;*

*Kotoma ajenun da aitikokina, kotoma aitikokina da atitingikin, kotoma atitingikin da ayongit Edeke,*

*Kotoma ayongit Edeke da amin naka einacane, kotoma amin naka einacane da amin.*

27 Kwana emaraki Ngesi oni kane nuebeit aswam, aijen eipone loka aswam ngin. Kwana, kwape alimunitor eong, itamit oni kere abunore die naka Edeke. Ngin nges apolou ainakini eong asekuensi Aisiraret na atupuruc na, kanuka ekanisa, kwape kajenia ebe ebeit etunga alosit. Kanuka akuar natubor, abu eong atema ebe, "Imwaas bo ai ejaas ne, luelomunito kokinga naka eibuga?" Nepetai akaisakanyaongon ka lukanyauni kotoma kanginikwatat luka itunga, kes elomunito kokinga naka eibuga. "Imwaas bo ai ejaas ne eponitos amairon akwatat?" Inyobo, abu ilamar, aomit eong, akaisakanyauni kotoma kanginikwatat. "Imwaas bo ai eponitos amairon akwatakany?" Ido aapikin a-atutubet nakiuniet naka itunga luejaas ne eponito adepar amairon akwatat, amairon akwatakany awai. Koomoom ngun, nuka itunga alosit. Eebo, mam itunga ngul epote okanisa kanuka bon aanyunio. Emamei ...kwape ibore yenepedori akwap nakokinga aanyun adiobuses kotoma aiboisit kana. Eraas kesi kere itunga luka nginiduc, icanasi, konapetos inapen lutai. Emameete ikososio lukapolok kama ejaas ice luituputoorio araut ekwaya loka Imalaikan, abilo, ka idirisan ice luka alabiroi. Itionikit yes adumun aiboisit kotoma abao kosodete aibwo airimor arwatat. Mam kes eponenete kanuka ibore kwape kangin. Konye epote kesi naarai ejai icebore tomakec yeneseseni aibuses namam akongu naka akuan itei. Erai akongu nakomoyo nges aanyuni aibuses naka Kristo. Ngun kes eponiata kesi.

28 Aso, adaun apaarasia eroko oni kijaunia kede aijaanakin, elipenenei eong kainyikokinit. Alosit amagoro, alemun eisaoka...Alimokin aberu ebe, "Alosi eong kinga amej ikunyuko atipuruc na." Kasodi eong aibwaikin ekalamu kede eitabo loka apapulai toma oisaoka. Katipet napekecauni ejok kanu asesen, eboikin eong kuju okitoi nenice, akiar akanin kuju toma apak, ido kabala ebe, "Ejakait, keswama anyoika lolo? Inyobo kiinakini Ijo eong kanuka idwe?"

Ido neatiroria eong icebore yenesubit bala enoki, ebuni icebore koipone kalo. Nakeaapunia aibusesike, ageuni eong aipup icebore bala kaneelwana, icebore koipone kalo. "Iarei irwanaarei kes iwongol. Iarei iranaarei kes iwongon." [Kolimuni Onac Branham nginibongokinet katipet-Ekewa.] Ngaren, ngaren, ngaren, koipone kangol. Erai AjakutuKe ejai alomun toma.

Koinakin, ido akaulo naka apak naedit onyuni ijo kama ejai akonikuan. Kobuni aitapoet, "Kolot aiboisit mutan, ka ibore yenikoni ne." Ianyu? Egeuni, anyoun kotoma aomoom aomisiokon nuka Edeke, kinga kotoma akwap, awai kotoma akwap, kokinga kotoma amodingot nekijai ijo elopet.

29 Kosodi ageun abunore, "Idiopet, idiopet..." Abala eong ebe, enaaba edio, arai idiobore, egeuni icebore motimot, ka anonok alomun toma. Kosodi do abunore katipet, kaisuburikit. Iboie ijo kanen kosodi akeun akonikanin kuju, mam ilimuni akirot, aikeet akaninikon kuju bon toma apak. Ibore yenisodit yenijeni ijo, ekonijautene kere ikamar. Kosodi do ijo asesen iboro luekoto Ngesi ijo ajenun, aitodianakinn ijo iboo luepote.

Acepaarasia edolokini toma adoketait, kiton adoketait ece, kobwouni na. Mam elomari toma aitapoet. Kosodete Nuiwadikaere abukun nepepe. [Odoaari Onac Branham ikebokor irwanauni-Ekewa.] Alemuni eong ekalaamuka, tetere mam imurwokini eong, kasodi aiwadik ngin, aiwadik ngin apapula.

Kasodi eong abunore ore kasodi airere ngin, kasodi aisia ngin. Ido acepakio mam eong ber aanyun akejokis da neajaar eong airere. Kosodi do, akaulo naka apak naedit, kobuni! Kotirori ngin, kosodi anyoun awai bobo. Kasodi alemuni eong eitabo koipone kalo, kasodi ageun ainom, kagogogng kere kwape kapedoria, nuelimokini Ngesi eong. Aomit eong ebe, "Ejakait, alosi eong okanisa kasodi alimokin kes. Eong... 'Kobua.' Kijaar eong icebore kanukec." Eebo, eipone ngol nges abunio. Kwangin cut bec. Kiton, nasodit, Nges ainakin eong, mam eong apedori akorar ngin.

Aso, do, kotoma aputosia kanu nuisesenete yesi eong angolianari. Kosodi na, nasodit, abu eong ageu, mam eong abu adum atutubet na kane kiton nepetai bala apaaran arai aarei kau, kalaije kotoma amagoro.

30 Kwana, eraas itunga...Enera Petero, kane, eipone loibusakinitor oni araut ikamorak luka einono loka edekeoneke. Kwana, nginidiopet kotoma kaoni etamit apoloor toma ojautena loka Edeke.

Kwana, akaulo nakingetakina oni Aipuceta Akanyaareni nu, kosodi do, kotoma apak kangin naka akutakinio naka Aipucet Naikanyetekaareni, arai apukorio...Naarai, ijeni oni nuerai aipucet, apukor aijaanakin, apukor Aipuceta Akanyaareni. Ido ibuni oni aanyun ngun cut kotoma apapula. Ejai apukor Aisiraret, icebore yenipucakinitai.

31 Akuar natubor naka Naesabiiti, abu eong alimonok nuikamunitos, "Elacet." Ido elacet nges aiyuun. Aiyuun nges itingit elacet, ido elacet nges Naiwadikaere. Ido Kristo nges Ekek. Ianyu? Aso elemuni aiyuun ipeetai luka Naiwadikaere kosodi angaun abuses ka ajokis naka Edeke, kotoma otungaKe. Ianyu? Aso, erai kwangin, aiyuun nges itingit elacet loengaari Kristo neejaas itunga; engaari, epukori.

Aso, lolo, ilosi oni aitam alemun elacet ngopengol, kanu angaunia eipone loka araun Ikristayon lukajokak kotoma ojautene loka Edeke, ebe, kasodete araun Eyekalu lokajaran kanu Edeke lokajaran aiboi

kotoma.

Kiitu, epukor Edeke kotoma owaitin iuni. Irwan nasodit, abu Edeke kopukor kotoma Opir loka Akim, anyaritari ngin ebe araun Papa. Kosodi Edeke ngopengol, aitoliar kotoma Yesu Kristo, neabu Ngesi kodukunio akuan, abu kiswamau akuan na. Iunikini, kotoma atwanare naka akuan, abu Ngesi kitalau Ekanisa loepedori Ngesi aiboi kotoma. Arai Edeke kokujuwok; Edeke kaoni; Edeke kotomawok; Edeke ediopet ngopengol.

32 Ngin nges apolou nanyaraere ebe Papa, Okoku, Emoyo Lokalaunan. Mere idekesio iuni; iyapeesin iuni luka Edeke ediopet. Ti bon kes eomoomotos ngun kotoma Airiamun naka Nicea, timam oni kere igurwokina, ti cut? Edolit ngin. Mere idekesio iuni. Mam itunga apedorete amisiikin eipone lokeneriata Yesu kede Papa, ido Nges kede Papa eraas Ipe. Eebo, nen kes ejaas akiro kere. Abeit cut, epukori ngin. Kaitebeikin. Ianyu? Mam erai idekesio iuni. Iyapeesin iuni! Iuni...

Inyobo ngin? Edeke ijusun neejai esubeKe. Ekoto Edeke amaio. Akirot Edeke akepolou "ibore yenemaio." Ido erai Edeke etamit aridakin Iketunga, tetere Nges epedori adumun kamakec ngun nuabu Ngesi kiswamator kes. Mam Nges kiswamat ijo kanu araut idiobore kere kilama okoku ka akoku naka Edeke. Arai kitwaniarit ijo ngin, naka araut okoku ka akoku naka Edeke, itwania ijo aigerosit.

Ido "Atwaniar," akirot ebe a-d-i-a-k-i-a-r akepolou "atwaniar aigerosit," atwaniar aigerosit. Ido arai ijai eong ainom icebore, airupakin arasasit kotoma oyaadin akaisakany, kosodi ainom; alemun ekamuudu kasodi ainom, kasodi eong aibuc ngol, inches iwongon arai ikany, inyobo do eswamaun? Ekoto ekamuudu aitemonokinio. Ejai icebore yenerono. Ido arai katwania eong aiyuun neejai Edeke, arai katwania eong araut Ekristayot...Abu Edeke kibwaik ijo ne kanu araut Ikristayot. Arai kicetorio ijo kosiep ediopet, kobua kosodi adumun aitemokinio. Ido ejai ibore idiopet bon yenepedori aitemokin ijo, nges Naiwadikaere. Emoyo Lokalaunan kotoma Naiwadikaere, aitemokin ijo, ayangaun ijo cut toma aitebeikin neejai ibore bobo. Edolit ngin.

33 Kwana, ilosi oni aisia Akekirot. Abala Sitepan ebe, kotoma Aswamisio 7, ido bobo da kotoma... Kasiomata ber oni ngun. (Inera oni kwana, ijai oni einer nuka Eyekalu loka Edeke.) Kwana, abala Sitepan ebe...(Kwape, elosi araut Eyekalu lokajaran loka Edeke lokajaran.) Abala Sitepan ebe, kotoma Aswamisio esula lo 7, ido acamunit eong ebe...kotoma Aswamisio 7, ageun nepetai okokoron 44:

*Kejaas lukapapawok ewema loka aitejenunet kamoding, kwape kicorakinia lokineras ka Musa, aswam koriakas kaput nakeanyuni.*

*Apotu lukapapawok, kabeikinikec kitolomutu nges nepepe ka Yosua, nakebeata airumet naka atekerin, nuerengaer Edeke kakonyen nuka lukapapawok, kiton apaarasia nuka Daudi.*

*Lokedumuni asianut kakonyen nuka Edeke, kilip adumakin Edeke loka Yakob eyekalu.*

*Konye abu Solomon kodukok Nges etogo.*

*Kwabo Loejai Kuju kakuj mam iboie kotogoi luiswamao kakanin; kwape kinerar enabi ebe,*

*Akuj nges ekaicolong, akwap da nges iicolong yenika akakeje ebala Ejakait ebe, Etogo enyoin kidukokinete eong? Arai aibois anyoin naebworaria?*

34 Kwana kotoma...Kwana, "eyekalu," nges, aiboisit nailosi ijo aiyengun, kwana, adumun aisikwarunio, kaceda, kwape bala aiyengun kotoma ajo, arai kaceda. Kwana, Iburanian 10, ido ekokoro lo 5, eyangauni Paul nu toma.

*Naarai naalomunia Kristo toma akwapin abala ebe, "Mam ibu kokoto asubanit...(Kristo ngol)...asubanitka ainakinet, konye ibu kitemok akuan kanukang:*

Inyobo do Eyekalu kwana? Akaun, Edeke iboie kotoma akuan.

Ajai Edeke, kuju kakuj, neabunio Ngesi kwap komoru, arai da emong arai akiteng etiror emoru, ebusakinit nges aario. Erai Edeke lokalaunan.

Atibong naka bian, nakerapitotor Imalaikan ngul Ireetinikec. Iserapin lukalaunak kede Ireetin lukalaunak, mam ber ejenete nuerai adiakar da, ido ajai kes arapit Ireetinikec, kotoma Akonyen nuka Edeke; airap Ireetinikec, kotoma aiyapaara.

Kwana, mam Edeke lokapedor apeedori acamun adiakar, aso amamei ibore yenepedori atiror emoru loajai Edeke.

Kosodi Edeke araun akuan kiboiorori kakidingosiwok, kotoma ojautene loka Yesu Kristo, Okokuke, Ekesube. Kosodi Okoku ngol ainakin Akeijar, kosodete aicil icokat yenika Aokot nuka Edeke, tetere Aijar elomuni kinga naka Aokot, kiton newok.

Kotoma Aokot kangun nges kitalaunere oni. Ido kwana aokotowok, aijarawok, naalomuni kotoma omiel loka adoteu, nges etolomuni aijarawok toma akwap. Italeunete oni Aokot nuka Yesu Kristo, ijulakinete ejautenewok, koipone loka aijukakin oni Emoyo Lokalaunan; kosodete do oni alomun toma ojautene loka edekeone loka Edeke, araunos do oni aiboisit nakiboio Edeke.

35 Abala Yesu ebe, "Kotoma apak kangin ijenunete ebe ajai Eong toma Papa, ka Papa da tomaka; Eong tomakus, ka yesi da tomaka." Ianyu?

Ajenun eipone loejaar Edeke toma Okanisake. Ebeit ekanisa airumiar aiboisit naka Kristo, ainyikokin aijaanakiniKe. "Ngin yeniyuuni Eong, aswamisi nueswamai Eong iswamai ngesi da. Konye ipak edit, mam akwapin aanyunete Eong, konye yes ianyunete Eong, naarai ajaun Eong kayes, tomakus da, kiton awasia naka akwap." Ianyu? Ikoni nen, ainyikokin aswamuKe.

36 Kwana, enera Edeke, arai Ebaibuli kane, ngun. Abu Solomon kiner nuka aiduk eyekalu, "Ido mam Lokapolon kakere iboie kotoma otogoi luiswamao kakanin. "Naarai Akuj nges eicolongoKa ido akwap nges iicolong yenika akejeneKa. Ido aibo ejai aiboisit naka aiyenguniKa?" "Konye itemok Ijo Akaun kanukang," Amen, ikoni nen.

"Abu Ijo itemok akuan kanukang." Iboie Edeke kotoma ojautene loka etunganan, aitodiar Elopel mama ejai Etunganane ngol. Aima naitekooro! Edeke kotomawok, araut EyekaluKe, Edeke itodiar. Oo, eipone lotikipedoria oni aibo kotoma kangin kiton nepetai yesi atwakare kotoma kane, kanuka amwanis.

37 Koany, ebe, etodiar duc Edeke, kotoma apakio kere kotoma otunganan.

Arai ngol Edeke kotoma ka Musa. Kosesen ber ijo nges, eurunitai erai engarenon; Kristo. Kotoma apak nakeuriere nges ajai areo naka idwe, atamit adumun nges; kwape kwangin ajaar kotoma Kristo. Ido aponi nges-aponi nges kourunai kotoma apak kangin; Kristo da kwape kwangin. Arai ngesi loainakini ekisil; kwape kwangin Kristo da. Abu Musa kolot kuju, apaarasia akaisaongon, kosodi adumun ikisila, kosodi abunore kwap. Abu Kristo kolot toma amodingot, apaarasia akaisaongon, kosodi abongun, kobala ebe, "Kipupunitos nukec kotoma apakio nukolo ebe, 'Siridotei.'" Konye, Eong atemari yesi atiar, yeneseseni aberu kaingobel, adau aswam adoteu kangin." Ianyu? Iboro lu kere luegelele, ebe, Edeke itodiar.

38 Kosesen ber ijo Yosep, aurunitai kwape etelepata loemoyoikit kakidingos naka atukos naka inacan. Araas kesi kere itunga luajokuka, lukapapa ngul kere. Konye, neabunio Yosep, etegelikina ngesi. Apedori ngesi asesen aitapoeta, aijul arujasia, ido aponi ngesi kongarunai ikenacan kanuka ngun. Kanuka aswam naabu Edeke kibwaikite tomake aswam kotoma akwap, apotu ikenacan kongarutu nges kanuka ngun. Ianyu? Arai adodiaret naka emusalaba. Ido, koany aponi nges kogwelari nepetai atutubeta akaisauni nuka epuesa, ikenacan. Kocakakinai aipany, atwanare, ikenacan. Aponi kolemunai kotoma aipany, kosodi alosit aibokin akan nakoteten naka Parao. Ido amamei etunganan loapedori abunore neejai Parao, loayait akwap kapaarasia kangun, amamei yenabuni neejai Parao dimarai bon kitor neejai Yosep. Emamei itunganan yenebuni neejai Edeke, bon kotoma Kristo. Ido nakenyounia Yosep kore loka ekabaka, eroko nges enyounia, ajai arupepe aruikin, kosodete ikakerak akerit ngareneke, iworote, "Kokukokinos! Ebunit Yosep!" Mammace aiboisit najai ijo, arai ibore yenijai ijo aswam, arai apol aswamukon ameda bia; ajai ijo aibirokin kwap akunginikon kiton Yosep adolare ngina.

Ido nakeruikino Arupepe, adiopet kotoma apaarasia kanu, nginikung ekukokin ido ngingajep elimori. Neebunio Kristo, Yosepuwok, ajalakin Aibuses kosodi abunore, mam akoniswam ebuni araun nameda bobo. Nginikung ekukokin, kosodi alimor Nges araut Okoku loka Edeke. Edolit ngin.

39 Oo, eipone lokisesenia oni Nges kotoma Daudi! Eipone loabu Daudi ekabaka loengeritoi, kibiroi kotoma oicologoke obe, ikenacan, okokuke obe, kiboikin kuju Moru loka Iseitunin, kwape kalosio ngesi kuju Moru loka Iseitunin, abu kongolia kau laiye Yerusalem kosodi aimony; kanuka iketunga obe, ebe abu ngesi kijaanakite kes kosodi aisisianakin kes Edeke, kosodete iketunga obe aibelokin nges kosodete acakanakin nges iboro, aimuanakin nges aimul ka akenar nges, nakenyounia ngesi alosit orongat ido kongeritete nges. Oo, eipone loeriakatar kede nuka Okoku loka Edeke, ikar akwatakanykauni ekaulo; Ekabaka loengeritoi, kakidingos naka itungaKe Obe, kiboikin moru kosodi amonyakin Yerusalem, kwape Ekabaka loengeritoi.

Inyobo arai ngin? Edeke itodiar elopet kotoma onabin kangul, aitodiar Kristo.

Kosodi ediopet abunore loarai aitekooro naka Edeke. Arai Edeke kakidingosiwok.

Ido ageun kapak kangin, etodiar Ngesi kotoma Okanisake, kosiep lo loka Okalvari. Aso, itei ijo, itamit oni kere alomar neejai aiboisit na naiboiere, Eyekalu loka Edeke lokajaran.

40 Kwana ejaas icetunga...

Kianyuni oni kane, abala ngesi ebe, "Nasodit kijaar oni aiyuun, ajokis, aijenun, aitikokina, atitingikin, ajokis arai ayongin Edeke, ka amin naka einacane." Eebo. Amin naka einacane, kosodi aiyatakin amin. Ber



eong asiom nu, kere, bobo, tetere ijo ikamuni ejok kwana. Kwana ilosi oni ageun kokokoro lo 5.

*Konye kanuka ngupe kangun da kodunyakis noi aiyatakinn ajokit kotoma aiyuunikus, kotoma ajokisikus da ajenun;*

*Kotoma ajenun da aitikokina, kotoma aitikokina da atitingikin, kotoma atitingikin da ayongit Edeke;*

*Kotoma ayongit Edeke da amin naka einacane, kotoma amin naka einacane da amin.*

*...naarai arai kijaunos kangun kidilas, kituluorete yes lumam ilongwaka, lueraete araito kotoma ajenun cut Ejakaitiwok Yesu Kristo.*

Kwana, Petero imarakini oni icebore kane, ebe eipone loka adolore ngina.

41 Kwana akoto eong alimun na, ebe, ejaas icetunga luejaatar atutubet naka ajokis kana, ajenun, acoa, atitingikin, kaceda, lumam ber elimoritos araut Ikristayon. Kwana ijai bon oni...Ijai oni aisisianakin esomero loka Naesabiiti. Ido erai ngin abeit. Ejaas itunga ice luejaatar atutubet na, lumam mam ber ituputoorio araut Ikristayon da. Konye lumam...Lumam epedorete aswam ngun. Eputos bala ikweny yenirionon atamit anapakin ajul nuka Peacock kotoma abebenokake, Isurumi bon ngesi akekuan ileic. Ejok asalakin irai ikweny yenirionon. Ianyu? Naketamia ngesi aitwasam abebenoka nu komam erai Ikristayot, mam nges ibecokina cut.

Esubit bala inyubu atamit aiswamaun ajul nuka imerekek, atamit araun imerekek korai ngesi ajul araibo, erai ngesi enyubu. Itei ijo, mam ngesi epedori aiswamaun ajul nuka imerekek. Mam nges epedori aswam ngun. Ajul eraas ainakinet naka imerekek, mere enyubu. Epedori ngesi aitam aswam bala imerekek, konye eroko ngesi erai enyubu. Ianyu? Aso, ebalas ngesi ebe, "Eebo, apedori eong ainyam bala imerekek. Apedori eong aswam nu bala imerekek." Ido mam ace nuipedori ijo aswam, ekoto ijo korai imerekek tetere ijo ipedori ajaun kede ajul nuka imerekek.

42 Ido ber eong abwou kane ipak edit. Mam imerekek iswamai ajul. Ejaatar ngesi ajul naarai erai ngesi imerekek. Etamitos itunga luipu atemar ebe, "Eebo, abuni eong aitam ajokunar. Abuni eong aswam nu." Mam iswamai idiobore. Mam, mam ijo ipedori aswam ngun. Mam imerekek iswamai ngun, mam ilipitai nges aswam ngun, mam amunoi ngesi aswam ajul. Itolomi ngesi ajul, ido iswamai ngesi ngun naarai erai imerekek.

Ido nakiraar ijo Ikristayot, itolomuni ijo araito nuka Emoyo Lokalaunan. Mam ijo -mam ijo iswamai ngun aswam. Mam ijo itamit aiswamaun ngun. Itamit ijo...Mam itarauni akonikuan numam ijo irai. Koraun nuebeit ijo araut, ido iswamaun ngin alopet bon. Ipuunitotor yesi itunga ebalas ebe, "Eebo, alimokini eong yes. Arai eong...aloma eong okanisa. Ebeit cut ekotokin eong-eong ajalakin aisab"? Itamit ijo aiswamaun icebore bobo, kwana. Mam ijo ipedori aswam ngun, emamei eipud atamit aswam, kwape mam enyubu epedoria aswam ajul nuka imerekek. Mam nges epedori aswam ngun.

43 Araibo, ekuruk atamit ainyam kede ajele, ekuruk-ekuruk atamit araut ajele. Koomoom ber ijo ekuruk kokinga kangina, atemar ebe, "Ijeni ijo, arai eong ajele," kosodi anapakin ajul tomake, kobala ebe, "Itei ijo, asubit eong bala..." Ianyu? Ijulujulun do ngesi. Erai ngol e-etunganan loelimorit araut icebore komam erai. Itei ijo, mam ijo ipedori aswam ngun.

Mam ijo ipedori alimun ebe, "Kwana koany, ebeit eong ajaut kede ajokis, aso abuni eong ajaun kede ajokis. Ebeit eong aijar ayongit Edeke, aso abuni eong ajaun kede ngin." Inyobo, itamit bon ijo anapakin ajul. Karaida kipedorit ijo adumun kes, konye mam ibwaikini ajul neejai ikweny yenegelara. Ianyu? Mam cut epedori aswam. Ido itoduni bon eipone loeraar ikweny ngin yenesoswai. Ianyu? Koomoom ber ijo ekuruk lomojong atamit ajaun kede ajul aarei nuka ajele, kobala ebe, "Kongolia ne, itei ijo, arai eong ajele"? Ianyu? Inyobo, ijeni oni kere ebe erai ngesi ekuruk. Ianyu? Ianyu? Odaun. Ipedori oni ajenun ebe erai ngesi ekuruk.

44 Eebo, kwana eipone ngol ejaar, atamit aswam Ekristayone. Mam ijo ipedori aswam ngun. Ibore yenisodit yenebeit ijo aswam, nges auruunio irwan nakiareit. Ekoto ijo aibelokin. Ianyu? Ido nakibelokinor ijo, iraun ijo esube lokitetet. Kwana ijai do ijo araun yendidolit, kwana. Ianyu? Kwana mam ebeit ijo aoomoom nuikamunitos ajul, iswamaunos ngun bon, nakiurunere-nakiurunere ijo irwan nakiareit. Eebo, ipa.

Kwape duc alimunina eong. Kilem ijo epege, aiswag nges kosodi anapakin nges esuuti, arai esuuti loka tuxedo, atemasi, mamake, kosodi aijukar nges king angina; elosi ngesi cut kiton aipany naka erit kosodi aibelibelikin. Naarai, itei ijo, mam iswamauni ajokis adio. Erai ngesi epege. Ekeipone ngopengol. Eipwok nges ekeipone. Ekotokin ijo ekeinono, ido (nges) nuce kere itemokinos bon.

45 Kwana, koany. Ekoto ijo kouruun irwan nakiareit, erai ngin, aibelokinio. Ekoto kojaun aibelokin.

Ibala ijo ebe, "Eebo, Onac Branham, ajeni eong aberu nace na kalailo, inyobo, mam nges iswamator idiobore yeneronon. Erai ngesi aberu najokan. Araibo, ekiliokit mutan, erai ngesi etunganan lokajokan.

Mam nges iswamai imodiobore. Ijeni ijo mam nges itakadikini idiotunganan." Mam ngin erai ibore. Epedori ngesi korai eidunyet lokajokan, konye mam nges erai Ekristayot kiton nakeurunere irwan nakiareit.

Abala Yesu ebe, "Arai mam itunganan eurio irwana nakiareit," Yokana Eijiri 3, ebe, "mam nges epedori aanyun Akabakanut naka Edeke." Kwana, akepolou ebe, itei ijo, akepolou erai "Misiikin."

Iseseni ijo imodiobore, kobala ebe, "Mam eong etei ngin." Ipeleikinit ijo ebe mam ijo imisiikinit.

46 Mam itunganan epedori amisiikin apolou naecelanarotor itunga. Mam itunganan epedori amisiikin kanukiinyo kijulakinit angajepa nuka itunga kosodi ngesi einer kotoma angajep. Mam etunganan loka akuan epedori aanyun aibuses naka Edeke naatikebuni toma akonye nuka etunganan, kosodi ti ngesi aanyun aitapoet kosodi alimokin etunganan icebore, ka nuswaman; alimokin kes iboro luiburit atakanun, kwape abu Ejakait kiswamaikinia oni kane akuar naka bian, da. Ianyu? Ianyu? Etami aijen naka etunganan angicun. "Eebo, inyobo abu ngesi iswama? Araibo, icoa yenepone ali itwasamai ngesi? Inyobo acoa ejaatar ngesi?" Asesen itunganan inera kotoma angajepa, etemarete kesi ebe...kosodi icetunganan aijulun kosodi alimokin oni bec nuiswamat icetunganan yenikotoma Akuan, ka numam ebeit kes aswam. Ianyu? Ianyu? Eomitos kesi ebe eiponece loka acoa. "Ejai ibore yeniswama kokidingikec."

Mam kes epedorete amisiikin ngin kiton nakeurunere itunganan ngin irwan nakiareit. Kosodi do keuruun nges irwan nakiareit, akepolou ejai do ngesi okokoro loka eidicane, naarai erai ngesi esube lokitetet. Etwani eipone ngol lomojong loecoikinit, loabuonokin loarai ngesi. Kwana, erai ngesi esube lokitetet. Aso, itei ijo, mam nges iyatakini idiobore neejai loke, kwana, naarai iyatakin bon.

47 Koany, ekoto ijo kourun irwan nakiareit. Ido nakiurunere ijo irwan nakiareit, mam ijo ipedori auruun irwan nakiareit komamei aiyuun. Edolit ngin. Aso, itei ijo, kotoma apapulaka kane, ajaatar eong apetetait alopet, aiyuun nges apetetaitike. "Naarai arai amamei aiyuun mam epatana aitelel Edeke. Ngin yenebuni neejai Edeke ekoto iyu ebe erai Ngesi, ido ebe eropi ngul luemoete Nges kede itauon kere." Ianyu? Ekoto ngesi iyuunite. Ido arai ebuonokin ngesi Ebaibuli, nakibuonokinor ijo Akivot naka Edeke araut naedolit, kosalak bodo ber ijo da kau kiton ber nakiyuunia ijo ngin.

Inyobo adiakar? Amamus aiyuun. Ejai ibore idiopet bon yenyait itunganan. Erai ngin abuonokin arai mam aiyuun, adiopet arai nace. Eyait ijo idiopet yenirumiarit akoniijar. Eyangaikini do etiai loka aiyuun naijaatar ijo, adoketait naipedoria ijo aikeun.

Konye, nasodit, ekoto korai aiyuun. Kinyek ber eong asalak toma apetetait ngin apak edit.

48 Kwana, aiyuun nges ibusakinit ijo acamun. Aiyuun nges... "Aiyuun nges apetetait naka akiro nuemunoi." Erai, idauni ijo ajaun kede ngin nakidumunia ijo aiyuun, naarai epukorio kotoma aiyuun. "Aiyuun nges apetetait naka akiro nuemunoi." Iburanian 11, itei ijo, "aitogogonget." Inyobo ngin? Eipone bo loka aitogogonget ali? Atogogonget nakalaunan.

Kanuka ngun, nakitemaria ijo ebe, "Onac Branham, eyuunit eong ebe erai Edeke Eketangalan." Eebo, arai iyuunit ijo ngun, kosodi acamun Nges kwape Eketangalanikon, ido komam ingalai, konye cut kiyuunite ebe kanuka imacariniKe aponi kitangaleun ijo, emamei ibore yenelosi aibelokin ijo kotoma kangun. Erai ibore yenedauna. Kwana ipedori ijo kojaatar amun, ainyikokinit aipanganar neejaas nu ka neejaas ngun. Konye nakijaatar ijo aiyuun, ijeni ijo ngin, naarai erai aitogogonget. Idaunit ijo adumun ngin. Arai...

49 Imwaas bo ai, idiotunganan, yenepupunit Oral Roberts atupuruc na, neajaar ngesi alimonokin atupuruc na, Oral Roberts? Abu eong-eong apup nges elimuni icebore arai ice nuekamunitos ebe ajai aiyuun, ngin naka alakunio, ailip ailipasisit naka aiyuun, naka alakunio. Abala ngesi ebe, 'Orucokin koipone loka atiror eredio, orucokin koipone loka atiror icebore, tetere...' Eswamai ngesi ngun tetere kanu ainakin itunga ibore yenidokokinete kesi akecekanin toma. Icebore, ibala ijo ebe, "Adum kwana eong." Ianyu? Kwana, ejok ngin. Konye, kwana, aiyuun obe nakabeit mam ekoto atiror idio kotoma oboro kangul. Kwana, mam eong ajai aitoronit Onac Oral, odaun. Iswamai ngesi aswam naepol, ido erai etunganan loeyongit Edeke ido abeit cut aoomoi eong nui pu noi nuka Oral Roberts. Erono noi mam oni ijaatar luipu kwape kakesi.

Konye atamit eong alimun, ebe-ebe, mam aiyuun ipuda imodiobore. Ianyu? Ecamunit aiyuun Akivot naka Edeke. Naarai ebuni aiyuun kanuka "atiror"? Mam. "Ebuni aiyuun kanuka aiirar, aiirar da Akivot naka Edeke." Ngin nges ibubukini ngin. Ejai. Ianyu? Ido aiyuun, kwape kabalar ebe, emamei alwanis kaneejai ngin. Ejai aiyuun kwape kwana. Ejai aiyuun ne. Kwana bala kwape arai ejai icetunganan...

50 Imukeru ngin yenididi, apaaran kaya. Toto ngin Inac Kidd ka ngul luaponi kinerai nukec, naajaatar imukeru yenididi yenajaas amooteka kinga, komamei amooten naapukorio, kanu inyammat aitor toma. Kwana, amucalat na, kepupu Inac Kidd ka ngul itejenunete, abu kiyu ebe apedori ngesi arucokin, kasodi eong alipakin imukeru ngin. Kwana, itei ijo, einakini Edeke oni itunga...

Ice kotoma koani iriamunar kede Edeke, cut-cut kaidelal ebe eraun Edeke kwape bala alosit kane, bala, ido einer kede Onac Neville arai icetunganan yenijeni ijo. Ido acepakio nekilipia oni itunga ailip

kanuwok. Ngun kes ibusakinit oni aswam. Ido arai kijaar oni aiyuun ebe ekiliokit arai aberu ngin, naejai ailip kanuwok, ebe inerasi kede Edeke, akepolou esipo do aiyuuniwok. Agogongor. Ebwoi.

51 Kane. Abu Eromayot kolot airiamun ka Yesu. Kosodi ngesi atemar ebe, "Mam eong-eong ebusakinit ebe ebuni Ijo togoka. Mam eong ebusakinit. Mam eong-eong ebusakinit. Ido mam eong-eong abu...Mam eong emarakinit akakuan koipone kangol. Konye," abala ebe, "edeka ekasapat noi. Ido kolim ijo Akirot bon, itei ijo, ido engaleuni ekasapat."

Inyobo ngin? Mam alwanis abu kiswamau atiaketait. Ianyu? Naarai, erai Edeke loejai aiboisio kere. Erai lokapedor kere. Ido nginiboisit kere ejai Edeke, anatar kere. Ianyu? Eumokina Edeke ko Germany, ko Switzerland, ka laiye kotoma Afrika, kosawa kalope kalo, ejai Ngesi ne. oo! Ikoni nen.

Aso abala ngesi ebe, "Mam eong ebusakinit ebe ibuni Ijo togoka. Kolim Akirot bon." Araibo ngin inyo? Arai aiyuun naka Eromayot kangol. Eyuunit ngesi ngin.

Ido abala yesu ebe, "Kolot ekonirok Angaleu esapatakon

Kosodi ngol anyoun alosit, alosit naka apaarasia aarei. Kosodi apak natupakini, eroko nges kedolo ore, abu ngesi kiriamunos kede ice kotoma obulesinike eponitos. Kosodete ngul atemar ebe, "Angaleu okokukon."

Kosodi Eromayot ngol ariengun, kiton naketemaria ebe, "Apak anyoin ageunia angaleun? Atutubet anyoin naka apaaran?"

Ebala ebe, 'Nepetai esawa lokitomonet ka ludiopet, nges ageunia ngesi atamakin."

Kosodi kojén Eromayot ebe arai kosawa ngopengol loalimunia Yesu ebe, "Angalei okokukon," ido kosodi ngesi aiyuun. Amen.

52 Opedor kere, ejai aiboisio kere, ejeni kere, emameotor ageunet ka esange, ngol nges Edeke. Aso nakinomuniata kesi esimu kosodete atemar, "Ilip!" Arucokina ngin! Ido aiyuunikon nges eyangauni Edeke. Ngín nges ibore yeneyangauni ailip ka Edeke nepepe, toma aiboisit. Ailip! Ejulanar aiyuun anyoun kane kiton ne. eyangauni ngin nepepe.

"Kolim Akirot. Kere nuakoto eong Ijo alimun nges Akirot, kosodi nginibore kere aitemokin." Itei ijo, mam epuda Nges ajaut ngina. "Kolim Akirot bon." Inyobo? Ejai Edeke aiboisio kere. Erai Ngesi lokapedor kere. Erai Ngesi lokapedor kokwap naka akwap kwape eraar Ngesi kokuju naka akwap, arai kowaitin kangul iarei kere. Erai Ngesi Edeke. "Ido ibore bon yenebeit Ijo aswam nges alimun Akirot," abala ngol.

Ido, kwana, aiyuun iswamai nuce kere. Aiyuun iswamai nuce kere. Aso ekoto ijo kojaatar aiyuun kanuka apetetait. Ekristayone kere, nuirai ijo kere, kere nuebeit ijo araut, epesikinitai toma Akirot.

53 Ngín nges apolou eyuunitor eong Akirot. Ianyu?

Mam eong apedori aibwaikin aiyuunika neejai idiobore kere. Arai kobeite eong abwaikin ngin neejai ekanisa, ekanisa bodo ali tikebwaikini eong: Atulik, Lutheran, Methodist, Baptist, Pentekosit? Aibodo tikebwaikini eong? Mam eong ajeni. Emunaara kere ka nginibore kere, ijulujulete ikokoron, ka nginibore kere.

Konye kakebwaikinia eong akaiyuun toma AkirotoKe, esipokin. Emamei itunganan yenijuli Ngín. Ejai Ngín ne, EBALA EJAKAIT KWANATA. Akepolou eyuunit eong Ngín. Ngín nges apetetait.

54 Emuron loajokan kokwap kane kotoma oibuga, epaperoka, Emuron Sam Adair. Kipou isio araas itelepai nepepe. Yesi kere ijenete Sam. Ido abu ngesi kalimok eong ebe, ebala ebe, "Bill..." Akaulo naka aitapoet ngin abunore, abu alimok nges neabeit nges adukokin akeiboisit, eipone loebeitor ajaun. Kwana kolot toma ngina, kingit nges acepak arai mam erai abeit. Ikar iarei arai iuni eroko iswamauna, alimokin nges aiboisit nabeit ajaun. Abu eong atema ebe, "Ibuni ijo nepetai ayangar aduketait naka eibuga." Ido emamei ibore dimarai idiopet kakidingotoke ka ngin, ido ngin nges aiboisit ngin naka naimukeere luengwalangwalauna. Ejaatar Emuron Adair nenice nen kere, ka neekorere ike. Odaun. Abu Emuron Adair kilelebik ngin cut bec, aitapoet ngin. Aibo, aiboisit nabala ngesi ebe, "Mam apedori karaida atiror adaun ikar akaisarei ka lukany. Ejai toma okooti."

Abu eong atema ebe. "Emuron, ainaki Ejakait ijo ngun, kanuka akoniyapaara."

Ebala ebe, "Mam eong ajok."

Abu eong atema ebe, "Irai ijo akolodong. Ijaatar ijo abokoyat kokinga, abokoyat nakokuju naisesenia ijo ipaperokon kalailo, konye toma irai ijo ekesa obe. Alomun kinga naka abokoyat kangin." Abu eong atema ebe, "Edeke kiinak ijo ngin."

Abu ngesi kotema ebe, "Mam eong abunokinar ijo, Billy, konye ejaun eong abunokin ngun."

Abu eong atema ebe, "Kolot oyapeesikon." Ido kanuka ngun abu ngesi koloma kinga.

Atupuruc naatupakini, abu ngesi kanyaara eong, ebala, "Epirisiara eong kiton atwanare."

Abu eong atema ebe, "Inyobo ationis?" Arai nepetai Olap Lokikanyetekaarei. Abu eong atema, "Inyobo ationis, Emuron?"

Ebala ebe, "Adau eong agwel aiboisit, Billy. Ajaatar kesi airiamun akuar naka bian ko Boston, ido adau eong agwel aiboisit da atupuruc na."

Abu eong atema ebe, "Abu eong alimokite ijo."

Ajai eong kwap laiye apak kaya, enerasi kanges, neabu emuudu koduoror koingareneka. Abu ngesi kotema ebe, "Aomit eong bala alimokit eong ngun neejaas ilukumin luka itunga luelomununete ne, koipone kangol." Inyobo? Kwana, nakelimuna Edeke idiobore, ejai aismamaun.

55 Atibong naka bian apotu icepapero kolomutu toma. Apupunitos kesi aitapoet ngin inerau nuikamunitos amiam najaatar amumwar nuka inches akaisaongon ka luaarei, ka eseseu loarengan. Mam eong ajeni arai itunga idi lueponitos togo, ekotos aanyun ngun. Abu eong atema ebe, "aipimas na ne. Odolok amumwarat." Abu ngesi kopup inerau eroko iswamaunia. Ianyu? Inyobo? Nakelimuna Edeke idiobore, ejai aismamaun. Ngina nges apolou, epesikinitai.

Kwana, na nges ainapetau naka aitajario. Kosodi da arai kiswamaun aitapoeteKe ejok cut, bec eipone loebalatar kesi ebe iswamaun, ido ekanisa lo kane ejeni ebe erai ngina abeit, kosodi dobodo Akekirot? Ianyu? Erai ngina nakabeit adepar aitapoet. Arai mam aitapoet inerasi kede Akirot, akepolou ibucara aitapoet ngina. Konye erai Akirot, nasodit, naarai Akirot nges Edeke. Ianyu? Aso, erai Ngesi loejai aiboisio kere. Abu Ngesi kiner ngina kane, ka ainakin aitodolokin ko Canada. Amen. Itei ijo, ejai Ngesi nginiboisio kere. Eebo.

56 Nasodit, ibusakinit ijo kouruun irwan nakiareit. Kosodi do kiuruun ijo irwan nakiareit, ejaun ijo kede aiyuun; iyuuni ijo Akirot. Kiton nekiurunere ijo irwan nakiareit, ibuni ijo aitepeg Ngina. Arai irai bon ijo loigongakina neejai ediini, ido-ido ojaatar a-a-aijen naka etunganan ebe ibusakinit ijo aswam nuedolito, mam ijo ibuni acamanar kotoma Akirot naka Edeke. Mam ijo ipedori aswam ngina. Ekoto ijo kouruun irwan nakiareit. Ido, aurio irwan nakiareit, itolomuni aiyuun. Eebo. Ido, akaulo naka ijo adumun aiyuun, na cut kane, a-i-y-u-u-n, aiyuun, akepolou ijai do ijo adoketau naka apol.

57 Kwana, itunga luipu edokarete kuju otem, kosodete ailip, kosodete atemar, "Ejakait, kitimo i eong." Kosodi ejautene lokaumokin loka aitalaunio adoikin kes, ka iboro. Kosodi ijo ajaun kede apak naejok, anyoun kotem, iluluei. Kobongori ijo, kotemari ebe, "Kisirereng Edeke, adum eong." Mam, abu bon ijo kodolok aiboisio nabeitor ijo ageun apolo. Mam ber iswamat idiobore. Ianyu? Ibore bon yeniswamat ijo nges apesikin apetetau.

Kwana ilosi adukun etogo, kosodi abukokin apetetau, kotemari ebe, "Esapat, adum eong ngina." Ianyu? Idum ijo apetetau kanu adukokin etogokon toma. Kwana ekoto do ijo aiduk etogo.

Kwana nen nges elomunia ibore toma, atupuruc na, ilosi oni einer nuke kwana. Eebo. Etogo, apetetau na nges nasodit. Inyobo apetetau naka Ekristayone? Aiyuun toma Akirot naka Edeke. Ngina nges apetetau. Kosodi do ijo ageun apolo. Kosodi do ageun aiyatanakin neejai apetetau na.

58 Kwana, aiduk etogo, isipokini ijo ikonipirin ka nginibore kere. Onac Wood, ka ice kotoma ikakeok kalu ka ikadukok kane epedorete alimokin oni eipone loka aiduk etogokon. Ianyu? Konye alosi eong alimokin ijo eipone loka aiduk etogokon lokomoyo, neepedoria Edeke aiboi. Ekoto Ngesi aiboi kotomakon. Ekoto Ngesi aitarau ijo bala kwape kaNgesi. Ekoto Ngesi aitodiaro, atemasi, aitodiar, Etungananeke.

59 Ijeni ijo, kotoma apakio nukolo naetapitor kwi aitemonokin esabu, eroko ejaunia luecalete kanu ainok ngol, aminasi kesi airuk esabu, arukor awai aibotokat, iron ka copper ka iboro, kinga, kosodete ainyikokin airuk, kosodete aibelokin, kosodete airuk. Iswamaete itunga luka India ngina kwape kwana, airuk esabu, ido erukete kesi ngol. Ijeni ijo eipone loajenikiniata kesi ebe adaun iron kere kotomake, ka agasia kere ka iboro, ka apua anyou kotomake? Neapedoria loaruki aanyun akeput, kwape kalabiro, kotomake. Alai ido ocai ejok kiton atodiar ekarukon.

Eipone ngol nges iswama Edeke. Alemuni ngesi esabu loedumunit Ngesi kotoma akwap, kosodi Ngesi airuk ngol, kede Emoyo Lokalaunan, aibelonokin nges, kosodi aibelonokin, kosodi aibelonokin, kosodi airuk nges kiton (Nakedumunia Ngesi) epedo Ngesi aanyun akeput. [Kibapakini Onac Branham akekanin irwan nuipu angetakin ekokoro lo kere-Ekewa.]

60 Ido ngina kes ibusakinit oni aswam, aitodiar Okoku loka Edeke. Ido kwana ebeit oni aswam aswamuKe. Abala Ngesi ebe, "Ngina yeneyuuni Eong..." Yokana Eijiri 14:7, "Ngina yeneyuuni Eong, aswamisio nueswamai Eong iswamai ngesi da." Ijai ijo ageun aitodiar aswamisio nuka Kristo.

Konye luipu kotoma kaoni itamit aitodiari aswamisio nuka Kristo kotomawok. Kwana nen nges ejai ationis. Idumuni oni iboro ngul iswamasi. Ijenete yesi ngun. Iseseni oni nu, aigunikineta korot. Idum oni atukos naka abelebelen nuemamei ajokis nuka ijaanakinak, nuka Ikristayon, iculitai orot, erai naarai mam kes apotu kolomasi tomake ejok.

Ido ngun kes ajaar eong ne atupuruc na, aitam aisisianakin ikanisa yen, ka eong elopet, eipone lokipedoria oni araun aiboisit naiboio Edeke lokajaran. Imwaas bo ai iminas araut ngun? [Kotemari atukos ebe "Amen."-Ekewa.] Aiboisit naiboio Edeke lokajaran.

61 Kwana nu kes nuebeit oni aswam. Inyobo ibore yenisodit? Kojaun kede aiyuun kosodi auruunio irwan nakiareit. Erai ngin apesikin apetetait.

Kosodi do, akaulo naka oni apesikin apetetait, nakiaareit ijo aiyatakin neejai apetetaitikon. "Iyatak neejai aiyuunikon," abala Petero kane. Iyatak toma aiyuuniko...Nasodit kojaunos kede aiyuun, kosodi do aiyatakin ajokis toma ayuunikon. Lo nges epi loetupakini. Nasodit, obukok apetetaitikon, aiyuun. Kosodi do, neejai ayuunikon, iyatak ajokis.

Kwana, nepenen cut ibirokini luipu kotoma kaoni kwap. Eebo, ipa, Eebo. "Iyatak ajokis neejai aiyuunikon." Mam ngin erai akepolou ajar korai abekot, ijene ijo, kwape aberu arai ekiliokit, kaceda. Mam ngin ikamanara kede ngun.

62 Abala Ebaibuli ebe, kisiomi oni kane kotoma Oitabo loka Luka, neabalar ebe, "Abu agogong konyou kamake." Biai ngin edolit? [Kotemari atukos ebe, "Amen."-Ekewa.] Arai ilosi oni aputokin kede Nges, ekoto do oni ajaas kede ajokis. Ibusakinit oni ajaas kede ngin, aputokin bala Nges. Ngol ekosio losodit loabu eong amin, kotoma-kotoma awoisio, ediopet kotoma kalukupolok kakere arai, Aput kede Yesu. Eebo, arai ebeit eong aputokin ka Yesu, ekoto eong ajaas kede ajokis, ka erot loitori ngin tetere etubor anyoun kaneajai eong kiton neejaas itunga. Naarai, "Abu agogong konyou kaneejai Ngesi kiton neejaas itunga." Ajokis! Ido eroko ijo ikorara ngin kinga, ekoto ber ijo nasodit kojaatar ngin. Arai imameotor ijo mam epedori alomun kinga. Emamei ibore yenebeit ngin alomun kinga kotoma.

Dobodo arai etamaki itunganan amatun ajokis kotomawok, ido koany ebongori "Mam isirigin ilosikina"? Ianyu? Mam, mam, emamei itunganan yenebeitor amatun kotoma, agiri apapula naelemunere isirigin. Icetunganan asesen ijo kwape Ikristayot, kosodi moi aanyun ijo kokinga kane iswamai bala ikadiakanaran, emamei ajokis naepol naebait amatun kanejai ngin. Ianyu? Eebo.

63 Ibusakinit ijo kojaas kede ajokis...Kosodi do idum ijo ajokis, ipedori do oni aiyatakin ngin neejai aiyuunikon. Ngin nges arwatat naetupakini naka apetetait. Kwana, nasodit ber ibusakinit ijo kojaas kede aiyuun. Aiyuun bon mam epedori aswam ngun. Ekoto ijo...Abala Petero ebe, "Kosodi do iyatak ajokis neejai aiyuunikon." Ibusakinit ijo kojaas kede ajokis tetere ijo ipedori aiyatakin ngin neejai aiyuunikon.

Kwana, do, aticepak epedori korai, apolou nakimameotor yesi ngin, erai naarai ikanisan luipu luka lolo isisianakinete yesi ebe mam ipuda ijo kojaas kede ngin, arai ebe atuboros apaarasia nuka ngin. "Mam ipuda kes kojaas kede ngin. Ibore bon yenebeit ijo aswam nges alomar okanisa. Eebo, atuboros apaarasia."

Ajokis, idiotunganan kere ejeni apolou naka akirot ebe ajokis, itei ijo, ido ibusakinit oni ajaas ka ngin. Arai abu agogong kolom kamake, kanu aitangaleun aberu nadeka, ipuda Ngesi agogong ngipengin kotoma Okanisa, naarai arai Ngesi aanyunet. Ido arai abu Ngesi kojaatarv kede ajokis ainakin itunga, ipuda Ngesi oni ajaut kede ajokis ainakin itunga. Ido inyobo ajokis? Ajokis nges agogong arai apedor.

64 Ice kotoma kakesi mam iyuunito apedor naka Edeke. Ebalas kesi ebe, "Ngun-ngun-atuboros ngun. Ibore bon yenebeit ijo aswam nges bon aibwaikin ekirorikon otabo, kosodete aicokicok, arai abukokinio akipi, arai aibatisao, arai idiobore kere. Ido kes ngun kere nuebeit ijo aswam."

Konye abala Petero kane ebe, "Iyatak ajokis." Kwana, inera Petero nuka aiduk Etogo loka Edeke, itei ijo, Eyekalu loka Edeke, aibwaikin ngin toma aiboisit. Ido akaulo naka ijo ajaun kede ajokis, ibusakinit ijo kojaunos...Akaulo naka ijo ajaun kede aiyuun, ekoto ijo kojaas kede ajokis eupasi kangin. Edolit ngin. Kojaunos kede ajokis kanuka akwap kere.

Abu eong alimonok nepetai ikar akaisarei kau, aomit eong, kotoma Rev. Lily. Lily, ecokon. Alemunit eong kotoma akirot naebalar Yesu ebe, "Koanyutu apecelun, eipone lomam kesi kitaaritoto karaida aoji. Konye atemari yesi atiar, Solomon da kotoma aibusesuke kere mam esiritoi kojokan kwape adiopet kangun."

Koanyutu apecelut. Elomunit cut kokwap kalaije korit. Ido nginidakikat naka apaaran ejai nges amatunun kotoma akwap. Ianyu? Ido inyobo iswamai ngin kede ajokis naematununei ngesi? Ekorari ngin. Itolomuni ibore yenibus asesen kanuka yeneseseni. Engaar ngesi alopel bon kanuka esike, kanu ao abunore kosodi alemun atutubeteke. Mam enguriani. Ejaatar ngesi ngin, kanu akorar. Dobodo tikorai ao alomur toma ngina, adaumun mam isirigin ilosikina, emamei esike? Ti ao ngin ekoo akekou kosodi atemar,

“Eipone bodo ali loka apecelut erai ngin?”

65 Arai kebu etunganan, etamit adumun aitajario, alosit okanisa loiyuunit ebe atuboros apaarasia nuka nukapedor?

Bala kwape abu Jack Coe kolimunitor apak adiopet. Elosi ooteri, kosodi aijaun apapula naati naiwadikatai itiaisinei luka inyam; kogeuni aisiom kolosi kwap, akiring naejai akojoit naeputosi kede anyukuta T ka iboro. Ebalala, “Anyami kwana eong Akiring naejai akojoit naeputosi kede anyukuta T.”

Epedori da bobo aticepak aiperikin apapula naka itiaisinei kwap kosodi alomar kinga, itei ijo, edolit ngin, naarai emameotro kesi ibore yenebeit ainyam, ejaas aceda. Aso ipedori ijo alosit ooteri loejaatar ibore yenebeit ainyam.

Ido etunganan loimoyoikit, loepoloi ipuda ibore yeninyaman. Ngin nges Akirok naka Edeke. Eyuunit eong nginikirot naka Ngin.

Ejaatar Edeke emeesa epesikinitai nekiutanere lukalaunak luka Edeke,

Isunyukit Ngesi iketunga luseuna, “Kopotu ainyam.”

Itani Ngesi kede emaanuKe, ekorakini Ngesi nginiipud kere,

Oo, ejijim amor kede Yesu apak kere.

Edolit ngin. Eebo, ipa. Ejaatar Ngesi Ngin. Ejaatar Ekanisa Ngin, Ekanisa loka Edeke lokajaran, loedukuna kiton otunganan loitekooro, loka acoa naka Kristo.

66 Kwana, kwana ibusakinit ijo ajaut kede ajokis.

Abu do eong katema ebe, ibore yenisodit yenijeni ijo, ejai itunganan yeneminak ainguun auria. Mam nges ibitiono ejaatar ngesi euria. Eroko nges ekoraria euria, ekoto ber nges kojaatar ngol. Eroko nges ekoraria esike, ekoto ber nges kojaatar. Eroko nges ekoraria aibuses, ekoto ber nges kojaatar.

Eroko ijo ikoraria ajokis, ekoto ber ijo kojaatar ngin. Aso, iyatak toma aiyuunikon, ajokis. Amen. Imisiikis? Ipedori ti oni asalakin toma ngin apak naepol, konye ti apakiwok edaun kamawok. Aiyatakin ajokis toma aiyuunikon.

67 Kwana, nasodit aiyuun, kosodi do ajokis.

Kosodi do, iunikini, iyatak ajenun. Ajenun, kwana, mam ngin erai akepolou aijen naka akwap, naarai erai ngin abanganut kaneejai Edeke; konye aijen kanuka aitiak, aitiak (inyo?) adolit kaneejai aronis. Eipone ali itiakia ijo ngin, do. Arai ijaatar ijo aijen naka Ekristayone kede akonijokis ka aiyuun? Itiakuni ijo arai edolit Akirok arai erono. Ido arai ipedorete yesi aibwaikin awai italesiokus kere, ka amamus aiyuunikon kere, nginibore kere yenibala ijo ebe iswamat ijo, akepolou ijaatar ijo aijen aiyuun ebe mam Edeke epedori aingal. “Koraun akirot naka idiotunganan aingal, konye nakang abeit.” Ianyu? Kwana ijai ijo adumun aijen. Erai ngin aijen nakapolon. Mam ipuda ijo ajaut kede idigurin iwongon kotoma osomero ece, arai icebore kwape kangin, kanu ajaut kede ngin, naarai ajokisio nu kere einakinitai ijo Edeke, aibwaikin kuju naka apetetait naka aiyuunikon, tetere ijo idolokini toma aileleba naka ejautene loka etunganan obe, lokajaran loka Edeke. Eebo, ipa.

68 Iyatak, iyatak ajenun, naarai, ajenun naka Akekirot. Ibusakinit ijo aiyuun ngin kotoma koipone kalo. Kwape nat, ekoto ijo aiyuun lolo ebe...kosodi acamun ngin, ebe mam apaarasia nuka nukapedor etuboro. Aijen ebe ngun nuabu Edeke kolim, epedori Edeke aiswamaun.

Abu Aburaam kiyu ngun. Ido nakeraar ngesi loka apolou naka ikar akwatat, mam nges abu kiriangiriangikin kotoma aisumunet naka Edeke kotoma amamus aiyuun. Kosesen ber ijo eipone loasubitor akirot ngin kwape nationo. Etunganan lo ne, ikar akwatat lukapolou, komoote ikoku auruunio toma okaleke, kaneejai aberu naka ikar akaisakanyaongon lukapolou. Ianyu? Nepetai ikar akaisakany atuboro kotoma okar luka aur, iboitos kede ngin anyoun nakeraar ngin apese, arai atumunan. Ido ngesi lo ne, adaunitos amoorike nuka aijar atwakare. Ido adaunit akoik naka Sara atwanare. Ido amuno kere adauna, kotoma kanu ikamunitos amun. Konye, kereka, kemamei amun, abu kiyuu kotoma amun, naarai ajaatar aijen ebe apedori Edeke aidar nginibore kere yenabu Ngesi kisumunikinite.

69 Kwana, kidum ijo ngin koipone kangol, aso do kiyatak neejai aiyuun ngin. Kijaunos ijo kede ajokis nakabeit, iyataka toma aiyuunikon. Nakipedoria ijo alosit kinga ne korot, aijar kwape Ikristayot, aswam bala Ikristayot, araut Ikristayot, iyatak ngun toma aiyuunikon. Kijaunos ijo kede ajenun...

Ibala ijo ebe, “Eebo, mam eong ajeni kwana arai erai Naiwadikaere na naedolit. Kwana Aswamisio nu 2:38, mam eong ajeni nuebeit aswam kede Aswamisio 28:19. Mam eong ajeni.” Eebo. Mam-mam ijo iyatakin idiobore, naarai eroko ber ijo idumunia Ngin. Ianyu? Inyobo ilosi ijo aswam? Naarai, imameotor ijo aijen nailosikina ajenun nuikamunitos Edeke, ber, ebe mam Ebaibuli eretonokin bon. Ojalak ngin ajalakin.

Mam iyatakini alimun idiobore yenikamunit ngin. Ianyu? Kojalak ajalakin.

Konye nakipedoria ijo aanyun ebe mam Naiwadikaere eretonokin bon, ebe pedori ijo alimun ngun; ido kopedori aanyun, ngun, kede apukokinio naka Edeke, Akivot kere iwadikatai kotoma aiyeyea, ido aijen bon naka Edeke nges epukori Ngin; aso kidolok ijo kosodi atemar, abongokin nginikivot naka Edeke kede "amen," kosodi aiyatakin ngun toma aiyuunikon.

70 Oo, ijai kwana ijo adolokin araun etunganan lokajokan kwana. Ianyu? Ijai ijo aikeun, itei ijo. Kede inyo? Kede aiyuun, kosodi do kede ajokis, kotupakini ajenun. Itei ijo eipone loejaar adukun etunganan lo? Itei ijo ebe emamei eipone loka aiku ngin. Lo nges eipone loka alomar toma ojautene loileleba loka Kristo. Eebo, ipa.

Aitiak, atiak nuajokak. Atiak arai edolit arai erono, aiyuun Akivot naka Edeke. Aitiak arai edolit arai erono, arai ebeit eong aijaanakin etal arai aijaanakin Edeke. Atiak arai edolit araibo erono, arai ibusakinit eong aurio irwan nakiareit arai alomar okanisa. Akepolou ijai do ijo ageun. Aitiak adolit, ketema ekalimonokinan ebe, "Atuboros apaarasia nuka nukapedor." Abala Ebaibuli ebe, "Yesu Kristo ngopengol bian, lolo, ka ikar kere." Kwana anibodo ilosi ijo aiyuun?

Kitema ijo ebe, "Acamuni eong Edeke." Kwana, mam ijo ilimuni ngun kanuka alimun bon, "Eebo, acamuni eong-eong ngin," cut kotoma otaukon. Konye, icebore kotomakon, aiyuunikon nges eremuni ngin kinga ngina. Ikoni nen. Ayuunikon nges ebala ebe, "Ajeni eong erai Ngesi ngopengol. Amen. Aanyunitor eong Nges erai nges ngopengol. Emamei ibore yenepedori alemar ngin kaneka. Ajeni eong ebe erai Ngesi ibore ilopet." Amen. Kosodi do aiyatakin neejai aiyuunikon. Apesikin ngin kuju apetetai.

71 Apoloun kwana, aikeun cut kuju neejai Akabakanut. Adoloki toma aiboisit kwana. Eebo.

Kwana, ibore yenetupakini, elimokini ijo ekalimonokinan, ido itunga luipu ebalas ebe, "E...Iboro lu luisiomi ijo kotoma Obaibuli, araas kesi luka apak ace. Kwana, abuni eong alimokin ijo inyobo. Naarai, mam oni ipuda iboro ngul lolo. Mam oni ipuda ngin. Ianyu? Mam ebeit oni. Mam ebeit oni aitetemonor iboro ngul, aitangal naka Edeke. Mam oni iswamai einer kotoma angajepa, kotoma okanisa, kanu-kanu aidar ekanisawok orioro. Ido mam oni iswamai nu."

Eebo alomar toma ngin. Kijaar eong Naiwadikaere iwadikatai kane nuikamunitos ngun, itei ijo, arai mam ibusakinit oni aswam ngin araibo mam, kwana.

Konye kane abala ngesi ebe, "Mam eong ajeni. Mam oni ebeit aswam ngun lolo. Ibore bon yenaomit eong ibusakinit oni aswam, ekoto oni aisisiaun einer ejok koingaren naka esipan. Ekoto oni alosit kasodete ainakin emuron loka adam koanyana aomisiowok, kanu aanyun arai ipedori oni aitodiar, arai ikeuna aijenewok ejok kanu aswam ngun, ka-kaceda koipone kangol. Aomit eong...Ido kijaar oni atukos naepol kakere. Iduki oni eriongetewok."

72 Mam oni irai erionget. Mam eong ajai ne atupuruc na kanu adukun erionget. Ijukunit eong Kristo adukun idiopediopen kiton ojautene loka Yesu Kristo, tetere kesi eraunos etogo lokapedor ka aiboisit naiboio Emoyo, kanuka Akekirot. Kede Akekirot, itei ijo, adukun idiopediopen kiton adoketai. Mere adukun erionget kiton ediini lokapolon, konye adukun idiopediopen kiton odwe ka adwe nuka Edeke. Ngin nges aomisiot. Ianyu? Iyatak toma aiyuunikon, ajokis; toma ajokisikon, iyatak ajenun. Eebo, kwana ijai ijo adolokin toma adoketai.

73 Kwana nakegeuniata kesi atemar ebe, "Eebo, mam ebeit oni acamun ngun lolo..." Mam ebeit ijo acamun. Ibusakinit korai kwangin.

Mam Nuiwadikaere ingalaete. "Ido mam kes eraas nuka eijulune edio loka etunganan," abala Ebaibuli. Kiyuu Ngin aiyuun koipone kalo kiwadikaterere Ngina. Ianyu? Ekoto ijo kojaas kede iboro lu. Ido eipone ediopet bon lokipedoria ijo ajaun kede ngul, nges ajaun kede aijen naelomunit kotoma Akuju. Aijen naebunit kotoma Akuj nges itodiari Akivot. Ianyu?

Ekoto ijo aiyuun, mere aisoswaikin ngin. Emamei idio kotoma oboro kalu lueraas luka aisoswaikinit, itei ijo, arai kitam ijo atemar, "kijaar eong ngin." Mam iraun ikweny yenirionon yeninapakit ajul nuka Peacock tomakon, itei ijo, naarai epote adotor cut awai. Mam kesi elomunitos alomun kotoma kanen. Imakakina kesi toma aimakakina.

74 Aoomoi eong neabalar Daudi kangina, Isabulin 1, "Eputos bala ekitoi loiraikinitai ariri naka aleles naka akipi." Ijeni ijo, ejai atiaketait araut loiraikinitai ka araut loisipokinitai, aimakakin. Bala elua, loiraikinitai, loelomari kwap kosodi adongakin ejok. Akitoi naimakakina toma ngina, mam ijo ijenuni nueloste aiswamaikin ngin. Emameete alias. Emamei apetetai. Ianyu?

Eputos bala icetunga epote luelumunito kosonero loka akiro nuka ediini arai icebore, itei ijo. Mam ebeit..."Eebo, Emuron mutan nges abu etitingik eong toma aijaanakin." Mam ngin iswamaun aitegelikinet adio nuarai ngin.

Abu Kristo kourik ijo toma. Kosodi do akaulo naka ijo aurikinio tomake, lu kes iboro luemuno ngesi ijo aiyatanakin. Inyikok aiyatanakin ngul. Kwana ilosi oni cut kwap naka ekokoro.

75 Kwana ebuni ajaun icebore kotoma aijen kana, yenibuni oni einer nuke, aijen naka ayongit Edeke. Ianyu? "Biai Ebaibuli adaun akepolou kotoma apak kana?" Itei ijo, kesi, itunga luipu elimonokinete yesi ebe, ebe mam Ebaibuli epeleikinit ngun. Arai irerei Edeke eong, ido kitetenenenei eong kotoma adiakarika, ido karai arai eong okoku loka Edeke, iswamai Ngesi ngun. Iswamaikini Ngesi yesi kwangin, odwe ka [Aibosit naemamei ibore kateepu-Ekewa.] adwe. Kiswama ijo idiobore yenaronon, iteteni Ngesi ijo. Ido arai epodokinit Edeke kanukon, tetere Nges engicakinit ijo ido itetenenenei ijo, epodoinit bodo Ngesi Akekirot biai, naerai aanyunetekon, naerai Ngesi elopet!

*Ageunet ajai Akirot, kojai Akirot mama ejai Edeke, korai Akirot Edeke.*

*Kosodi...araun akaun, kiboiororoi kakidingosiwok,...*

76 Akirot nges apukokinio naka Yesu Kristo, abala Ebaibuli kwangin, Kristo epukorio kotoma Akirotoke. Ido arai abu Ngesi kongicakinite ijo apak naibilibilia ijo ikisila, itoroni Ngesi ijo kanuka ngin, eipone bodo ali angicakinitor Ngesi Ekekesil loetubokini ijo! Amen.

Kolot ngaren, esapat, mam ilimonikini eong iboro ngul!

Eyuunit eong aijen, nakabeit naka Emoyo Lokalaunan. Aijen naka Emoyo Lokalaunan ebongokini duc Akirot naka Edeke kede "amen." Kidum ijo iboro lu luesubito bala epegas bonik, kotoma Obaibuli, kiboikin kwap kosodi aisisia ngin, ido kotoma ailip koipone kangol. Ido ibore yenisodit yenijeni ijo, egeuni Emoyo Lokalaunan alomun toma. Akaulo naka apak naedit koanyuni ijo erucokinos nepepe, ido kidum do ijo ngin kanen. Ianyu? Acoa ngin.

77 Ice kotoma kakesi ebalas ebe, "Eebo, kwana, abala Ebaibuli ebe Nges ngopengol bian, lolo, ka ikar kere."

Ido ebala ekanisa ebe, "Kotoma koiponece eputo Ngesi." Huh-uh! Huh-uh! Idu ijo abwangun abaagat, kanepakanen cut. Ianyu? Eebo, ipa. Mam, ipa. Erai Ngesi ngoipengol. Eebo, ipa.

"Yesu Kristo ngopengol bian, lolo, ka ikar kere." Emamei aitegelikinet kotomaKe, cut. Ejari Ngesi kotoma Okanisake, iswamai ibore ngipengin. "Ipak edit," kwape abu eong atakunitor ipak edit kau, "ipak edit ido mam bobo akwapin kaanyunete Eong, konye yes ianyunete Eong." Naarai, abala Ngesi ebe, "Ajaun Eong kayes, tomakusi da, kiton awasia naka akwap." Bobo da, abala Ngesi, "Aswamasio nueswamai Eong iswamaete yesi da." Bobo da, abala Ngesi ebe, "Araun Eong Emusabibu. Iraunos yesi atenieik." Ido ejari atenu bon kanuka Aijar naka Emusabibu. Nginibore kere yenejai neejai Emusabibu elomuni kinga kotoma atenu. Aibus! Akepolou, "Kristo ngopengol bian, lolo, ka ikar kere." Itolomuni Aijar naka Ejakait Yesu Kristo. Amen.

78 Ajenun; mere naka akwapin (ebunokin). Eipone edio kere loka aijen naka akwap ebunokin. Ianyu? Konye aiyuun emamei abunokin. Epukokini Edeke ijo ebe elosi ice-icebore aismamaun, nginitunganan kere loka science epedori alimokin ijo ebe, "Mam ngin ibecokina. Mam epedori aismamaun." Iyuunit ijo ngin, kwape kwangin. Ianyu? Eebo, ipa. Mam ebunokin. Abala Ebaibuli ebe, "Imudiari oni nginipeget." Mam ijo ibunokin kede aiyuun. Emamei aiyuun abunokin." Ejeni aiyuun aiboisit naejai ngesi toma. Iswamai aiyuun. Etitingikini aiyuun. Mam ikunyakini. Emamei ibore yenedepori aijangar ngin. Mam eong apodo arai ingai ebala nu, ngun, ka kwa. Mam ijangakin, mot da. Esalakini nepenen cut, aidareun, aidareun, aidareun. Mam iswamauni ategelikinet adio. Esalakini nepenen.

Abu Edeke kolimok Noa ebe elosete iboro lu aismamaun. Abu ngesi kiyuu ngun. Ianyu? Abu Edeke kolimok Musa ebe elosete iboro lu aismamaun. Abu ngesi kiyuu ngin. Abu Edeke olimok ikiyakia icebora lualosete aismamaun, "Kolototo kuju ngina Pentekosit kosodete aidareun." Apotu kesi kiboikinos cut ngina. Eebo, ipa. Eebo.

79 Kwana, aijen, kwana, mere aijen naka akwap, konye erai aijen nakotoma Akuj. Ido aijen nakotoma Akuj, nakeraar Edeke esusut loka aijen, ido Edeke nges Akirot, ido, kijaatar ijo aijen nakotoma Akuj, iyuuni ijo Akirot, ido itetemi ijo idiobore kere kede Akirot.

Ido akirosit na naka esolo naajaun ekanisa toma, arai ajaun eong toma. Abu ediopet kotoma otunga apak adiopet, kotoma apupio naka emusago, alimok eong. Ebala, abala eong... "Mam kes apedorete adumun idiobore yenaronon." Kosodete bobo kesi ageun ai...

Abu eong atema, "Eebo, akepolou, arai emamei ibore yenerono, inyobodo mam ijo ibonguna kauka?" Ianyu? Ianyu? Kasodi eong alosit ngaren, alimonokini nges nuikamunito Nuiwadikaere.

80 Abu ngesi kotema ebe, ekesa loti noi kede esigala kotoma akanike, abu ngesi kotema ebe, "Ejakait Branham, arai eong ekesisian loka Ebaibuli."



Abu eong atema ebe, "Eyalama eong apupun ngun."

Abu ngesi kotema ebe, "Kwana akoto eong ajenun nuerai aijangaina na, itataci ijo isirigin kanuka itaabala kalu luijukanari ijo kinga, aijangaina ngin naka ailipanakin itaabalan kosodi aijukar kes kinga, 'igoen ngul luinyonyoikinitai,' 'igoen.'" Abu ngesi kotema ebe, "Aso bodo itelem isirigin kanuka ngul."

Eong ebe, "Mam, ipa. Emamei etiai kanuka ngin."

Kosodi ngesi atemar ebe, "Eebo, kotoma aijangaina kana

Abu eong atema ebe, "Inyarit ijo ngin ebe aijangaina, lokapolon. Abu ijo kolimokinite eong idakikan idis kau ebe irai ijo ekesisian loka Ebaibuli."

Ebala ebe, "Arai eong."

81 Abu eong atema ebe, "Kotakakinai eong Aswamisio 19:11." Aijen! Abu ngesi isipok akekuan toma ngin, abu otam aijulakin einer. Eong ebe, "Aso do otakak eong Yokana 5:14." Mam apedori aswam ngin. Abu eong atema ebe, "Kosodi Yakob 5:14." Mam nges apedori aswam ngun. Abu eong atema, "Ijo ijeni Yokana 3:16?" Ianyu? Aijen, acoa, akwap! Konye apak...

Abu ngesi kotema, "Konye, Ejakait Branham, itamit ijo aitem akiro nu kede Ebaibuli. Itamit isio aitem ngin kede ikisila luka akwap."

Abu eong katema ebe, "Ipa, mam kereka ikisila luka akwap epesikinitai toma Obaibuli? Akepolou erai do naedolit," Amen!

82 Abeit cut.

Aijen; mere naka akwapin. Aijen nakomoyo naka Akirot, aijen nuabala Edeke, aswam nuabala Edeke, edolit ngin. Ido arai ijaatar ijo ngin ido kopedori aiyuun iboro kere, ebe erai Nges ngopengol, ido iboro lu kere luinera Akirot eraas abeit, ibongokini ijo nginikirot kede "amen." Edolit ngin. Iyatak ngun neejai aiyuun. Edolit ngin. Eebo.

Arai ketam idiotunganan alimokin ijo, ebe, "Atwania Ebaibuli Akepedor. Emamei ibore ngin ebe aibatisao naka Emoyo Lokalaunan." Huh-hu. Mam iyatakini ngin. Mam ebuni aswam. Ebuni adotor. Kwape bala ainamakin elupe neejai amoru, mam epedori aibwo. Ebuni adoere.

83 Kosodete itunga alimonokin yes ebe, "Mam epedorio amunokin Ebaibuli lolo. Kocoite do kwana. Mam ilosi aiyuun ngun. Mam epedori araut abeit." ipupununutu yesi ngun apak kere. Alimununeta, "Mam ijo ipedori amunokin Ebaibuli." Kwana, arai-arai kijaatar ijo aomisio ngun, mam itami aiyatakin ngin, naarai mam ebuni aswam. Ibiror aduketait kere kanepakanen cut.

Ekoto ngin ipucaj kede Emoyo Lokalaunan. Apeleikinit eong ebe aimakakin nepepe, esimit loipucakini ngin. Ido ibore ngipengin yenipucakini ngin...Ijenete yesi erot...

Amopiira naidoritai kede ike iboie aojau adepar namojong nainamakitai eituli. Amwanis adio adolokin amopiira, ibore yenisodit yenijeni ijo, ainakin amopiira ngin amwanar mot, akerit esipiidi mot, ido ebuni atakar awai. Eebo, ipa. Ianyu?

Ido ngin nges ationis kede itunga luipu lolo. Etamito kesi ainamakin aijenekec neejai aijen naka akwap, kede emiina edio loka akwap, ido, nakeponiata aitemisio, "Eebo, aticepak abu eong ebucarite." Ianyu? Kosodi ekwam anyoun, kouori ijo kotoma odakikan idis. Elulukon ka asomanar kuju ka kwap mam abu kismawau idiojokis. Koanyunete itunga ijo ibongori bobo toma orit bobo. Ianyu? Edolit ngin.

Konye arai kisalal ijo ngina kede amwanis nailosikina naka Emoyo Lokalaunan, kiton nakitaraunia Ngol ijo kede amopiira ipe. Ikoni nen. Ijo kede amopiira iraunos ipe. Nakibunio ijo aibo kangina kiton ijo ka nginisumunet kere naka Edeke araun ipe, kwangin iyatakini bodo ijo neejai aiyuunikon. Arai mam, mam iyatakini ngin nepepe.

84 Ibala ijo ebe, "Mam Akirot epedorio amunokin." Mam itamakini aiyatakin ngun.

Ibala ijo ebe, "Aisumunet na kane naka aibatisao naka Emoyo Lokalaunan, arai bon kanuka ikiyakia itomon ka luaarei," kwape ebalatar icekanisan lolo, mam itamakini aiyatakin ngin. Nen nges ejai apetetaitekec, ebiroros kere, enomi kede engoti, amamei ajokis. Kwana, "Kanuka ikiyakia itomon ka luaarei bon, itomon ka luaarei bon."

85 Ajai eong kwap laiije neejai Onac Wright...Aomit eong bala ejaas kesi kau ngina nenice. Akuar adiofet, ajai ejaanakinan kwap ngina, ajai eong einer, ikalimonokinak iwongon arai ikany nepepe. Abu ekalimonokinan lo konyou kuju kosodi atemar, "Kwana, akoto eong alimokin yes itunga luminan icebore. Oo, aomit eong bala iras yesi itungan lukajokak."

Aso, Junior Jackson, kokau kangina, arai angetakin einer ngipengim. Kosodi ngesi atemar...ajai alimonokin nuikamunito asianut naka Edeke. Oo, ikatunga!

Amwanikit nges, kidarite. Abu konyou kuju ngina ido ajai ngesi atamit amisiikin. "Kwana, akoto eong alimun ebe Ejakait Branham lo, alimokini eong yesi, erai lokasurup loka Kristo." Kosodi ngesi alosit ngaren koipone kangol, akuar kere.

Apotu ice kotoma ikalimonokinak ogeutu...abu eong atema ebe, "Idareutu mot. Kwana, mam ilimunete idiobore, inacan. Ejai ngesi ediopet bon ka atukosiwok." Abu eong atema ebe, "Kojalakisi nges ajalakin kwana. Abu ngesi kalem eong." Abu eong akoto ngin, eong da elopet, noi noi, mam eong abu ajeni nuabeit aswam. Ianyu?

86 Aso, abala ngesi ebe, "Erai Ejakait Branham lokasurup loka Kristo," kosodi ngesi alosit ngaren einer ngun nginibore kere, ijeni ijo, nepetai...Abu ngesi kotema ebe, "Ebala ebe nen, 'Aibatisao naka Emoyo Lokalaunan.'" Ebala ebe, "Abala Ebaibuli ebe ajaas itomon ka luaarei bon luapotu kodumutu Emoyo Lokalaunan." Einer nuka aitangal naka Edeke, "Ikiyakia itomon ka luaarei bon ajaatar aitangal naka Edeke." Abu kotema ebe, "Kinerja oni nekinerar Ebaibuli, ido kililingi nekililingitor Ebaibuli." Abu eong edar kiton neageunia amaran adaun nepetai atutubet naka esawa.

Abu eong katema, "Kidareu mot. Abu eong ewadik luipu noi ne," abu eong atema, "koinakinai eong arereng abongokin ice." Ido neanyounia eong aibwo, abu eong atema ebe, "Lokapolon, abala ngesi ebe 'enera ngesi nekenerar Ebaibuli,' ido eswamai ekekanisa ngun, 'ido ililingi nekililingia Ebaibuli.' Iraas yesi kere ikajenak. 'Ebo,'" Abu eong atema ebe "Kwana, abala ngesi ebe 'Araas ikiyakia itomon ka luaarei bon apotu kodumutu Emoyo Lokalaunan.' Abala Ebaibulika ebe ajaas akwatat akaisaarei, ainomaret nasodit." Amen! Ocaka kinga eipone loka aijen kangin, itei ijo, naatamit ngesi.

87 Abu eong katema ebe, "Aso aomit do eong ebe mam Paul abu kodum Emoyo Lokalaunan konye kobala ngesi ebe abu kodum." Ianyu?

Abu eong katema, "Kalaije kotoma...Neabu Pilip kolosio laiye kosodi alimonokin neejaas Isamarian. Ebatisatai kesi kokiror loka Yesu. Emoyo Lokalaunan bon, nges mam adoikinit kes. Kosodete kesi aijukar ka alemun Petero ka Yokana, luapotu kopotu kosodete aidokonokin ngul akecekanin, kosodi Emoyo Lokalaunan adoikin kes. Aomit eong ebe eraas ngul itomon ka luaarei bon?"

Abu eong katema, "Kotoma Aswamisiso 10:49, nakejaar Petero kuju naka atunuru, kosodi adumun aitapoet alosete kesi neejai Korunelio. Naperoko inera akiro nu, kodoik ngul Emoyo Lokalaunan lukeirarete Akirot." Eong ebe, "Eroko Ebaibuli inera. Aibo ejai ekonikanisa?" Abongo kau nebeit ajaut. Edolit ngin. Ianyu?

Abu eong katema, "Aitangal naka Edeke, ibala ijo ebe, 'Itomon ka luaarei bon kes ajaatar aitangal naka Edeke.' Abala Ebaibuli ebe abu Sitepan kolot laiye Samaria airenganar ajokin ido kitangalei lukadekak, ido ajai aiyalama naepol toma oibuga. Ido mam nges arai ediopet kotoma otomon ka luaarei. Mam nges arai ekiyakia. Arai ngesi edikoonit." Amen. Amen.

88 Abu eong katema ebe, "Ido mam Paul arai ediopet kotoma otomon ka luaarei luajaas agoola nakokuju, ido ajaatar ngesi ainakinet naka aitangal."

Abu eong katema ebe, "Kosesen ber ijo ainakineta nuka aitangal! Kosodi alosit ngaren, ikar akaisauni ekaulo, aroko ngesi ajai neejaas Ikorinton, inyonyoanakinai ainakinet naka aitangal toma Akuan naka Kristo," Oo, ikatunga!

Kwana, eipone loka aijen kangin naisisia ijo koitabo ece, ekoto ijo acakar awai toma abagubagu naka agasia. Kobua neejai aijen na. Neabalar Edeke ebe, "Ngesi ngopengol bian, lolo, ka ikar kere," kotema, "Amen." Eebo, ipa. Eebo, ipa. Mere neejaas itomon ka luaarei; erai kanuka itunga kere. Kidum ijo eipone loka aiyuun kwape kangin, nakebongokina akoniyuun ngin, nginitutubet, kede "amen," itemari do ijo ebe, "Eebo," iyatak ngin tomake.

89 Iwongonikini. Ibuni oni aisuburikin, naarai ajai bon eong...Erai ibore yenejijim aibwo kane kosodi einer nuka ngin. Amen. [Kotemari onac ebe, "Inumunumi isio ngin."-Ekewa.] Eebo. Iwongonikini...Eyalama.

Iyatak "aitikokina." Oo, ikatunga! Idol oni neejai aitikokina. Kwana, ijaunos ijo kede aiyuun, nasodit; ejai ber ijo ajaun kede ngin, ageunia. Kosodi do ijo aiyatakin ajokis toma aiyuunikon, arai erai eipone loka ajokis nakabeit. Kosodi do ijo aiyatakin ajenun, arai erai eipone loka aijen naedolit. Kwana ilosi ijo aiyatakin aitikokina.

Aitikokina mam erai akepolou, "Apalar aimat ajon," kane, da. Mam, mam. Mam aitikokina erai akepolou angaleun kotoma aimat ajon, mere kotoma adoketai kana. Erai na aitikokina naka Obaibuli, aitikokina naka Emoyo Lokalaunan. Erai ngol ediopet kotoma omielasinei luka akuan, konye inera oni nuikamunitos aitikokina naka Emoyo Lokalaunan. Erai akepolou eipone loka aidarit angajepekon, mere araut ikadedeon;

eipone loka aidarit anyunyurakon, mere arwaanar ngolisawa lokinerakinotor idiotunganan kede ijo. Oo, ikatunga!

90 Esapat, luipu kotoma kaoni ilosi araraar eroko oni egeunia, mam oni iraraar? Ianyu? Kosodete aumokin ibore yenemameor Edeke kotoma Okanisake, iswamai nukapedor ka iboro luatapit kes aswam. Eebo, ipa. Ianyu?

Iyatak iboro lu. Aiyatakin atikokina tomake. Oo, aitikokina, eipone loka abongonokin kotoma amin nakilimokinere ijo kede adedeng. Etema icetunganan ebe, "Yesi atukos naka lukalaunak luibelibelos kangina!" Mam isomun kosodi aidol akonikanin nuka esaati kwana. Ianyu? Mere ngun. Konye kiner kede amin naka ayongit Edeke, aitikokina, amin. Biai erai kereka ngol eipone loikotor ijo ajaun? [Kotemari atukos ebe, "Amen."-Ekewa.] Kisekiseki ijo, mam ibongokini. Koraun Ngesi aanyunetekon.

Neatemariata kesi ebe, "Arai irai ijo Okoku loka Edeke, ibelok amoru nu araun atap," ti Nges epedo aswam ngun, kosodi aitodiar ebe arai Ngesi Edeke. Konye ajaatar Ngesi aitikokina. Nakenyariata Nges ebe, "Ebelesebul," Abu Ngesi kotema ebe, "Etimi Eong yes kanuka ngun." Biai ngin edolit? Apotu iriununu amasiribunuKe koreeteKe, kosodete aimuanakin Nges aimul, kobalas ebe, "Kodok kwap komusalaba!"

Abu Ngesi kotema ebe, "Papa, itim kes. Mam ejenete nuiswamaete."

91 Nakejaatar, Ngesi kede ainakinet, ajeni iboro kere, naarai tomaKe ajai aleleba kere naka Edekeone kotoma akuan. Apotu kesi koanyunitotor Nges iswamai nukapedor, koipone loka alimonokin itunga ibore yenarono kakes, kaceda koipone kangol. Apotu koenikis aidipaacit akouKe koipone kangol, akonyeKe, kosodete ainom Nges kaju akou kede ebela, kosodete atemar, "Kodwar, kolimokinai isio ingai kinom Ijo. Kiyuuni isio Ijo." Ianyu? Ajaatar Ngesi aitikokina.

Kwana, kidum ijo ngin koipone kangol, iyatak ngin toma aiyuunikon. Arai ibwanga ijo kosodi adedengar, ka ecelet, kosodi amumwor, kosodi alosit ngaren, huh-hau, imammeotor ijo adio...Mam ijo ipedori aiyatakin ngin, naarai mam epedori aiyatakin. Ianyu? Mam epedori aikamakin. Mam ijo ipedori alemun atutubet naka amopiira, ijani ijo, kosodi aimakakin neejai atutubet naka aswat. Mam cut epedori aswam. Mam, ekoto ononok, kwape enonokiar amopiira. Ianyu? Ido nakeraunotor aiyuunikon ka aitikokinakon eipone ediopet loka aitikokina naka Emotylo Lokalaunan najaatar Ngesi, akepolou aikamakin do kede Nges. Iyatak do ijo tomake.

Nakeraunor ajokisikon kwape Akejokis, iyatak do toma ngin.

92 Nakeraunor aijenekon kwape kaijeneKe, "Abunit eong awam akoteKon, Wu Edeke." Ianyu? Kede Akirot naka Papa, abu Ngesi kipiko nginijokit. Etuboros Akuj ka akwap, konye Akirot mam edaun. Ianyu?

Nakijaatar ijo eipone loka aitikokina kangin naedolit, kwape ajaatar Ngesi, ebuni aikamakin. Arai kimameotor ijo, kojaatar bon naiswamaunit etunganan atutubet, aiyuun naka emeret, arai aitikokina, "Oo, ti eong aibap nges acakakin kwap, konye-konye aticepak ejok eong mam aswam ngun, naarai eminas aibwaikin ekakiror apapula kanuka ngun." Mam ngin erai eipone loka aitikokina nainera Ngesi nuke. Mam itamakini aiyatakin ngin. Mam ngin epedori aswam. Konye nekipedoria ijo teni, kede ajijim kotoma otakon, aitim nginitunganan, ainapakin, ajalakin kotuboros, itei ijo, akepolou ikamakin. Ipedori do ijo aiyatakin ngin toma aiyuunikon. Wau!

93 Komam abunonokin nges ekadadar ekanisa. Biai ngin mam edolit? Komam abunonokin. Ti eong atema ebe, "Kitoronokinos kibatisaunos, abala Ebaibuli, Kokiror loka Yesu Kristo." Ido mam loericit Tiriniti iyuunit ngun, ebala, "Lokasurup ngol loka Kristo. Erai ngesi loka Ekiror loka Yesu. Erai ngesi loka Jesus Only." Kokweny, esapat, mam eong ajeni nuikamunito atikokinakon kwape kwana. Ianyu? Inyobo mam ijo ibunio, kobala ebe, "Amorata nepepe, Onac Branham. Epuda eong apupun Na itetemunio"? Ianyu? Kosodi abunore lailo kosodi apupokin Ngin. Kosodete ngin aibwaikin ngarenakon, kosodi ijo anyoun alosit; ibuni oni-ibuni oni adolokin toma ngin kotoma odakikan idis, toma "ayongit Edeke," itei ijo. Konye nakirwaaror-nakirwaaror ijo, ikoto ijo adoenen toma angetanakin akiro kere, huh-hu, mam erai ngesi ngin. Ianyu? Mam ijo idumunit aitikokina naka Ebaibuli nges kereka iswama ijo ngun; eipone loka abongonokin akiro. Ido arai ijaatar ijo nu kere, ipedori do ijo aiyatakin na toma aiyuunikon.

94 Aso, akaulo kangun, iwongonikini, ekoto ijo aiyatakin atitingikin toma aiyuunikon. Arai kijaatar ijo aiyuun, "Iswamai ngin atitingikin," abala Ebaibuli. Ianyu? Aso, na nges atitingikin. Kwana, ngin nges ibore yenetupakini yenelosi adukun ejautene lo. Ijani ijo, ejaatar Edeke iboro lutwasama obe kotoma aduketaitiKe.

Itei ijo eipone lokikadadar oni, onac, inac? Ianyu? Itei ijo inyobo, kijai bo oni ai? Eebo, ipa. Ianyu? Kijaar oni aibuses, kijaar elulu ka iboro, naarai kijaar oni aiyuun. Konye nakibunio oni kwap neejaas iboro lu kane, mam Edeke epedori adukun oni toma ojautene ngol. Ianyu? Mam Nges epedori. Mam Nges epedori adukun oni kiton oipone loka aiboisit kangin. Kijaar oni iboro luce lu kere. Ibironor oni, ajeretana kede ngin. Ianyu? Mam Nges epedori adukun Ekekanisa.

95 Atitingikin kede inyo? Eipone enyoin loka atitingikin? Ibore yenisodit, nges ajaun kede atitingikin kede Edeke. Arai kijaatar ijo aiyuun obe nakabeit, ijaunos ijo kede atitingikin nakabeit, naarai aiyuun iswamai atitingikin. Kelimu Edeke idiobore, kiyuu ngun. Odaun. Kijaatar ijo atitingikin.

Atemar ebe, "Eebo, abu eong elip Nges akuar natubor aitangaleun eong, konye aroko eong adeka kwape kwangin atupuruc na." Oo, ikatunga! Atitingikin anyoin?

Abu Edeke kolimok Aburaam, ido ikar akaisarei ka lukany ekaulo amamei ber aanyunet karaida adiopet. Aroko ngesi eyuunit. Atitingikit ngesi kede Edeke. A-ha.

Kibwaik duc Nges ngarenekon. Koraun Ngesi ibore yenetupakini koingarenekon. Mam ijo ipedori atubor ailany Nges, aso koric Nges koingarenekon. "Abala Ngesi kwangin, ido elosi aiswamaun." Ianyu? Koric nges koingarenekon. Edolit ngin.

96 Ajaatar Noa atitingikin. Eebo. Ajaatar Noa atitingikin obe, naka Edeke. Abala Edeke ebe, "Alosi eong amudiar akwap na kede edou," kosodi Noa alimonokin adaun ikar akwatat akaisaarei. Atitingikin naepol. Mam karaida akopio apotu kodoutu kotoma Akuj. Amamei idiobore. Kopurie akwap noi kwape lem sek, adaun ikar akwatat akaisaarei, konye kotitingikite ngesi.

Aso, igimori Edeke atitingikinikon. Edolit ngin. Etemi Edeke kes.

Akaulo naka Nges alimokin Noa, kwana abu Ngesi kotema ebe, "Noa akoto eong ijo alosit ngaren kosodi alomar toma ataker. Alosi eong aitekerun itiang toma ngina, ido akoto eong-eong ijo alomar toma. Kodoka kuju agoola nakokuju, kwana, tetere ijo ipedori asesen kinga, kodirisa lokuju. Kwana, akoto Eong ijo alomar toma ngina. Akoto Eong ijo alimokin itunga lu, 'Moi, nualimonokini lem Eong ikar akwatat ka akaisaarei, elosete aswamaun.' Eebo, kolot ngina kosodi alimokin kes."

97 Anibo arai aanyunet nasodit? Abu Noa koloma toma ataker. Amamei edou. Abu Noa okapanakin, kosodi alemun ekooti loka edou ka nginibore kere, tetere nges epedori asesenia kinga, motimot. Okapakin. Konye apak natupakini...

Eyuunit eong ebe aticepak abu ngesi kolimokite ekaleke, ka angor nuka ikedwe ka ngul kere, ebe, "Oo, ikatunga! Moi ilosete yesi aanyun icebore yenimam yesi kianyunitotor. Naarai, kotoma akuj kere, elosi airionor. Ka eires ka aimilianun elosi aiswamaun. Elosi ekileng looti loka Edeke akerit kotoma akuj. Elosi Ngesi atubokin atukos na naka ikadiakanarak luangerokisi oni, adaun ikar lu akwatat akaisaarei. Koseseniata kosodete aanyun." Ianyu?

Ice kotoma kakesi eyuunak lueraas atutubet, ijene ijo, luilelekejaete ido komam elomunete toma, ijene ijo. Iroko yesi-yesi ijaatar kes, ijene ijo. Aso apotu ngul kopotu, kosodete atemar ebe, "Eebo, epedori kereka epolon lo kodolite, aso ibuni alosit kuju kasodete aiderekin apaarasia adis, arai aidarekin isawan idis tupuruc, kasodete aanyun."

98 Apaaran natupakini, aiboisit naka edou loirionon, kolomuni akolong kwape kalomununia lem. Abu Noa kongolia kinga. Ebal, "Ijoba, emamei edou edio."

Konyouni ekesa ngol kuju, ebal, "Ah, ajeni eong ebe irai ijo ediopet kotoma kakesi. Itei ijo, iboiete yesi kokuju kane."

"Eebo, kitimoi eong, ipa. Ha, ha. Aticepak abu eong-eong-eong, ijene ijo, abu eong ekamar, ijene ijo. Esubit bala, itei ijo. Ha-ha-ha."

Konye, Noa, ajaatar ngesi atitingikin. Ebal, "Arai mam ebuni lolo, ejaun moi." Inyobo? Abala Edeke kwangin.

"Iworibo alimokin Ngesi ijo ngun, Noa?"

"Ikar akwatat akaisaarei kau. Abu eong aojau na kere, aso edarit kwana eong kane." itei ijo ngun? Akaulo naka apak naedit...

Idumuni oni ebe, abu Edeke da aojau na kere idarit Ekanisa, konye ebuni adolare ngina. Mam ipodo. Abu Ngesi kisumunikite Ngin.

99 Edar apak na kere kanuka ajarun. Ebuni ajaun. Mam ipodo. Abu Edeke kisumunikite ngin. Kidareu kede atitingikinit. Kijotoor ijo, mam ngin ebuni...Aticepak iyangaikini ijo ipak edit ijotoi komam iswamauna, konye ikwenyuni ijo kotoma apak ngin. Esumunikit Ngesi ngun, itei ijo. Apak, itei ijo, nainyarit oni ebe apak naka ajo nuka atwanare, ijene ijo. Nakinyarit oni ebe atwanare, apak adio naka ajo, araibo ajo kotoma Kristo. Emamei ibore ngin ebe atwanare kotoma Kristo. Aijar kede atwanare mam eupasi nepepe. Ianyu? Iyangaikini bon oni apak naka ajo, ajo numam ipaperowok epedorete aiworoun oni kotoma. Erai Ngesi bon epedori aiworoun. "Ebuni Ngesi aiworoor, ido abuni eong abongokin Nges," abala Yob. Ajaun Yob ejotoi kwana adaun ikar ilukumin iwongon. Mam ipodo. Ebuni ngesi-ebuni ngesi anyoun. Mam ipodo, eroko ngesi

idarit.

100 Abu Noa kidar. Kotubor apaaran nakiwongonet. Emamei edou. Mamace. Elosi aiswamaun.

Apupi eong Amucalat Noa ebuni kosodi atemar, "Papa, abeit cut ijo-...?"

"Mam inera kwangin."

Ajaatar ngesi atitingikin, naarai ajaatar ngesi aiyuun. Eebo, ipa. Ajaatar ajokis, ajaatar aijen ebe adolit Edeke. Ajaatar ngesi aitikokina. Mam nges abu korieng, atemar, "Eebo, mam eong ajeni nueraas ngun kere. Atwania eong ajenaraka kokinga kangina." Mam, mam. "Mam bobo itunga epodokitos nuka. Alosi kwana kinga ngina kasodi ageun kere, nutetiak bobo." Mam, mam. Ajaatar ngesi atitingikin. Abu Edeke kisumunikite. Ebuni Edeke aswam ngun. Ebuni Edeke aswam ngun, naarai abu Edeke kolimunit kwangin.

101 Ido aseseni eong okokuke ebuni, kobala ebe, "Papa, ijeni lem ijo..." Aidokokin akekanin kuju akuruoke, ijeni ijo. Irai ngesi lokapolou naka ikar akwatat akaisaarei, ijeni ijo, iboie kangina. Ebala ebe, "Ajeni eong ebe irai ijo ekimat loimojongit. Amina eong -eong ijo, papa. Konye biai epedori kereka korai ebe abu aticepak ijo ibucarite?"

"Oo, mam. Mam."

"Inyobo?"

"Abala Edeke kwangin!"

"Eebo, papa, apaarasia nu akanykape nukiboio oni kokuju kane. Aiboi kokuju kane kotoma ataker kana nati, naemojongit, koonite aiboi cut kane. Ido ipucitai kere, toma ka kinga. Ido ijaun oni ikar lu kere aiduk ngin. Ido abu ijo kobwo kokinga kangina kosodi alimonokin, kiton ijo itim aijulakin akwangiar ka aikolocar. Ido ijai ijo ne kuju kwana, kotamite alimun ibore yenikoni ne. Ido ejaas itunga akena, ido kocakanakinite enyaanya loebosit ka iboro amarana nuka ngin. Ongolia ber ijo ngina nuejaas kesi aswam. Inyobo, ijeni ijo..."

"Otitingor, okoku."

"Abeit cut?"

"Ebuni aitep!"

Abu aberu naka okokuke kotema ebe, "Papa, ijeni ijo..."

"Ebuni aitep!"

"Konye ijaun oni ikar lu kere, kidarit. Ijaun oni ikapanakin. Ido abu ijo kolimok isio ebe ebuni aitep, esabiiti kau. Ido ijai oni toma ne, ido ikekia kere egolol, ido oni lu ne irimirimei toma ne, ido kiliacai akolong kokinga kwape lem ajaar."

"Konye ebuni aitep!"

"Ijenuni ijo biai?"

"Abala Edeke kwangin!"

102 Kwana, kidolok ijo nen, iyatak do ngin. Konye arai mam ijo idumunit koipone kangol, mam-mam itamakini aiyatakin ngin. Mam epedori aswam kotoma aitangal. Mam epedori aswam kaneejai idiobore kere. Ianyu? Ekoto inyalakinos cut toma kede ibore yeninyalakinitai ngin toma. Edolit ngin. Ekoto aiyatakin ngin. Atitingikin aisumunet. Eebo, ipa. Abu Noa kiyuu ngin. Ido ajaatar ngesi atitingikin kede Edeke, ikar akwatat ka akaisaarei.

103 Musa, ajaatar ngol atitingikin kede Edeke. Eebo, ipa. "Musa, apup Eong aimony naka ikatunga. Aany da icanikec. Abunit Eong kwap alakun kes. Alosi Eong ajukar ijo ngina."

Kosodi epeget edio kangina kiding nges ka Edeke, kosodi Edeke aitodikin nges Akeibuses. Ebala, "Alosi." Neanyunia ngesi aibuses naka Edeke, itei ijo, ajaatar ngesi aiyuun.

Ebala ebe, "Inyobo ngin ejai akanikon, Musa?"

Ebala ngesi ebe, "Ebela."

Ebala ebe, "Kocakak kwap."

Kibelokin araun emun. Abu ngesi kotema ebe, "Oo, ikatunga!" Kogeuni ngesi...

Ebala ebe, "Kolem ngol, Musa. Arai apedorit Eong abelokin nges araun emun, apedori Eong aibelokin ngol anyakar bobo."

Ah! [Ibapakini Onac Branham akekanin irwanauni-Ekewa.] Amen! Arai epedori Edeke ainakin eong aijar naka akuan, epedori Ngesi ainakin eong Aijar nakomoyo da! Arai epedori Edeke ainakin eong aurio nasodit, epedori Ngesi ainakin eong Aurio nakiareit! Amen! Arai epedori Edeke aitangaleun akuan na, kede aitangal naka Edeke, epedori Ngesi aitajaruun ngin bobo toma AibusesiKe, kotoma apak nakawasia. Edolit ngin.

"Apedori Eong acakakin ebela lo kwap kasodi aibelokin aitarauun emun. Apedori bobo Eong ainyakar ngin araun ebela bobo. Kolem ngol kokori."

Kolur Musa kwap kosodi alemun ngol. Koraun ebela. Ogeuni ngesi aiyatakin aijen kanen. Ianyu?

"Inyobo ationis kede akonikan, kwana, Musa?"

"Emamei ibore."

"Kidokok ber ijo atorobuko."

"Eebo. Dobodo..." Okwang kede atapon. "Wu Ejakait, koany akakan!"

"Inyakak ngin atorobukon, Musa."

Kinyakakini ngesi koipone kangol, abu ibelokin araun bala...Kogeuni ngesi aiyatanakin kes koipone kalo, aso, itei ijo. Eebo, ipa.

104 Abu ngesi kodol kwap laiije. Ido ibore yenisodit...Abu ngesi kodol kwap laiije. Abu kolom kangina kosodi atemar, "Ebala Ejakait Edeke ebe, 'Kojalak Ikatunga kolototo.' Parao, akoto eong ijo ajenun na, abunit eong kwape ekabwoikiniton loka Edeke. Ibusakinit ijo arimar eong."

Abu Parao kotema ebe, "Arimar? Ijeni ijo nuarai eong? Arai eong Parao. Arimar ijo, kwape ebulesit?"

Ebala, "Ibuni ijo arimar eong, arai mam imudiar. Ibuni ijo aswam adiopet naikoto ijo." Inyobo? Ajeni ngesi nuajai einer. Ajaatar ngesi ayakian. Ajai ngesi kwap ngina. Enerakina ngesi kede Edeke. Ajaatar ngesi aiyuun. Ajeni ngesi aiboisit naajai ngesi toma.

"Ikoto ijo eong arimar ijo? Konyou kane!"

"Etodikini eong ijo."

"Kitodikinai eong aanyunet."

Kocakakini ebela kwap; ibelokin araun emun.

105 Inyobo," abu ngol kotema ebe, "icoa ngin yenididi yenepatana! Kobua ne mot. Kobua ne, Yane, ijo ka Yambure, kocakakisi ibelaikus kwap." Kocakakinete kesi ngul kwap, kosodete aibelokin araun imunuo.

Ebala, "Kwana, ijo ibore yenididi, kobua kwap lailo neajai eong, etunganan loka Omisiri, Parao loka Omisiri. Ido ijo abunore ne kede icoasineikon ludidik, ace kotoma aingalakon," ijeni ijo, aisiom aomisio. Ijeni ijo nuapeleikinit eong. Amuno eong ebe ijai ijo aisiom nuikamunito ngin. "Aijangaina naka akou arai icebore, itei ijo, eebo, abunore lailo kede ice kotoma kangul." Ebala, "Eebo, ipedori isio da aswam ibore ngipengin yeniswamai ijo."

Inyobo arai Musa? Mam nges abu kotema ebe, "Oo, Ejakait Parao, kitimoi eong-eong, ipa. Abuni eong araun ebulesitikon," Mam ipa.

106 Abu ngesi kosalak esipo. Amen. Kosalak cut nepenen. Abala Edeke, amamei abunokin kotoma otauke, "Inapakin. Etodikini eong ijo icebore." Kiswamate ijo cut bec nuabala Ngesi ijo aswam, asubit bala amunaar; kosalak ibwoi, kotitingior.

Abu Musa kotema, "Ijeni ijo, apak neaperio eong kotoma apetetait kangin, ajai atitingikin epesikinitai ngina, aso abuni eong atitingikin kasodi aanyun nuebuni Edeke aswam."

Kagina ajaas imunuo, eliaete irimirimete, okusete ekwam, kounyasi neejai idiopet kayenice. Ibore yenisodit yenijeni ijo, abu emun loka Musa kolot, hap, hap, hap," kosodi hap anyamar ngul kere adaun. Ajaatar ngesi atitingikin.

Ngul luidareunete Ejakait, iteteunete akecegogong,  
Eterarete abebenokakec kwape imorukaalen.

Biai ngin edolit? [Kotemari atukos ebe, "Amen."-Ekewa.] Ianyu? Eebo.

Ekerete komam epasete, elosete kakeje, komam iiloros

Itei ijo, kidareu Ejakait. Ojaun kede atiting. Ianyu?

107 Eebo, ipa.

Aso alosi Isirael aitonyounio kinga. Kobuni aitepegio nakapolon, kosodi Musa adareun.

Kosodi ngesi alomar toma amodingot. Erai nepetai alosit naka apaarasia auni arai aongon. Erai amairon akaisaongon anyoun kane abu ngesi kotubor ngina, cut laiije neapotu kesi kotuboros bobo. Konye, Moses, kotoma amodingot, abu kidar ikar akaisaongon. Atitingikin. [Okenei Onac Branham-Ekewa.] Amen. Edolit ngin. Abu ngesi kidar ikar akaisaongon. Oo! Eebo, ipa.

108 Ido ekoto oni ajaas kede atitingikin idiopet kayenice, da. Ianyu? Apak adiopet...Iraunun-iraunun oni lumam ititingikini idiopet kayenice. Kiomit oni ebe ebeit oni araut ka Musa. Ajaatar Musa atitingikin kede itunga. Koany, ngin nges ainakini kes etuboros. Ianyu? Arai itamit ijo aswam icebore...

Bala, atam eong ayangaun Aisiraret na kotoma okanisa, kanu aanyun ebe nginimeeba eraun Nu. Etiono aswam ngun. Atam eong ajaut kede atitingikin, eraas kwana lu ikar akaisauni ka luuni. Ianyu? Kojaunos kede atiting. Eroko angor etubete ikecetim, eroko kwape kwangin. Konye kotitingor. Kidareu. Ejai ijo aswam ngun. Arai imameotor ijo ngin, mam itami aiduk toma na kalailo. Kojaunos kede atitingikin.

109 Karaida apak adiopet, neabu atukos ngin naka itunga kangul luaraas ikatepegak luamameotor kede eipone loka atitingikin, apotu ngul kiduposi Musa aswam icebore yenaronon. Konye, kereka, neadolokina aitodiar, abu Edeke itegata akeceswamasio. Abu ngesi kotema ebe, "Kotiakun, Musa. Abuni eong aiyar atukosikec, kasodi ageun natetet."

Abu ngesi ibirokin akidingos, kosodi atemar, "Edeke, mam iswamauni ngin." Inyobo? Atitingikin itunga luetepegete nges.

Mam eong ajeni arai ti oni kipedo aswam ngun? Arai mam ijo ipedori, mam itamakini aiduk toma kana, naarai mam ngin-ngin ijulakin, ijeni ijo. Eipone ngol aponi kimorikikinere losodit kotoma na, ido ngol nges eipone loebeitor nginidiopet kotoma kakesi aimorikikinio. Arai mam, mam ijo idolokini toma ojautene ngol loka aiboisit naiboio Edeke lokajaran, arai imameotor ijo atitingikin, atitingikin, idiopet kayenice.

110 Eebo.

Ajaatar idwe luka Iburanian atitingikin. Abeit, ajaatar kesi ngin. Esumunikit kes Edeke, alimokit kes, "Mam ikukonokinos adioput." Konye ajaatar kesi atitingikin. Ebalas ebe, "Epedorit Edekewok. Konye, ejaas ngun da, mam isio ilosi akukonokin akoniput." Atitingikin, kojenete na, ebe itonyouni Edeke nges kotoma apaarasia nukawasia bobo.

Mam ajar na epol noi, ejaas ber aceda. Ianyu? Itonyouni Edeke ngin kotoma apaarasia nukawasia. Konye nuikamunito akukonokin aput, mam isio ibuni aswam ngun. Kwana, iinakini isio ikaisaari luebeito ikaisaari, konye, needolokina ikaisaari atolitol Edeke, Edeke nges losodit.

"Abala Edeke ebe, 'Mam ikukonokinos aput ngin,' ido mam eong abuni aswam ngun. Epedori ekosideke alakun isio. Arai mam Nges alakuni da, mam eong akukonokin aput."

Ebala, "Eebo, eupa ngol."

"Eebo," abu ngesi kotema, "oo, aomit eong, ebuni aitep noi atibong na kosodi alemar ngin kere kinga." Konye mam abu kiswa ngin. Oroko etitingikit.

111 Atupuruc naatupakini, nakeyangaunere kesi ngaren naka ikootin, eboie Nebukadunesesar. Abu ngol kotema ebe, isap, yesi ikapakina aitun eong kwape ekabakakus?"

"Abeit cut. Kobusi, Wu ekabaka."

"Kwana okukokinos neejai akaput."

"Oo, mam."

"Eebo, ilosete yesi anokiar. Iraas yesi itunga lukacoa. Icobe yesi. Iraas lem yesi agangat naepol nekijai isio. Iraas lem yesi arereng neejai akabakanut. Mam yesi imisiikinitos ebe mam eong akoto aswam nu? Kwana alimo eong-eong alimoret kane, ido ebeit aswamao. Mam eong akoto acakakin yesi toma ngina. Oo, ikiliok, inyobo ationis kede yes?"

"Ajeni eong ebe epupo ngin ejok. Konye, epedori ekosideke alakun isio. Konye ejaas ngun da..." Ajaatar atitingikin.

Ogeunete alosit kuju amadala. Apotu kongolenikinos idiopet kayenice. "Eebo. Ejok." Ajaatar atitingikin. Apotu kolototo aikunyakinet adiopet, amamei Edeke. Aikunyakinet aarei, amamei Ngesi kangina. Aikunyakinet auni, aikunyakinet aongon, aikunyakinet akany, apotu kinyikokis alosit ngaren,

eroko Ngesi amamei kangina. Kosodi ngesi aicakakin cut toma oupa loka akim. Ajaatar kesi atitingikin. Konye ajai Nges. Ianyu? Akim naelosikina aidupudupoor kes, ainokar aeneta awai naka akaninikec ka akejekec. Ido nakedolokina ngesi kwap naka aipany, ajai Ngesi ngina. Ianyu? Ajaatar kesi atitingikin.

112 Daniel da koipone kangopengol. Ajaatar Daniel atitingikin. Abeit cut. Mam ngesi alosi apalun. Mam ipa. Inyobo abu ngol kiswama? Abu kongaa idirisan kosodi ailip, kwape kwangin. Arai ibore yenepuda Edeke. Ajaatar ngesi atitingikin. Abu ngesi kidareu Edeke, kojeni ebe apedori Edeke airic Akirotoke. Aponi kocakakinai nges abua naka ingatunyo, ebala, "Eebo konyamasi ijo ingatunyo."

Abu kotema ebe, "Mamace." Ajaatar ngesi atitingikin. Inyobo? "Eebo, edar eong Edeke, apak na kere. Konye karaida ebeit eong aidar ikar ice elukumit, anyouni eong bobo kotoma apak nakawasia. Aso, ajaatar atitingikin, aidar."

Ajaatar Paul atitingikin. Abeit cut ajaatar. Kosesen ber ijo nuabu koyangaik Paul aswam. Iner ijo nuakamunito atitingikin!

113 Dobodo itunga luka Opentekosit? Anyoun neajaatar kesi ayakian, "Kidareutu kiton," itei ijo, "Kidareutu kiton nakitanapere yes kede Apedor." Aojau anyoin? Amameotor kesi aingiset, "Aojau anyoin abuni ayangaikin?" Ajaatar kesi abongokinet, "Kidareutu kiton."

Apotu kesi kolototo kuju ngina kosodete atemar, "Eebo, isap aticepak idakikan itomon ka lukany anyoun kwape kwana ebuni Emoyo Lokalaunan ajaun tomawok ido ilosi oni ajaun kede aijaanakiniwok." Kotuboros idakikan itomon ka lukany, amamei itunganan. Kotubor apaaran adiopet, emamei; aarei. Auni. Aongon, akany, ikanykape, akanykaarei.

Ice kotoma kakesi epedori kotemaritos ebe, "Ijoba, mam yesi iomitos bala idau oni adumun Ngol?"

"Mam, mam, mam." Ikoni nen. Mam. Edolit ngin.

"Ekoto yesi alomun kinga, isap." Ebala ajokit, "Idautu yesi-yesi-yesi adumun nuipudas. Kolototo kogeutu aijaanakinikus."

"Mam, mam, mam. Mam oni idumunit, ber. Naarai, abala Ngesi ebe, 'Abuni ajaun, nuepote aiswamaun kotoma apaarasia nukawasia: Kede aituke nuemaramete ka aituke numo nges enerar Eong kede itunga lu, ido na nges Aiyengun naabu Eong abala,' itei ijo, Isaia 28:19" Ebalas ebe ngesi Ngol, idumunete yesi Ngol apak...Inyobo, ijenuni oni kedolu Ngol. Kijenuni oni kebu Ngol. Ijenuni oni, 'Aisumunet naka Papa.'" Kangina abu ngesi kidar adaun apaarasia akanykaongon. Kosodi do kotoma apaaran nakitomonet, "Ijai oni ngina." Ajaatar ngul atitingikin, kanu aidareun.

114 Kwana, arai kijaatar ijo eipone loka atitingikin kangin, akaulo naka Edeke ainakin ijo aisumunet ido iseseni ijo ngin kotoma Obaibuli, "Erai ngin naka," aso idareu. Aso, arai kijaatar ijo eipone loka atitingikin kangin, iyatak ngin neejai aiyuunikon. Kosodi aanyun eipone lokijaar ijo aikiar kwana? Ijai ijo adolokin kuju ne kwana. Eebo. Ejai esawa da airimonor, mam? Eebo. Eebo. Iyatak na toma aiyuunikon.

Aibwaikinit Nges ngarenekon duc, kiitunite, arai Ngesi abu kisumunik. Mam arai eong, nges abu esumunite. Mam arai eokon, nges esumunikit, Onacewok Neville. Mam arai ecejaanakinan, nges ebu isumunikite. Mam arai esasedoti ece arai ipaapa. Mam arai ediotunganan loka akwap. Arai Edeke nges abu koinak aisumunet, ido epedori Edeke aidar nginibore kere yenesumunikit Ngesi.

115 Eebo. Arai ijaatar ijo eipone loka aiyuun kangin, aijen Edeke loabu isumunik ngin! Ibala ijo ebe, "Onac Branham, adeka eong. Epuda eong angaleu noi." Kocam ngin. Erai ainakinet naeinakinitai ijo, eebo, ipa, arai ipedori ijo aiyuun. "Eebo," ibala ijo ebe, "Eyuunit eong." Aso kimurwok bodo ijo ngin. Odaun. Angetakin. Ianyu?

Kojaunos kede atitingikin, arai ijaatar ijo atitingikin. Arai imameotor ijo, ijai ijo apakar kaneejai Aduketait kane, itei ijo. Ebuni anangar nuce kwa kere kwap, ibore ngin idiopet. Ekoto ijo kojaatar ngin. Mam iyatakini ngin, naarai, ebuni amunaar aduketaitikon arai imameotor ijo atitingikin, arai imameotor ajokis kanu aiyatakin toma aiyuunikon naibala ijo ebe ijaatar ijo. Ido arai imameotor ijo adioyuun, kosodi aitam aibwaikin ajokis tomake, ebuni abilakin aiyuunikon kwap. Ianyu? Ibala ijo ebe "Eebo, kwana, kidareu mot. Aticepak erai na kere aibucaret, ejaas aceda. Aticepak mam Edeke erai Edeke. Aticepak emamei Edeke." Itei ijo, ebuni atiak ibore irwanaarei. Ianyu?

116 Konye arai ijaatar ijo aiyuun cut nakabeit, aso ibwaik ajokis tomake, kosodi aijen nakabeit, kosodi atikokina nakabeit. Ianyu? Ijai do ijo alosit cut kokuju naka ekokoro. Eebo.

Ikanyiikini, iyatak ayongit Edeke. Oo, ikatunga! Ebeit ayongit Edeke aiyatakinio. Inyobo apolou naka ayongit Edeke? Abu eong aanyana itaabon luiwadikatai apolou naka akiro (dictionaries) iwongon arai ikany ido mam ber eong apedori adumun akepolou da. Awasia, ajai eong okaleke Onac Jeffries ngina, apotu isio adumutu ngin kotoma-kotoma odictionary. Ayongit Edeke erai akepolou "aput kede Edeke." Oo, ikatunga! Akaulo naka ijo adumun aiyuun, ajokis, ajenun, aitikokina, atitingikin, aso oputokinos do kede



Edeke. Ijoba!

Ibala ijo ebe, "Mam eong apedori aswam ngun, Onac Branham." Oo, eebo, ipedori ijo.

Ber eong asiomak ijo Nuiwadikaere kane, ipak edit. Matayo 5:48. Eebo olem lo kosodi aanyun eipone loejaar, Matayo 5:48, kosodi aanyun eipone loebeitor oni aputokin bala Edeke. Ijeni ijo ebe ebala Ebaibuli ebe, "Iraas yesi idekesio." Abala Yesu kwangin. Inyobo? Ajokis kere, iboro kere luejaas neejai Edeke, ejaas tomakon. Matayo 5:48, "Koraas..." Yesu inera, kotoma alimununeta.

Koraunos luidolito, (Inyobo ngin?) luidolito kwape edolitor Papakus...lokotoma akuj.

Idol ijo kuju ne kwana, eroko ilipa ijo aswam ngun. Iboro lu kere ejai aiyatakinio ber nasodit. Aso nakidolokinia ijo kuju ne, elip Ngesi ijo kwana araut loidolit, ayongit Edeke, odwe lusap ka lupesur luka Edeke. Edolit ngin. Iboro luitia aii apedori ti eong alimun kowai kangol!

117 Apukosi ber oni Ipeson 4, kosodete aanyun kane inyobo, kotoma Oitabo loka Ipeson, inera nuka ibore kayen, da, nuikamunito eipone loebeitor oni-loebeitor oni aswam. Ipeson, esula lo 4, kasodete ageun okokoro lo 12. Ipeson 4, kasodete ageun kede ekokoro lo 12. Eebo. Ageutu okuju kane kokokoro lo 11.

*Ngol da abu koinak ice araun, ikiyakia; ka ice inabin;...*

Kiitu akuar naka bian? Mam itamakini ayangar eyapeesi loka etunganan ece. Ianyu?

*...ka ice, ikalimonokinak; ka ice, ikecokok...ka ice da, ikesisianakinak;*

"Aitodolikinio Edeke"? Biai ngin esioma kwangin? [Kotemari atukos ebe, "Mam."-Ekewa.] Aitodolikinio inyo? ["Lukalaunak."] Lukangai lukalaunak? Luitalaunitai. Amen. Ngul luapotu kokwap kane.

*Aitodolikinio lukalaunak, kanuka aswam nuka aijaanakin, (aijaanakin naka Yesu Kristo), kanuka adukio naka akuan naka Kristo (kanuka adukio, adukun Ngin, adukio): kiton...*

*Kiton nepekidolio oni kere oipeone loka aiyuun, ka...ajenun da Okoku loka Edeke, kiton nekidolio okiliokone loibecokino, kiton aitogogonget, (oo, ikatunga), kiton aitemis naka apolou naka aitekoro naka Kristo:*

118 "Aitekoro," eyangaikini ayongit Edeke. Ejai ijo aiyatakin toma aiyuunikon, ayongit Edeke. Itei ijo, egeuni ijo kokwap kane, kede ajokis. Kolosi do neejai ajenun. Kolosi toma aitikokina. Kolosi toma atitingikin. Kwana ijai ijo toma ayongit Edeke. Ayongit Edeke! Oo, ikatunga! Ejai apakiwok adaun. Aanyutu ber oni. Konye ijenete yesi apolou naka ayongit Edeke. Kiwo oni ekosio lo:

Aputokin ka Yesu, aputokin ka Yesu,  
Kotoma akwap epuda eong aputokin ka Nges;  
Kotoma alosit kere naka ajar anyoun akwap kiton aibuses  
Elipit bon eong aputokin ka Nges.

Ngin nges ayongit Edeke. Nakenomere Nges kosiep ediopet loka ereet, abu kibelok loce. Nakenerare erono kanukeng, mam Nges abu kiner. Mam nges abu kobongok. Ianyu? Ayongit Edeke, amoot duc idiopebore, "Eswamaenenei duc eong nuisialamikinitos Papa." Ianyu? Eebo, ipa. Duc. Ngin nge?s ayongit Edeke. Ianyu?

119 Akaulo nakidaunia ijo anyoun kane, kiton ne, kiton ne, kiton ne, kiton ne, kwana ijai do ijo adolokin toma ajautene loileleba kwana loka okoku loka Edeke. Konye ekoto ijo kojaatar na, imorikik nu kere, ido mam ber ijo ipedori agear da kiton ijo adumun nu.

Kwana kiitu ikweny yenirionon kede ajul nuka Peacock. Mam imurwokini ngol. Ianyu? Mam itami aiyatakin ngin kiton nakiurunere ijo cut abeit. Naarai, ijo, mam ngin epedori aswam, ido mam ijo-ijo ipedori ainakin ngin apedor aswam. Ebuni kiton neejai na, arai na, ibiror kanenice.

Konye nakidolunia ijo kwap ne, ajele naeuritai irwan nakiareit cut abeit, aso mam iyatakini idiobore. Ngin nges iyatakini neijai ijo, itei ijo, kobuni aikeun kuju,

120 eebo, abunore toma aitekoro kwana. Eebo.

Kosodi, naikanyetekape, eyatakisi, abala Ebaibuli kane ebe, aiyatakin amin naka einacane...amin naka einacane. Kwana erai ngin naejok, kanepokane cut, naikanyetekape, naikanyetekaarei. Eebo. Aiyatakin amin naka einacane, ibwaik ber ijo akonikuan aiboisitike, kotoma akirot. Kwana ibala ijo ebe...

"Kediaka onaceka kama ajai eong," abala Petero. "Etimi kereka eong nges," abala ngesi, "irwan akanykaarei apaaran?"

Abu Ngesi kotema ebe, "Akaisakanykaarei irwan akanykaarei." Ianyu?

Amin naka einacane. Kwana, itei ijo, arai ecetor onac kotoma okokoro, mam iraun yenimam ititing

kede nges. Ianyu? Mam. Ianyu? Oraun yenisiana mamake. Kolot, kwape kwangin.

121 Abala icetunganan, pac, ebe, "Eipone ali kipedoria ijo aiyuun iboro lu koipone kalo iswama ijo, ido oroko ilosenenei neejaas Assemblies of God, ka Oneness, kere luce?" Aso ibwaik, itei ijo, amin naka einacane. Ianyu? Ianyu? Komuno, acepaaran, itei ijo; atitingikit kede nges, itei ijo; aitikokina, angirikinit kede nges; aijen, amisiikin nuiyuunit ngesi, kiitu, ejai toma otauke, ngin nges erai; ajokis, kotomakon, ajalakin ngin kolom kinga kede asianut, aiyapaara, neejai ngesi; kojaas kede aiyuun ebe kapak ace eyangaun Edeke nges toma. Ianyu?

Amin naka einacane, ibore yenikanyetekaarei. Idiopet, iarei, iuni, iwongon, ikany, ikanyikape, ikanykaarei. [Kotironori Onac Branham abao irwan akanyaakaarei-Ekewa.] Itei ijo, ibore yenikanyetekaarei. Aso, kwana, ijai do ijo abunore.

Ibore yenetupakini, aso, iyatak asianut, naerai amin. Ngin nges amoru naegolokini. Adiopet kotoma apaarasia kanu, kotoma okanisa...

122 Kwana, ikatunga, kojenu kotoma ateepe, ka nginiboisit kere, mam eong ajai alimonokin na kwape aisisianakin, naalosi eong alimun kwana. Konye akoto eong aitodikin yes ngin, kede aingarakinio naka Edeke, ibore yenerai ngin cut abeit, ebe, Ebaibuli losodit Edeke aiwadik arai Zodiak kotoma apak. Egeuni kede abekot. Engetakini kede Leo engatuny. Ido neadolokina eong toma aipucet Naikanyetekape ka Naikanyetekaarei, ianyunete yesi ebe, neapukorere aipucet nace ngin, aanyunet naka Zodiak naka aibosit kangin arai engoti, agar naigiritai. Ido ngin nges atur naka engoti najari oni kotoma kwana, epukoritai. Ido ibore yenetupakini yenabu aipucet konyila, abu kopuko Leo engatuny, abunore nakiareit naka Kristo. Abu kobu. Nasodit, neejai abekot; ebuni Ngesi, naetupakini, Leo engatuny. Ayangauni eong na neejai...

Kwana, mam eong ajeni arai alosi eong ajaun kede apak atupuruc na. Alosi eong aswam nuapedori kere, aitodikin yesi ebe ejaas adokena nu toma opiramid, cut bec, Ebaibuli lokiareit loabu Edeke iwadik. Enok ewadikai ngul toma opiramid.

123 Kosodi lokiuniet, itekor duc Edeke kotoma kalokiuniet, kosodi Ngesi aiswamaun elopet Akekirot.

Kane, kwana, kiitu, kotoma opiramid...aomit eong ebe luipu kotoma kayesi isirikaale ka iboro kipou kojaas Misiri. Emameotor epiramid arapetai kokujuke. Mam ejaunar. Amoru naka Scone, ka nginibore kere yenejaatar kesi, konye eroko...

Arai ijaatar ijo inusu yenika edola oisaokon, ido idumuni ijo ebe, kakan nakoteten, ejaatar emorukaalet kede emeadera loka Amerika. Ido abala ebe, aipucet "naka United States." Kosiep kaloce kaje, ejaatar epiramid, kede amoru nakapolon naati naerapit ka akongu naka etunganan. Ebalu kowai kalo ebe, "Aipucet nakapolon." Eebo, arai erai na akwap nakapolon, inyobodo mam aipucet na nakapolon eraunor aipuceteke obe naka akwap? Einakini Edeke kes aitejen, mamace neelosete kesi.

124 Enerasi eong kede emuron apak adiopet, ajai ngesi aitoritor eong toma acukuman, nuikamunito aitangal naka Edeke. Abwoi eong korot. Ebalu ebe, "Ejakait Branham, itolitoli ijo itunga." Ebalu, "Emamei angaleu, dimarai bon kotoma omurok luka adekis."

Abu eong ebelokin, aanyun aanyuneteke kotoma omotoka, ajaatar emun ngol kotoma opir. Abu eong atema ebe, "Ekoto ijo alemar aanyunet ngin kotoma omotoka, aso, naarai aanyunetekon alopet itodiarit ebe erai Edeke Eketangalan."

Emuron obe iyuunit ngun. Eraas ngul lumam itutuoritai. Eebo, ipa. Emun kokuju kopir! Abu Musa ikeik emun kuju opir. Abala ngesi ebe, "Arai Eong Ejakait loetangali adekasiakus kere." Ido angolianarete kesi emun ngol, kanuka angaleu naka Edeke. Konye kereka kitejenete kesi aitepeg ngin; konye kereka aanyunetekec alopet itejeni aitepegit kes. Wau!

125 Kane, kakwapuwok, einer iboro luinerasi kesi, kosodete akenar iboro lu, ido ikecesirigin obe, ikecekapun, itejenete ebe aipucet naka akwap kere erai Edeke. Itei ijo, akongu ngin naebwoi kokuju kangina kuju naka ngol, kotoma onusu ngol loka edola? Ngin nges aipucet nakapolon.

Mam cut aponi kibwaikina kuju naka epiramid. Mam kes apedorete amisiikin kanukiinyo. Aponi kongeroi Amoru naerapakini, Akou, Kristo. Konye ebuni, acepaaran.

126 Kwana, kotoma aiduk, ajokis...Aiduk etogo lo, aiduk ejautene lo, itei ijo, egeuni kede amoru naka apetetai; aiyuun, ajokis, ajenun, atikokina, atitingikin, amin naka inacan. Kwana inyobo iswmamai ngin? Aso idaritos do kesi Amoru naerapakini, naerai amin, naarai erai Edeke amin. Ido eyait Ngesi, ido erai Ngesi agogong naka nginidiopet koboro kalu. Edolit ngin. Eebo, ipa.

Cut kotoma kane, cut toma ne, itei ijo ajaatar eong, kotoma akidingos, aswamisio nu kere kotoma kane, ido kane kopote aigiranakineta nu. Inyobo ngin? Emoyo Lokalaunan ebuni kwap, kotoma Kristo, itei ijo. Emoyo Lokalaunan! Ejai Emoyo Lokalaunan kuju naka lu kere, aimorikikin lu nepepe, adukun (inyo)

Ekanisa loitekooro, kanuka Amoru naerapi arapaki Ngol.

Inyobodo ajai ngin aswam bobo? Itodiario kotoma Aturio Akanykaarei nuka Ekanisa, ka ikiyakia Ikanykaarei luka Ekanisa.

127 Ageuni kokau kane. Aibo ageunor Ekanisa nasodit? Aibo ageunor Ekanisa loka Opentekosit nasodit? Kede Paul Lokalaunan, kotoma Epeso, aacerit naka Atur naka Ekanisa loka Epeso, Epeso.

Atur nakiareit naka Ekanisa arai Sumuruna. "Ajokis." Irenaeus, etunganan lokaumokin laobu iting Eijiri loka Paul.

Atur naatupakini naka Ekanisa Perugamo, loarai Martin. Martin nges arai etunganan lokaumokin laobu kosalak. Paul, Irenaeus, Martin.

Kosodi kotoma Swaitira kobuni Columba. Kiitunitos yesi? Ejai ne, inamakitai cut ngina. Columba. Akaulo naka Columba...Aturio nukamuton nuka Ekanisa kotoma kanen cut.

Kobuni do Sarudio, naerai akepolou ebe etwanit. Luther. Aleluia! Inyobodo etupakini? Inyobo etupakini akaulo naka Sarudio, Luther?

Kobuni do Piladelupia. "Ayongit Edeke." Wesley, alaunit! "Ijari ikadoliton kanuka aiyuun," abala Luther. Aitalaunio kotoma Wesley.

128 Kolomuni do amin naka einacane, kotoma Laodikia. Ido iyuunit oni Aisiraret nakapolon naka atakanun naka Eliya, kotoma aoak nakawasia, ebuni apiar akwap.

Ijai ijo ne, Aturio Akanykaarei nuka Ekanisa, adokena akanykaarei. Edeke eduki Ekekanisa, erai kwape bala itunganan idiopet alomar neejai idiopet, tomaKeng elopet. Aibuses, Apedor naka Edeke, ijensun kwap kotoma kana, aimorikikin Ngin nepepe. Kanuka ngun, itunga luka Opentekosi luibeleanarete Lutheran, ibeleanarete itunga luka Wesley ka iboro, mam kes ejenete nuejaas einer. Itei ijo, ejarito kesi kotoma osiep kalo loka eyekalu. Ngol nges eipone, epedoriatu icetunga aikeun kuju koipone kangol kosodete araraar. Konye ejai atutubet nakabeit naka ngin, inyikokinit ainakinit aduketait apolo. Ebalu Ejakait ebe, "Enyakakini."

Kiitunitos yesi Ekitoi Loka Ateran? Kiitunitos yesi alimonokin naka Ekitoi Loka Ateran? Aponi konyamarai Ngol, konye abu Ngesi kigwer ngol. Ejaatar kesi atenuun nuka ediini; abu Ngesi igwera ngun awai. Apotu kesi kitonyoutu ekanisa ece, atenu naka ediini; kigwerari Ngesi ngin awai. Konye abu etau loka Ekitoi kangol inyikok apolo. "Ido kotoma osawa lokatibong ejaun Aica." Ianyu? Apak ngin nges ebongunia Kristo, Emoyo Lokalaunan. Ijesun Yesu kwap kosodi aibokin kwape Akou naka Ekanisa do, ido itajaruuni Ngesi Ekekanisa, kwape eraar Akekuan Obe. Toma ngina nges Akuan.

Ido eipone loipudar Edeke oni kwape idiopet apolo, eipone loayangaunia Ngesi Ekekanisa toma apolor. Nginitur naka Ekanisa, eraun Ekanisa ediopet looti.

129 Ianyu?

Ikesa lu mam epudai kes araun nueraas kesi. Mam epudai lo araun naubu lo koraun. Ianyu? Konye abu ngesi kitopolou Ekekanisa kuju koipone kongopekangol. Abu Ngesi kitopolou Eke-Ekekanisa koipone kalope ejaar Ngesi aitopoloun Iketunga. Kosodi Petero atemar kane ebe, nasodit ber iboro ikanykaarei, aiyuun, ajokis, (itei ijo, kobuni kuju), ajenun, aitikokina, atitingikin, ayongit Edeke, amin naka einacane, iyatak amin naka einacane, kosodi amin naka Edeke. Emoyo Lokalaunan, Kristo kotoma otunganan loka Emoyo Lokalaunan, ebuni mamakon, kotoma aibatisao nakabeit naka Emoyo Lokalaunan, kosodi ijo adumun ajokisio nu kere ipucakinitai tomakom. Akepolou, ejari Edeke kotoma Oyekalu loenyaritai aduketait, Eyekalu lokajaran loiboio Edeke lokajaran.

130 Kejaunos etunganan kede eipone loka iboro kalu, kobuni do Emoyo Lokalaunan tomake. Mamace, ipedori ijo einer kede angajepa, ipedori ijo aituput ainakinet adio naejaatar Edeke. Ipedori ijo aswam ngun. Konye kiton nakelomariata ajokisio nu kane tomakon, iroko ijo ijai kinga naka apetetait obe, naka aiyuun. Konye nakepoloto iboro lu kotoma, kosodi ijo aiyatakin ngin neejai ngin, ekepolou irai do ijo aduketait nakajaran. Irai do ijo aput nakajaran, naelosi.

Konye, ijeni ijo, ikapirin, ekukonokinos kesi ngaren naka aput, Edeke loka aibe. Ido koipone loka aibe, loiyuunito kesi ebe ebongonokini edeke ngol loka aibe kes. Erai ngol ekapirione. Eromayone ngol. Ekukonokinos kesi ngaren naka iponesia kere nuka lukalaunak ka nginibore kere. Ido ejaatar kesi Cecelia nakalaunan, etogo loka edeke, ka nginibore kere, ka iboro luipu luegelegela koipone kangol. Ekukonokinos kesi neejaas ngul, ido abeit cut iyuunito koipone loka aibe. Eipone -eipone aitupuset, naka Edeke lokabeit.

131 Konye oni, mere kotoma oipone loka aibe, konye ikukonokin oni akonyen nuka Edeke lokajaran, aijar nakajaran, aijen nakajaran, aitikokina nakajaran, atitingikin nakajaran, ayongit Edeke nakajaran, Apedor

nakajaran naebunit kaneejai Edeke lokajaran, iswamauni etunganan lokajaran apud nakajaran kotoma ojautene loka Edeke. Inyobo ejai ngesi aswam? Iboro ngupengul lueswamat Yesu; alosit koipone loka alosio Ngesi, aswam iboro ngupengul lueswamat Ngesi. Naarai, mam erai ibore yenika aibe. Ajai abeitonut naitogongit.

Itei ijo nuapeleikinit eong? Kosenen ber ijo eipone lokitupusitotor ajokisio nu, iboro lu luedukere, kede ikiyakia luka Ekanisa, kede Aturio nuka Ekanisa? Kwana, adiopet kotoma apaarasia kanu, ilosi oni alemun nginidiopet kotoma akiro kanu, kasodete aisisia kes, kasodete aitodun ebe kitogogongit ngin. Elosete kere nepepe. Abeit cut. Ianytu? Oo, ikatunga! Eipone loeumokinar ngin, itei ijo, aanyun nuiswamai-nuiswamai ngin.

132 Kwana, ngol nges Etogo loiboio Edeke kotoma; mere aduketait naejaatar ekide looti kokujuke, ka aculuret naojan. Ianyu? "Konye itemok ijo Akuan kanuKang." Akuan naepedori Edeke aiboi kotoma, kosodi Edeke alosit kotoma, epedori Edeke asesen kotoma, epedori Edeke einer kotoma, epedori Edeke aswam kotoma. Amen! Aijar kwape ibore yenitwasama yenika Edeke, Edeke elosi kotoma akeje aarei, kotomakon. Aibuses! "Iteteni Edeke akejen nuka ikadoliton," Edeke elosi kotomakon. "Naarai iras yesi ibaluan luiwadikatai, luesiomete itunga kere." Ido arai ejai Aijar naajai toma Kristo tomakon, ijaunos ijo kede aijar naajaatar Kristo.

133 Kwape duc alimununa eong. Kilema ijo emina kama ejai ekitoi loka araito naka peach, ido korai ti ijo ajular nges, koipone loka amatakin ngol toma okitoi loka apple, ti ekitoi loka apple egeu aira araito naka peaches. Abeit cut. Ti era. Mamace eipone loejaatar atenun, ejaatar emina loka ekitoi loka apple tomake, itei ijo, arai ediokitoi kere loerai ngol. Ianyu? Elemunenei akeijar kaneejai ekitoi loka apple, kolema ngol kere kinga, kosodi ainakin a-aijulakinio naka emina, kosodi amatun kotoma akitoi loka peach kiton okitoi loka apple. Inyobo iswamaun? Mam bobo ebuni aira peaches. Ianyu? Mam, ipa. Mam cut ebuni. Arai kebu aijar naka ekitoi loka peach neejai ekitoi loka apple, atemasi, mam bobo ebuni aira apple. Ebuni aira peaches, itei ijo, itei ijo, naarai ejaatar aijar naka ngol tomake.

134 Eebo, kilem ijo oni, lumam irai idiobore dimarai araito naka okitui, aibunget, itei ijo, ido emamei ibore kotomawok, arai kitwakit oni kotoma adiakar ka aibucanareta. Ijai oni kere toma ojautene lo. Ido kwangin oni, ikulepek, ipedori aibirokin kwap, ainakin awatewok, kiton Edeke alemun epiiKe loemasi, Ekiror loka Yesu Kristo, naarai, "Emamei bobo ecekiror kokwap naka Akuj loitajarere etunganan," kosodi aijulun Aijar naka Kristo tomawok. Kwangin ijaun do oni kede eipone loka aiyuun kana, aiyuun najaatar Kristo. Ido aiyuun naka Kristo mam apesikina neajaas Iparisayon, araibo Isadukayon, arai toma amotikec, ibinikan, ka isopurian, ka eilosikec. Apesikinitai toma Akirok naka Edeke, amen, noinoi, kiton nearaar Kristo Akirok, koraun Akirok akuan. Kosodi arai kepedorio oni aijulakin kede Akepedor, ebe kitwaki oni toma aomisiowok ikulepek, kosodi aiyuuniwok araun aiyuun nakabeit, Aleluia, kosodi do Aijar naka Kristo aijulun tomawok. Iraun oni isuban lukajarak luka Edeke, aiboisit naiboio Emoyo Lokalaunan naepedoria aijukun Akerereng toma nen, kosodete oni ajaun toma ojautene loka Kristo.

135 Abala Yesu ebe, "Mam kereka iwadikatai? Apotu yesi kitoronata Eong, neabalar ebe, "Arai Eong Okoku loka Edeke.' Mam kereka iwadikatai, ebe, 'Iras yesi idekesio.' Mam kereka ekisilikus elopet ebala kwangin?" Bala kwape Musa, bala kwape Eliya, bala kwape inabin kangul loapotu kojarata kodie naka Edeke, kiton Edeke aijular AijaraKe cut tomakec. Kosodete kesi einer, mere kanukec ikulepek, konye Edeke. "Sirikiyalolongoete nuineras, naarai mam erai ijo nges inera. Erai Papa loiboie kotomakon; Nges inera," Mam Akekiro eras nuke elopet, naarai, akeijar, atwana.

136 Arai itwana ijo, kilema ijo aokot kotoma otunganan, idari nges komam ebosi. Ationisike nges ebe, luipu kotoma kakesi mam idaritai komam ebosete. Kilema ijo aokot kaneejai etunganan, adaun ngol. Akepolou ibore bon yenebeit ijo aswam nges ainyakakin eceokot tomake; elosi ngesi aijar bobo. Abu ijo kolema akeokot kinga.

Ido kwana kibwaik oni Aokot nuka Yesu Kristo toma, itei ijo, ido eyangauni ngin aiyuun naka Yesu Kristo, ajokis naka Yesu Kristo, aijen naka Yesu Kristo, aitikokina naka Yesu Kristo, atitingikin naka Yesu kristo, ayongit Edeke naka Yesu Kristo, amin naka einacane naka Yesu Kristo, amin naka Edeke, naerai Yesu Kristo. Erai Ngesi Akou ido eyait ijo. Akejekon nges apetetait, aiyuun. Amen! Akou eyait, elemuni e...?...Ikoni nen. Lo nges etunganan loitekooro loka Edeke, nakejaatar ngesi ajokisio nu.

137 Kwangin, Edeke, itupusi Ekekanisa kwape Ateran, aberu. Edeke itupusi Ekekanisa kwape Ateran. Ido eipone loeyangaunia Ngesi nginidiopet kiton araut okokuKe, kanu alosit toma Ateran ngin, ayangau da bobo Ngesi Ateran kotoma aturio kanu, [Kotirori Onac Branham abao irwan akanyaare-Ekewa.] kiton nakeyanguania Nges Ekanisa lo ediofet loileleba toma kanu.

Elosete akakejen. Kanukiinyo? Naarai ebala akakou kwangin. Kwana, mam epedori alosit bala akakan, naarai eras akakejen. Mam Luther epedori aswam iboro luapotu oni keswamata, karaida luka Methodist, naarai aras kesi icebore yenagelara. Ianyu? Elosete akeje naarai ebala akou kwangin. Ido mam cut akou etemari ebe, "Kwana, akeje, koraunos akan. Aki, koraunos akonye." Ianyu?

Konye, nginitur, ebwaik Edeke iboro lu toma okanisaKe, kosodi aituput ngin koipone loka aitodiar ebe nginidiopet yenejaatar nu, ejaatar ajokisio nu. Ido Etunganane lo, naengetakinor, erai Ekanisa loka Edeke alosit Aurupoorio. Ido etunganane lo, ido kongetakinotete, erai ebulesit loka Edeke, kotoma Okanisa loka Edeke, loelosi toma Aurupoorio. Aibuses! Itei ijo nuapeleikinit eong? Ikoni nen. Ngin nges ibore yenileleba.

138 Kobuni etunganan kane, Paul, epesikini apetetait. Irenaeus abukokin na tomake. Kobukokini loatupakini na, kobukokini loatupakini na, loatupakini ngin, ka ngin, ka ngin, ido cut kwap kiton needolokina atur nakawasia. Konye inyobo ngin? Erai Emoyo ngopengol.

Emoyo ngopengol loiboie kotomaka, nges ebala ebe, "Akan, olem akaapu ngin." Emoyo ngopengoll ebala ebe, "Akeje, ikunyas." Itei ijo nuapeleikinit eong?

Aso, ejautene kere loka etunganane kon ipugatai ido eyaitai kede iboro kalu, konye mam epedori ayaio cut kere kiton neejaunotor kede ajokisio nu kere.

139 Yesi kipupunitotor lem nu? Kwana ber eong alimok yes nu. Ido koric ejok...Kibwaik nu toma akitikon naepupi. Ianyu? Egogong erikot noi kotoma arucokinetete naenonok kakere. Edolit ngin. Mam egogong adepar arucokinet naenonok kakere.

Mamace arai edukitai nu kogogong biai, erai edukitai nu biai, arai ejaatar erucokinet naenonok, nen nges ebilar ngol. Ido mam ngol egogong adepar aiboisit ngin naenonok kakere naerucokitere. [Ejai Onac Branhan aitetemun aputoke naejai abao-Ekewa.] Kwana arai kijaatar ijo, arai ibala ijo ebe ijaatar ijo na, na, na, emamei ijo na, ido imameotor ijo ngin, ebila kanepakanen cut. Na, ido komameotor na, ebila. Na, ido komameotor na, ebila. Ianyu? Ido arai imameotor ijo...Mam ijo ipedori ajaut kede na komamei na.

Aso nakiinakina ijo etunganane kere, kwangin ebukun Emoyo Lokalaunan tomakon, kotoma ajokisio kanu, akepolou irai do ijo eyekalu lokajaran. Aso engoliarete itunga kosodete atemar, "Erai ngol etunganan loileleba ajokis, aijen, (iyuunit Akirot), aitikokina, atitingikin, ayongit Edeke, amin naka einacane, ileleba amin naka Emoyo Lokalaunan. Itei ijo, ikoni ngesi nen, elosi irimirim." Inyobo ngin? Ejautene loesenesete lumam iyuunito kosodete atemar ebe, "Ekristayot ngol. Ekiliokit ngol, arai aberu, naejani nuinera. Mam ijo ianyunitor etunganan kwape kangol loesiana, kojijim, koyongite Edeke. Ipuccikinitai ijo.

140 Etakani aipucet kowaitin kere. Arai ijai ijo alosit arai abunore, iseseni ijo aipucet kwape kwangin. Ikoni nen. Ianyu? Nakejaunotor ekiliokit arai aberu kede nu, kwangin kobuni do Amoru naipucakini kwap kosodi aipucakin kes toma Akabakanut naka Edeke, loerai Emoyo Lokalaunan.

Kosodi do Akirot, naebuni Kane, aitodiar kotoma nginidiopet kotoma otunga kalu, itei ijo, kosodi aitarauon lo Etunganane loileleba loka Eyekalu loka Edeke lokajaran, aanyunet naelosi, nakajaran naka Ekristayone. Nuarai Kristo, eraas itunga lu, naarai ejai Akeijar toma ne. Ejaas kesi toma Kristo. Ido atwana aijarakec ido ibwaa kotoma Kristo Yesu, kama ejai Edeke, ido ipucakinitai toma ngina kede Emoyo Lokalaunan. Ikorinton Lusodit 12. Edolit ngin. Ianyu? Imarakini ijo akonukuan kwape natwan, aso kiurunitai do ijo kotoma aiyuun. Kwangin kiyatakinete do iboro luce lu nekon kiton nakitekoror ijo, aput nakajaran naka Edeke.

141 Biai ngin mam eumokina? [Kotemari atukos ebe, Amen."-Ekewa.]

Kosodi do Edeke, kotoma ngun, ayangau Aturio Akanykaarei nuka Ekanisa, kanu aitodun adokena akanykaarei nuabu Ngesi koyangau, eduki Iketunganan toma aputoKe. Aduk Ngesi Ekanisa loileleba kotoma aputoKe. Ido kotoma ajarun, ejaruni Akuan na naileleba kanu ajar kede Nges ikar kere, naarai erai Ateran. Ianyu? Aso erai ngin naenatarit nginitur kere, nginitur naabu kobu.

Ido ejaas nuipu nuipudai, kiitu. Kiitu nuabala Paul kalailo kotoma Oburanean 11? Kinyek eong asiomak yes icebore eroko oni egolokina kane, ipak edit. Kosodi do ijo..Esubit bala einakini ijo apupun eipone loitegelikina neasiomuna eong...duc, neasiomunia eong na. Alosi eong alemun Iburanean 11, ido alosi eong ageun okokoro lo 32.

*Kener anyoikabobo? Naarai mam apak kelosikino arai kalimok nuka Gideon, ka Barak, Samuson, ka Yeputa, ka Daudi, ka Samuel, ka inabin da:*

*Lukipikorete ajakanuto kanuka aiyuun, kiswamata adolit, kodumutu aisumuneta, kitubutaasi aituke nuka ingatunyo,*

Kitojonata apedor naka akim, kokuata akwanis naka ekileng, kisipedoroi nakekalanyakatar, korautu lukagogong kotoma ojje, kitekerata ajoresio nuka lukacekwapin.

*Apotu angor kodumutu lukatwakikec kotoma aitajarunio, konye ice aponi kisiriebai kaibworit, komam ecamunete ayuunio, tetere edumunete aitajarunio naejok adepar.*

Ageun kokwap kotoma kane. Ianyu? [Ijulirai Onac Branham aputoke nainomakitai abao-Ekewa.] Eebo.

*Aponi ice kitemoi kaisekelio ka aleio, eebo, kiton aeneta ka aidaris da.*

*Aponi kibiribiroi kamor, kotuboi kimusumenon, kitemoi, aponi koarai kekileng; apotu kirimirimoto enapito imukulen luka amerekekin ka akinei; apotu kilwaritos, kereitai, kikonakinai erono;*

(Itunga lumam akwap ebusakinit:)...

Itei ijo, kotoma angetakinet kanen, ianyuni ijo kotoma Obaibulikon.

*...apotu kilokidaete kamodingo, ka arongan, ka abuai ka apanya da nuka akwap.*

*...itunga ngul kere da nakedaunere aitejenun kanuka aiyuunikec,...*

Kanel! [Ijulirai Onac Branham aputuke nainimakitai abao-Ekewa.]

*...aitejenun kanuka aiyuunikec, mam apotu kodumutu aisumunet: (Ianyu?)*

*Naarai abu Edeke kojenikinite ibore yenejok aitelekarit kanuwok, tetere ngul mam itodolikinio komam oni.*

142 Imisiikitos yesi ngin? Itunga lu luapotu kotwakata, kotoma kane, egongakina ido idareunits oni. Aso, ejai Ekanisa lo adolokin toma aitegoro, kanu ayangaun ajarun. Ido ejaas ngul kwap, imoyon kokwap naka em, kidareunits Ekanisa lo adolokin toma aitegoro, tetere Kristo ebuni.

Ido Ekanisa lo, itei ijo, ebuni edit, kotoma kalu ikidioko. [Kijulirai Onac Branham aputuke naka abao-Ekewa.] Ekwana kere adepar nen, konye kwape bala aiwadik emusalaba ngol ngina, itei ijo. Abu ikeun kiton aiboisit amaewit. Kiton Ekanisa kotoma kalu ikidioko, adolokin toma aiboisit kiton nakeraar eipone ngopengol loka aijaanakin napotu lu kojalakis, naarai, neebongunia Amoru na nakokuju...

Ejataar ibore yenesubit bala eisao kane, neelosi ngesi aiboikin toma cut kane, kokuju opiramid. Mam erai arapetai arapetai tai nges iboie kokuju. Erai ayuara, ejai ngin aiboikin kaju ngina, naarai igalionori akipi.

Ido nakebunio, ejai Ekanisa awitario.

Nu kere, amoru nuce kere kotoma opiramid, eperete cut ejok noi kiton neemam ijo ipedoria aitoria emieso kidingikec, alangir naka ilukumin luka ikilos, eperete kotoma kangina. Eipone loetodolotor kesi ngun kaju, mam kes ejenete. Konye edukitai aiduk.

Ido kokuju kane, nakebunio Arapetai naka epiamid, epiamid Elopel, ejaun Akaun naka Kristo awitario. Mere ecetal arai aisisianakin, arai icebore ibunit oni kotoma. Ejaun araut cut bec bala Kristo, kiton ebe, nakebunio Ngesi, Nges kede ejaanakin ngin eupakinos bec cut aimakakin nepepe. Ianyu? Kwangin kobuni do Aurupooro, alosit Ore.

143 Koany ber ijo nekijaria oni kwana, kotoma Laodikia nearaar ekanisa atur naka ekanisa naronon kakere naejaunar. Kotoma Obaibuli, idumuni oni ebe, arai atur ngin nges atur naka ekanisa najaar Edeke kinga naka ekanisa ikungukungi, kotamite abongun neejai aduketaitiKe obe. Italesio ka idiinin apotu kogolosi Nges kinga naka ekansiaKe obe. "Koany abwoi okek ekungukungi. Arai ejakit itunganan akure kosodi kongaa ekek, alomuni toma, amori kanges." Ianyu? Ikoni nen, kotoma atur kana naka ekanisa. Apotu kocakasi Nges kinga motimot, kiton kane apotu kongetakisi cut acakar Nges kinga. Mam kesi ekotosi idiobore yenikamunit Ngin.

Kwana itei ijo lolo neijai oni alosit. Karaida kwape araunor angetakinet naka Atur naka Ekanisa loka Laodikia napaa noi, kiton ebe nges kede Etulikane, loabu iweliwel nges, ejaas aimorikikin ido ejaas aimorikikin kwape ekanisa lokapolon. Kede aimorumoran naka ikanisan, eputosi kwape Etulikane.

144 Ejai atiaketrat adiopetebon, arai mam kes epedorete adolokin toma ngin, nges aibil emugaati. Ibore ngin bon kotoma aicokis, yen-yen-yenitobwounit Etulikane ka eswamae loka protestant kotoma aimorikikin, nges ainapetai naka aibil emugaati. Ebal ekanisa loka Atulik ebe, "Erai akuan." Ido ebal ekanisa loka Protestant ebe, "Ebwoikinit akuan." Ekanisa loka Atulik iswamauni emass loka ngol. Emass nges, ebe, ebilete kesi emugaati, komunosi ebe itimio. Ebalas luka Protestant ebe, "Itimitai isio." Ebal Atulik ebe, "Imuno isio aitimio." Emass ka aibil emugaati. Enyarito kesi ngol ebe Emass; inyarit oni aibil emugaati. Emass erai amun ebe erai kwangin. Aibil emugaati erai aijen ebe erai kwangin, ka aisialamikin Nges kanuka ngin. Ianyu? Ido ngin nges ibore idiopet bon yenimam kes epedoriat imorikikin nepepe. Epote kesi aswam ngin.

145 Oo, esubit nala ibus noi. Ebuni aimorikikin, kanu aiya...Ebuni-ebuni aiya kere...Eebo, abala Ebaibuli, "Koinak etiang apedorikec neejai naadote," itei ijo, emorikikinos nepepe. Ianyu? Cut bec nuabala Ebaibuli ebe apote kesi aswam, ejaas kesi aswam ngin kwana. Ejai cut elosi ngaren, osabiiti lopelo. Mere ebe ajaatar eong ibore asurwokinit itunga luka Atulik, mam karaida itunga luka Protestant.

Yesi luka Methodist ka Baptist, ka luipu kotoma kayesi luka Opentekosit, nealosioto ikanisanakus toma aimorumorun naka ikanisan, neadukokiniata kesi etogo loidarere lukatwak toma New York, loka amorumorun kangin naka ikanisan, eputosi kwape kotoma United States ka iboro. Etamitos kesi aimorikikin eswamae kere loka luka Protestant nepepe.

Kwana, ecoak luka Atulik kaneejai ngin, ido elosete ayangaun Ipaapa lo loka akaisaarei ka luuni, arai akaisaarei ka luaarei, loerai ngesi kere. Etamit ngesi, kotoma oipone lokwap, lokaiyapaara, ayangaun aiyuun naka ikatepegak ka aiyuun naka Atulik toma aiyuun adiopet, cut bec nuabala Ebaibuli ebe apote kesi aswam. Ikoni nen. Ido ejaas luka Protestant aibirokin toma, eliket, eusi ka eimwony.

Inyobo? Inyobo? Naarai emameotor kesi iboro lu. Aijen, "Edolit Akirot." Aitikokina, "Ngul luidareunete Ejakait." Itei ijo nuapeleikinit eong?

146 Kwape abalar ekaanyanaran lo Methodist kapak kaya, neapotu kesi kitutubotor ngin. Idiotunganan kere ejeni ngun, eipone ali, inyobo esinyikokini ngun, aitam adumun aceilipa nailipio kotoma okanisa, arai kotoma osomero. Kosodete aidareun ai...aomit eong bala arai eitabo loka ailip loka Presbyterian, arai icebore, kosodete auriak aosan e-e-esomero naarai mam kes apedorete acamun ailip na ailipio kotoma osomero. Ido arai ekaanyanaran lo loka Methosit ekesa lokacoa, abu konyou aibwo kosodi atemar, "Ediakara ngin." Ebalala, "Emamei kotoma okisila." Abu nges ikam ekwam loka ngol. Abu ngesi kotema ebe, "Bala kotoma okanisakosi loka Methodist," ebalala, "kotoma okanisakosi loka Methodist," ebalala, "luipu kotoma otungakosi duc inerasi nuka ationis naka Hollywood, ido akaisakanykaongon ka lukany kotoma ngunukwatat kotoma kakesi elosenenete aite kwape kwangin."

Inyobo ationis? Apotu kojalakisi nu awai. Nges ngin cut bec. Apotu kojalakisi ngun awai.

147 Enera eong cut kanepokane agoola kana, kapak kaya, kede e-e-eswaman loka ediopet okanisan lukapolok luka Methodist kangina kotoma Oibuga loka Falls, ediopet kotoma okanisa luimoyoikitos noi luka Methodist luejaas toma Oibuga loka Falls. Kitodu, atur naka Methodist naelomuni toma kosieo naka aturikosi kangina, Pentekosit. Kosodi ngesi atemar, "Kotoma St Louis, Missouri, aponi kitolotoi aingic, nepetai ilapio iuni arai iwongon kau, kosodete adumun." Epedori etunganan ngol iboie kane atupuruc na. Eebo, erai ngesi ekadukon loeduki ne, ejai aitemonokin aduketait kanuwok. Emethodist loka Orot Lokapolon (Main Street), nges ejai ngesi, nearaar Onac Lum kede kes ekecokon. Aso do idumuni oni ebe, kotoma ngun, naeyuunit eong ebe arai akaisakanykaarei ka icebore kotoma ngulikwatat luka itunga luka Methodist amasete esigala, ido akaisakanykape ka lukanykauni kotoma kangulukwatat luka ngul amasete ajon. Etunganan loka Methodist! Ido ibore yenetegelikin arai, neainakinere aingic, arai nuemaritai kotoma okiliok ka angor; angor arai akaisakanykaarei, akaisakanykaarei ka icebore kangunukwatat, kanuka nepetai akaisakany kangunukwatat luka ikilikok. Emasete angor nuipu esigala ka ajon adepar ikiliok. Akaisakanykaarei kangunukwatat, akaisakanykaarei ka icebore kangunukwatat, angor nuipu adeparit ikiliok.

148 Dobodo kijesar oni kwap toma Aisianakin naka Ebaibuli naka ainap luuriesik, ka aitub itim, ka iboro kwape kangul, itei ijo, aibo neejai ayongit Edeke, angor nuelimorito ayongit Edeke ka alaunit? Ipucinio luka akaadin ka nginibore kere, akadedeok, akalelebak, komam epedorito aidar angajepakec. Angajepakec obe kinerasi ka aidedeo, ido kolosete arimorit. Dobodo ikiliok? Ipucinio luka akaadin, aboliasio nuka golf, kokinga kangina konapitos atutubet bon, konapitos inapen luarokok, kede angor ngun iboiete kokinga kangina. Komam abunonokin!

Itei ijo ainapetai ngin nakaronon naaponi iriu ekalimonokinan ngol, ekalimonokin lojeera, atupuruc na? Eebo, ipa. Mam eong eyuunit ebe ikamunitos etunganan ngol akiro ngun. Inyobo abu ngin iswamau? Erai ngol Onac...Aomit eong nuikamunitos nu...[Ebalala icetunganan ebe, "Dan Gilbert."-Ekewa.] Eebo. Dan Gilbert ekalimonokinan loka ojeera. Neakerunia etunganan ngol toma kosodi aiyar Dan, kane ilapio idis kau, ido kwana akeberu ebeit adumun ikoku. Kati, adau Dan atwanare, ido mam kes epedorete aiyatakin aokot akuan ngin kwana. Ebalala aberu ngin ebe abu Dan kobu asiol nges, ido nges ngin... "Ikokuke Dan ngin." Eipone ngol loka...mam eong eyuunit ngun kwape mam eong eyuunit ebe-e-ebe ejaatar etoori ajul nuka ejibat. Mam, ipa. Eyuunit eong ebe erai aingal. Eyuunit eong ebe arai Gilbert etunganan loka Edeke. Ido aomit eong ebe arai ngin ainapetai naka ajokit.

149 Bala kwape ibore ngin atamit aibwaikin nuikamunitos ailipasia ngul. Ekaanyanaran lomojong loka Methodist-Methodist arai lokacoa noi kanu angicun ngun. Korai ti ngesi, korai ti ngin kitorite toma, arai bon ngin naesinyikokit icebore. Edolit ngin.

Kwape bala ationis na naka atiaikit itunga kalaije kotoma Angalakimak, ibore ngipengin. Eyuunit eong ebe ekoto itunga ilajaara. Eyuunit eong ebe ebwoi akwap na kanuka ailajaara. Mam eong etoronit Ejakait Kennedy kanu ajukar ajoresio laiije. Karaida, mam eong arai e-e "ekegangitonike," mam eong arai loka Democrat. Mam eong arai loka Republican. Arai Ekristayot. Aso arai eong...Konye mam eong eyuunit ngun. Mam eong acamunit ebe ibusakinit itunga luriokok agwelar akecepedor naka aurio neejaas iboro kwape kangul, da. Arai e-arai erionget loka Republican. Apotu aokot nuka Abraham Lincoln koosikisi itunga ngul naarai arai ngesi etunganan loayongit Edeke. Aomit eong ebe ibusakinit kes asalakinit

oriongetecec arai elosete kesi aisek cut.

Konye alimokini eong yesi ibore idiopet, mam esapat ngol ajai kwap toma ngina naarai ebe, ekecesomero ngol. Erai esapat ngol etunganan loka akwap kana. Erai ngesi loka Amerika. Erai alajaara kanuka itunga kere. Eriagi loka etunganan mam ekoto ijulak akeitegelikinet. Oni kere... abala "Edeke." "nuka etunganan ediopet, nges abu kosub aokot kere, akwapin kere." Irai oni kere ipe.

150 Konye, etelepat ngol, arai ngesi esirikaalet. Arai ngesi loeyengunit. Ajio ngesi kanuka nuedolito. Ajaatar ngesi apedor naka alosit osomero. Edolit ngin. Konye ajaatar ngesi isomeroi luepu luutikelot ngesi.

Ngin nges erai ibore. Arai kibongo ijo kauke, erai ibore yenika ediini loka lolo kokuju kangina, nges isinyikokit ngun inyobo? Ejaas kesi aijer abootin ngun nuka irionok anyoun ko Republican kiton Democrat, ido ejaas kesi agwelar akecepedor naka aurio kanuka ngin. Abeit cut bec. Mam Emoyo Lokalaunan ejai ne...

"Ngin yenejai acoa." "Ngin yenejai aijen." Becebec. Bala kwape ekanisa kalo, atur na naka lolo, agwelar akekuan. Ijo mam iseseni nuelosete aiswamaun?

Mam eong apodo arai ikamio nu ateepe. Ebuni kane. Uh-huh. Eebo. Inyobo ationis? Atapit totoka namojongit alimunun ebe, "Koinak ajokit nuebeito nges."

Ajai etunganan ediopet bon luabu kiswama ibore yenikacoa, ngol nges Castro kokwap kalaije. Eebo, ipa. Abu ngesi kolot kwap laije. Ido ajaatar lukabarak ebela kere ka nginibore yen...eraai adoketai naka esabu, kwape United States. Inyobo tikiswama ngesi? Abu ngol kolek idulai ngul. Kolekuni isirigin koipone edio kere loapedoria. Inyobodo abu ngesi iswama? Abu ngesi ituput isirigin, kosodi aijulakin. Inyakakini kes. Ngin bon nges ibore yenepedori akwap na aswam.

151 Yesi apotu kopuputu Ausi naka Aijar atupuruc kaya? Inyobo, ijene ijo, eputos bala ijo agwelar inerio kotoma osabu. Adaun ayangar inerio. Ido apugan na kwana itwasamai isirigin kanuka inyo? Naarai isirigin luka esolo luepote kesi aituk kanuka ikar akaisaongon ageun kwana. Adaun ngin. Erai ngin Ausi naka Aijar cut kokinga naka Washington, DC, anatar akwap na kere. Isolosinei luitwasamaete kesi, ido kotamitos agwel luka akwapin nuka okinga. Eebo, ejaas bon kesi akoranar ngul ejaas aceda. Mam yesi isesenete? Ngun cut becebec kes elosete kesi-kes elosete kesi aswam. Ianyu? Inyobo ngin? Kwana, arai ebwanger akwap na, Ibore bon yenepedori ngin aswam nges abwanger. Ibore idiopet bon yenepedori ngin aswam nges aicanakin.

Ngin bon nges ibore yenacoa yenebeit aswam, aijulakin isirigin. Konye mam kesi epote aswam ngun, kokwap naka aijaanakinio. Ekanisa loka Iromayon loka Atulik nges eyait esabu loka akwap. Ido ibore yenepote kesi aswam nges agwelar, "Ikabarak lu," kaiceda. "luka akwap," kwape abalar Ebaibuli. Inyobo epote kesi aswam, eroko kes etwaniara? Erionget loka esigala loka Brown ka Williamson, luipu kotomake kere eraas Itulikan, ejaas aceda. Ka iboro luce lu kere, inyobo epote kesi aswam? Epote kesi acamun ngun, ido epote kesi aijaun isirigin ko Rome, kosodi do ngesi agwelar akepedor naka aurio. Igangit Rome nges. Eebo, ipa abuni aigang. Ido ejaas kesi adumun ekisil loilosikina kwana, adumun luilosikina kamakec, aitolomun toma atukosike nakapolon. Kosesen nuejai Ejakait Kennedy ailipit.

152 Ido nakianyuniata yesi na, apak kaya, emamei bobo eipud loka aisek. Inyobodo ajokis naka aseoo? Kibwaikinitete toma apapula, kosodete aitogogong ngin akonyen nuka itunga, kosodete kesi ainger aswam idiobore yenikamunit ngin. Kitogogongitete ebe aponi olokai acuman anatar akwap kere, ebe apotu kesi oseku Ejakait Kennedy kede abootin nuka aingal. Mam kereka Ebaibuli ebala ebe abuni nges alomun toma kanuka aingal? Abeit cut, aingal. Kwana, mam eong esurwokinit erionget loka Democrat karaida erionget loka Republican, konye ajai bon eong aitetemunun abeitonut kotoma Obaibuli. Inyobodo ajokis naka aseoo? Ejenete kesi ingaibo elosi tom angina.

153 Imwaasi bo ai kotoma kayesi kiitunitos aputosia kotelevision neajaatar angor aarei ebwoete? Kosodi adiopet atemar, "Alosi eong asekun Ejakait..." Arai, aberu naka Protestant abala ebe, "Alosi eong asekun Ejakait Kennedy."

Ebalas ebe "Kanukiinyo?"

Ebala, "Naarai aomit eong ebe ecobe ngesi adepar Ejakait Nixon. Epedori ngesi araun engarenon lokajokan."

Kosodi ngol atemar, "Erai na aberu naka Atulukit. 'ingaibo ilosii ijo asekun?'"

Ebala ebe, "Arai eong Atulukit, Atulukit naka Rome, narimarit Atulik." Abu ngin kotema ebe, "Alosi eong asekun Ejakait Nixon."

"Inyobo?"

Ebala, "Naarai, aomit eong ebe eraun Ejakait Nixon engarenon lokajokan naarai enaikit ngesi iboro



noi. Enaikit ngesi noi Communism." Abu aberu ngin kiner aingal.

154 Ajaatar eong e...loenyaritai ebe Abeitonut Naka Aiyuuniwok (The Facts Of Our Faith), eitabo loikiara kakere loka Atulik loepedorio agwel. Ido ebala kotoma kangina ebe, "Arai ejai Etulikit toma apupula loebwoit aitepeg Protestant; arai ecaakaki Etulikit etunganan loka Protestant, irengeario nges kotoma aimor naka ekanisa loka Atulik." Cut. "Ido arai ejaas Itulikan iarei lueboloboloete kanuka eyapeesi ediopet, esekunete kesi Etulikit loeinakina noi neejai 'ekanisa loka ore' kosodete acakakin ngol."

Itei ijo eipone, aingal ngin, nuejaas kesi atamit aswam? Akorar isirigin awai, kanu agwelia. Inyobo? Etamitos kesi aibil ngin. Ido iswamaete kesi ngin, kosodete ngin aibil. Ido inyobo ngin? Ejai toma adoketai naka esabu. Ido Ekanisa loka Atulit, adokena nuka epolou, kes itingitos esabu loka akwap. [Kotemari icetunganan ebe, "Ibilonin loka dolas akwatat ka akaisakanykape ka lukanykauni. Ikoni nen.

155 Ocaka ijo nges kau toma adoketai naka esabu, ido yesi itunga idaritos ireria bon ka iboro, konye iraa yesi luka ekanisa loka Atulik. Akwap na erai naka ekanisa loka Atulik. Akiro kere eraas nuikamaritai toma koipone kangol, kotoma osiriginikec. Mam kereka Ebaibuli inera nuka ngun? Ngin nges aput nainomakit Ebaibuli oni.

Nuajai eong atammit alimun, onac, lolo. Epote kesi atemar ebe, "Ebuni ngin aitarau ngol ekanisa lokajokan. Ebuni aimorikikin ikatepegak." Esubit bala ejok kaneejai akongu naka akuan, konye acoa naka akwap kana erai abanganut kama ejai Edeke.

"Ido abu kisialamik Edeke, kotoma abanganut naka alimonokin, aitajar ngul luaolioritos." Kotoma oyapeesi loka Edeke, loabu Ngesi ititingik neejai Ekekanisa, adukokin Ekanisa toma ajokisio nu nukomoyo ido mere toma obore ice yeneputorit akwap.

156 Abala Petero ebe, "Ido naarai ikuata amudiaro naka akwap kotoma aingobel naka isirigin, ka aingobel naka apak nakajokan, ka atelelio, ka ainyam, ka aimat, ka aingobel nakijaar oni. Ikuata yesi ngun. Ido kwana kidukokinitai yesi toma aijar. Ajai eong aiwadikaikin ngun neejai Ekanisa," abala ngesi. Ikoni nen. Ijo isiomit ngin? Abu ijo komisiik ngin? Ijo abu kopup ngin nakisiomia ngin kokau kane kotoma Petero lokiareit? Kopupok ber ijo nuebala ngesi kane, kwape kibusiar eipeone loiwadikaterere toma ne, eipone loiwadikator ngesi-ngesi ngin. Eebo. Kopupok nges kwana kwape kinerar. Eebo.

*Simon Petero ebulesit ka ekiyakia da loka Yesu Kristo, mama ejaas ngul luadumutu aiyuun naketiai loepol naeriakasi kanakosi kotoma adolit naka Edekewok, Eketejaran da Yesu Kristo:*

*...iyatanakin asianut ka ainapakin mamakus toma ajenun Edeke ka Ejakaitiwok Yesu Kristo.*

*Kwape ejaar apedor naka edekeoneke nabu koinak oni akiro kere...*

Ingaibo elosi airum akwap ka iboro kere? [Kotemari icetunganan ebe, "Lukalaunak."-Ekewa.] Abeit cut. "Erai nakec..." Eebo. Ejok.

*...nuka aijar naka nuka ayongit Edeke, kanuka ajenun ngol lokinyarauni oni kanuka aibusesuke ka ajokisike elopet:*

*Nukiinakinia oni aisumunetake nuepolok nuketiai loepol: tetere kotoma kangun iraunete ikamorak einono loka Edeke, nuiopotu kokuiata anyoun kotoma amudiaro (Kopupok ngin.) naejai toma akwapin kanuka aingobel.*

157 Aingobel naka isirigin, aingobel naka iboro lukapolok, aingobel naka ajenara, atwakata iboro lu neejai ekeyuunan. Mam oni ipodo. Ewema arai etogo, inyobo ebeitore eong aiyalolongo; aijar arai atwanare, alumor arai akipi anyamar? Yen Nges ibore Yenakoto eong, Akabakanut naka Edeke. Arai edari eong oreka, arai edari eong ekaleka, arai edari eong idiobore, kinyek eong edar Kristo, amunowok naka Aibuses.

Kodukunai eong, Wu Ejakait toma Kanu. Koraun Kristo Akouka, ngun iswamaete kotomaka. Kotoma apetetaitiika, akaiyuun naejai tomaKon, koinak ajokis, ajenun, aitikokina, atitingikin, ayongit Edeke, ka amin naka einacane, iswamata kotomaka, Wu Ejakait, nges ailipaka. Mam eong apodo; aijar arai atwanare, alumor arai akipi anyamar; ediini arai emamei ediini; epapero arai emamei epapero. Koinak ngun iswamata kotomaka, koinak ajokis naka Kristo, Akeijen, koleleata, tetere eong apedori aisisianakin ngun.

158 "Naarai ebwaik Edeke toma Okanisa, ikiyakia, inabin, ikesisianakinak, ikecokok, ka alimonokinak, kere kanuka aisitekoro ka ayangaun ajokisio nu kere tomake, kanuka aisitekoro kangin naka abunore naka Okoku loka Edeke." Nginiopet kotoma amor kanu eraas iboro ludukes loelomunito kaneejai Adiopet ngin. Eraas lu iboro ludukes luka Na. nginiopet kotoma ajokisio kanu eraas nukotomaKe, ido ejaas abukunun kinga kotomaKe, kwap kotomakec. Amen.

Erai isawan ikanykape. Elosi kere ai? Amen. Yesi iminas Nges? [Kotemari atukos ebe, "Amen."-Ekewa.] Ijo iyuunit ngin? ["Amen."] Kopupok, ikoku yenididi.

Abala Inac kidd, atupuruc na ebe, "Onac Bill, mam eong ajeni arai adolokini eong aanyun ijo bobo." Akoto ngin aiyar eong. Ianyu? Eomit ngesi ebe ejai amojong, ido ejai ngesi amojong. Abu eong elip Edeke aideun nges ka Onac Kidd apak naepol.

Ber eong alimok yes mam oni ijeni aojau nailosi oni ajaun kede idiopet kayenice. Mam eong ajeni aojau anyoin alosi eong ajaun kayesi. Epedpori Edeke anyarar eong kotoma akwap. Epedori anyarar eong oisawe ace loka aijaanakin. Epedori Ngesi anyarar ijo nenice. Mam oni ijeni. Konye, a-adumutu. Mam icamakini nu atubor kamawok. Ayangasi ngun.

Akoni nen, kotoma Obaibuli. Ikoni nen, eputosi kede nginibore kere. Korai bon eong ajaatar apak naka aswam ngun! Mam ijo ipedori aswam ngun kotoma apak adiopet. Ijenete yesi ngun. Konye, epedori aimorikikin akirot kere nepepe!

159 Itei ijo, erai abeit. Mam icamakini ngin aisi kamakon. Kosalakisi toma ngin, idwe. Kosalakisi toma ngin. Kiitu, kodukok toma aiyuunikon, ajokis, aijen, aitikokina!

Kwana, kane, aomit eong ajaatar eong atutubet naka apapula kane, arai mam eong acakakit ngin nenice neajaar eong alimonokin. Ejai ne. Eyalama, onac. Eyalama, noi. Arai ikoto ijo a-asesen tomake, kosodi aanyun arai ejai icebore ne tetere ijo aticepak ipedori...Aticepak erai aput naejok adepar ngin kangina, tetere yesi ipedorete alemun ice kotoma kalu. Abuni eong akajakin ngin kuju ne, ido ipedori ijo abeit cut asesin ngin kosodi-kosodi aituput.

160 Ido akoto eong ijo ayangar ngin kosodi aisisia ngin, kosodi aitirian ngin, kosodi aswam ngun. Mam isisiai aisisia bon, itirian ngin, kosodi aswam nuejaas tomake nakisisia ijo. Koyanga kede etau kere tomakon. Mam itemari ebe, "Eebo, enumunumit eong aipup ngin." Eong, da. Konye aipup ngin, ka aijaun ngin, itegegelikina. Ianyu? Ianyu? Itegelikina. Ianyu?

Ejaas iboro ikanykaarei luiswamaunete ejautene loka Edeke. Ejaas Aturio Akanykaarei nuka Ekanisa, ebe ayangau Edeke Ekanisa neejas iboro lu. Ido ajaunos Ngesi kede ikiyakia ikanykaarei kanu aswam ngun. Ejaas ikanykaarei, ikanykaarei, ikanykaarei. Ianyu? Ikanykaarei nges-nges enaaba loka Edeke loka angetakin, ido iuni nges enaaba loka Edeke loka aitekoro. Aso, ejaas iuni, ka ikanykaarei ka akanykaaren auni. Aso, kotoma oimare, komoyo, kanuka Akirot, kanuka ajenanut naka Emoyo Lokalaunan, ngin kere angetaki ibore nepepe. Esisiata ngin.

161 Eyatakisi toma aiyuuniwok iboro lu, kosodi, ebe tetere oni idolokini toma ojutene loileleba loka Kristo; kimorikitete nepepe kede amin naka Edeke, ayongit Edeke, aiyapaara kotoma otauonowok neejai idiopet kayenice, ayonganara naidul neejai idiopet kayenice, einacane ka amin naka ainacan, mam einer nuaronok, komamei idiobore dimarai aipioror naka Emoyo Lokalaunan ejari. Ianyu? Aijar nepepe, korai Ikristayot. Kolot kede aiyuun. Kolele ajokis naka Edeke kotomakon; kinyek aijen naka Edeke, nakebunio aitiak nuedolit ka nukaronok. Nakeyangunia ajokit icebore yenimam bec erai Naiwadikaere, konyou awai kamake. Edolit ngin.

162 Enomarit eong ikiyakia ngul mam eswamaete kwape kaoni. Erimoritos kesi, aticepak itunga luka akiro adis, kiton nakelomariata olutaari. Alomunete kesi toma kosodete aswam nuebeit kes aswam, kosodete alomar kinga. Eebo, ipa. Ajaatar kesi kede apedor. Ajaatar ngesi ajokis. Mam kes apegasi kede itunga. Ajenete kesi neabwoata. Odaun. Ajenete kesi loeyuunitos. Enyikokinitos alosit kotoma Omoyo. Kiswamaete bon...

Kwape kalimunitor eong akuar kaya. Acamakinet adiopet bon, ngun bon nges abeit Edeke aswam, akepolou emamei ibore yenelosi aitobwoun kes. Mam kes engitanakinos ka aingic, ka angurian, ka aiyalongongo kwape kiswama oni, arai ibusakinit kes aswam nu arai kwa. Alosite kesi ngaren kosodete aswam ngin, kwape kwangin. Acamakinet adio bon kaneejai Edeke, adaunit ngin, katipet noi. Inyobo? Eipone ali apedoriata kesi ajenun ebe arai acamakinet kama ejai Edeke? Ajaatar kesi ajokisio nu kere kotoma kangina, kere nuibusakinito nu. Ido acamakinet adio naka Edeke etirianio kede nginitutubet naka nu, ka kede Akirot. Ajenete kesi ebe arai Akirot naka Edeke, ido kolosete kesi. Mam kes eyalongongoete kanuka idiobore kere. Nakenerar Edeke, alosite kesi.

163 Inera oni...

Inerasi Edeke kede kaoni, ido ilimuni oni ebe, "Eebo, ibuni isio ageun. Ibuni aanyun arai ipedori aijar Aijar na." Ibore yenisodit yenijeni ijo, itukuriani ijo icetunganan. Eebo, abeit cut, ajokit ngin.

Ebusakinit ti yesi koanyunitos nges etamit aitukurwor eong kama ejai airiamun na atupuruc na. Ebusakinit ti ijo ajaun kede apak ngin adiopet. Oo, aitim! Ejai eong ejie nginipak nealimorio eong airiamun. Ido arai alosi eong ailipakin yenadekan, ka itunganan yenejai atwanare ido komam itajarunia, ejaun anyarareta akaisauni kosimu alomun kotoma adagikan atomon, arai epedorete adumun ngin atipet kanu

aitukurwor eong kama ejai ngin. "Oo, Onac Branham, ekoto ijo aswam nu." Konye ejai etau loejai oreret. Abeit cut. Eebo.

164 Akuar kaya, aponi amyaraar eong aiboisit. Etelepat, abu eong enerakinos kede nges kalailo kotoma kaneinyaritos yesi supermarket, ikar idis kau. Abu ngesi koraun amatan ajon. Abu eong ajeni etelepat, esapat lokajokan, konye arai ngesi ekediakanaran. Ido kwangin abu totoke inom esimu. Aomit eong abu ngesi inomak Emuron irwanaarei. Eong...Ainomun, kosodete kesi ainomakin Billy, kosodi-kosodi awasiake abu eong adum aisiraret. Ido neadumunia eong aisiraret, abeit cut, mam eong adumunitor ejie loepol kwangin kotoma aijaraka, kanu adolokin neejai esapat ngol.

Ido neadolio eong ngina, adolokit ekesa lokican lo adoketait namam ajenia eong. Ekoni ngesi nen, eperi kanen, eiloro, ido kinyikokinite alosit ngaren. Kotamite papake awowa nges, ido kobala ebe, "Lominat." Ido erai etunganan loka ikar akaisakany, nepetai ikar akaisakany ka ludiopet lukapolou. Ido kobala ebe, "Lominat," na, kosodi "inapakin." Ido atamit ngesi anyoun. Akekanin irimunitos airimunet ngin nati. Ajaatar esapat engoti loopol noi kiton neemam nges araar idiobore dimarai alunguret naka engoti. Iboro kere luka akuanake ajaatar engoti. Karaida akekot araas engoti, nginibore kere. Ido ekoni ngesi nen, etamit anyoun kuju, ido kinyikokinite koipone kangol.

165 Abu ekeu nges kede akan, abu eong atema, "Woodrow, Woodrow, Onac Branham nges lo."

Abu papake kotema ebe, "Mam ijo ijeni? Onac Bill lo. Woodrow, Onac Bill lo."

Abu ngesi kotema ebe, "Uh. Huh. Uh-uh-uh." Koipone kangol.

Kosodi papake angoliar kosodi atemar, "Billy, iyapit ijo abunore mot."

Abu eong atema ebe, "Mam duc iyapit. Ejai Ngesi ne." Abu eong ajaunos kede ejie.

Kosodete luce isap, icesap bobo, ikadiakanarak, abwoiete kangina, ice kotoma opajanake. Abu eong atema, "Isesenete yesi, isap, okapanakinos, naarai ipote yesi adolokin adoketait na. Ejai ijo adolokin adoketait na cut kane. Ianyu? Aticepak mere kede engoti lo. Aticepak ibuni ijo adolokin kede icebore yenegelara, kokinga kangina korot, koyii kiton atwanare, arai icebore. Ejai ijo adolokin toma." Apotu isio alototo nekec.

Edarit eong aanyun nuabala Emoyo aswam. Edareunit. Ibore yenisodit ijeni ijo, abu eong apup acamakinet ngin. "Idokok akaninikon mamake."

Abu eong arimo, kasodi atemar, "Yesi kere itulurwoto akwesikus kwap." Apotu kesi kere kitulurwoto akwesikec kwap, ikesa iarei arai iuni kotoma kangina.

Abu eong edokok akakanin mamake. Abu eong atema, "Ejakait Edeke, kojaunos esapat kede aijen naka ajenun nuebeit nges aswam, eroko nges kiriamuna kede ibore ngin. Ejai ngesi atwanare. Erai na ajokit nges einakinit nges aridakina, ido ejai ngesi alosit. Ido amat ngesi kiton atwanare, ido ejai ngesi ne kotoma ojautene kalo. Elipit eong ebe iraun Ijo lokaitim mamake." Ido nakelipakina eong nges, atupuruc natupakini eboie ngesi, inerasi kede papake.

166 Busty Rogers, ingai...Aponi keworor eong kwap lailo adekis, pac. Ajai eong kinga ngina apak ngin, akaulo naka eong alimonokin kokwap kalaije ko Milltown neetangalaunere Georgie Carter. Yesi kere kiitunito ngin. Ido kangina neabu Onac Smith, ekalimonokinan loka Methodist, kotemara, "Arai ibatisatere idiotunganan Kokiror loka Ejakait Yesu Kristo, konyou koloma kinga kotoma owema," koipone kangol. Kokuju kalaije ko Totten Ford, ebwaikinit airiamun ngin kokuju kangina. Ido, oo, abu kitoron eong kanuka nginibore yenipedoru ijo aomoom nuke. Mam eong abu alim akirot; abu enyikok ngaren. Ajaatar eong ayakian. Abu Ejakait ketodik eong aitapoet. Ajai imerekek kwap ngina, ikamakina nenice kotoma amodingot. Yesi kere kiitunitos aitapoet, yesi kere. Aomit eong iitunitos yes. Yesi kiitunitos ngin? [Kotemari atukos ebe, "Amen."-Ekewa.] Abeit cut. Ejok. Ido ajai eong alosit kotoma amodingot kangina, amejai nges.

167 Abu eong alot Totten Ford. Ejeni Onac Wright kangina. Apotu iso alototo ngina, mam eong ajeni nuabeit aswam. Abu eong agwel abokis naka asabunyu, kanuka enusu ediopet. Abeit eong alosit kinga ngina, aibwo kangina kasodi alimonokin kokuju amadala. Abu ngesi kotema ebe ajai ngesi alosit kuju, kuju naka erongat, aswam acegwelamar. Abu eong alot kede nges. Ajai ekanisa lootu lomojong loka Methodist esipo kokuju kangina, koorori. Abu Ejakait kalimok eong, "Kobwou kanen."

Abu eong atema ebe, "Kinyek eong cut kane, Onac Wright." Abu eong abwou. Abu ngesi kolot ngaren kuju kosodi abongun.

Abu eong alot ngina, ido mam eong apedoru angaar ekek. Abu eong atema, "Ejakait, erai ijai ijo toma kanu, arai ikoto Ijo eong alomar toma okanisa, ongaik eong ekek." Abu eong eboikin kwap ngina ido ajai aomoom.

Abu apup icetunganan ebunit; abu anyou. Kosodi ngesi atemar, "Biai bo ijo? Alimokini eong ijo," ebalala, "Ikoto ijo alomar toma okanisa?"

Eong ebe, "Eebo, ipa."

Ebala, "Kijaara eong elacet ne."

Ageuni eong airiamun. Esabiiti losodit amamei ibore idio. Akuar nasodit, kijaar eong esipan, Onac Wright kede ekaleke. Ibore yenisodit yenijeni ijo, kangeset naka esabiiti, mam apedorete atitingikin kes alaaro, ationo. Konye aroko imerekek ngin kebuno. Abu Onac Hall kitajaruun apakio ngun, ecokon kangina kwana, ngul kere. Mam eong apedori ajenun neajai imerekek yen. Akaulo naka apak naedit, kinga naka loka church Of Christ, kwap naka erongat, ipese ngin yenika ikar ikanykaongon ka ilapio ikanykauni mam eiiritor alosit, eperi kangina. Ajai ngesi nen. Yesi kere ijenete akiro ngun.

168 Eebo, ipa.

Ido kiding paaran neabu Busty Rpogers, ekeyengunan aswam looti loelangir ebwoi kangina...abu eong aloma kinga ngina. Ido kobwoi esipan loka Onac Smith akenar eong, aboliar eong, kanu aibatis Kokiror loka Yesu. Abu eong aloma toma akipi numodok nuka Totten Ford, neajaatar kesi e...[Aiboisit naemamei ibore katepu-Ekewa.]...kuju naka aleles naka akipi kangina, ido kogatasi noi kagogong kwape kapedoriata kere. Apotu idikoonin iarei kolomasi king keong.

Abu eong atema ebe, "Abwoi eong kane akidingot naka apaaran kana abwoikin Naiwadikaere naka Nakalaunan Edeke." Abu eong atema ebe, "Asiomi eong kotoma Obaibuli kane neabu Petero kotemara ebe, 'Kitoronokinos, nginidioipet kayesi, kibatisaunos Kokiror loka Yesu Kristo kanuka aisionio naka adikanaretakus.'" Abu eong ebelokin, ekopakini Eitabo neejai edikon edioipet.

Abu kaloma kinga, kasodi atemar, "Idiotunganan yenekoto, yenitoronokina adikanaretake, ejaatar apedor abunore." Alomari eong kinga ngina toma akipi. Abu eong atema, "Esubit do kaneka bala iboiete Imalaikan kotoma nginutenut kwana, kosesenete."

169 Oo, ikatunga! Nepetai apak naebatisa eong nepetai itunga iarei arai iuni, esipanake kere, angor ngun nuanapitos inapen luebusiak luka esilik, ibirununos akipi ngun, kiluluete kokuju naka iporotoikec. Abu eong ebatis ekesipan kere Kokiror loka Yesu Kristo. Ijenete yesi ngun. Kijaar eong aputoke. Ikoni nen.

Inyobo arai ngin? Aiyatakin toma ajokisikon. Ianyu? Kinyekik ngun. Ejeni Edeke eipone loka aswam ngin. Ejeni Edeke eipone loka itodolikin iboro lu. Kinerata kesi nuekotosi. Mam iswamauni adiotegelikinet. Kinyikok alosit ngaren.

Kojai Busty Rogers ngina, neabu ngesi koanyunia ngun, abu kotema ebe, "Eyuunit do eong ngin kede ekatau kere." Kosodi ngesi abunore toma akipi, konapite inapeneke luelaete, kosodete aibatis nges Kokiror loka Yesu Kristo.

170 Nepetai ikar iuni arai iwongon kau, aponi kanyarar eong ngina adekis ko New Albany. Ejai ngesi ngina, ejai atwanare, kede engoti, abu konyama nges. Apotu imurok koinakisi nges kiton tupuruc, kanuka aijar. Ebala, "Ejai ngesi atwanare kwana." Ebala, "Kobua katipet."

Abu eong alot toma agoola, nealomaria eong, aibwo kangina kasodi ailip. Abu ngesi kotema, "Billy, ejai etaluka elukunit esooda ngol kangina."

Kasodi eong aibelokin, aanyun. Abu eong atema, "Busty, erai aitutuket. Mam ijo ilosi atwanare. "Kitajar ijo aitutuket naka Aokot."

Abu eong edokok akakanin mamake, eong ebe, "Ejakait Edeke, eipone loajaar aitapoet ngin kangina erai naitogogongit ebe ijai Ijo ne. Aitutuketekon erai ebe, na, "Ikonimacarin kitangaleunete isio." Edokokini eong akanin neejai ngesi, ido abu ngesi kongaleu. Kijukarete nges ore.

171 Ido nepetai ikar iwongon arai ikany, nepetai ikar iwongon, aloki agaria kaju ka kwap kocilet ka nginibore kere, olosi ngaren. Ido neajaar engoti toma amooteka nuka akoik, agwarigwarit ngun, ajai alunguret naati nagogong. Imurok, ipiriotin luka adekis, apotu kolimokis nges ebe ejaatar kesi amukian naka cobalt naapedori ti arior ngin, ainakin inyammat luipu alosit kwap kotoma abeinikin. Ajaatar ngesi kede ationis ainyam inyammat luipu, arai nges ainyam mot. Abu ngesi kolot ngina kanu ainakin ngin aswamao. Mam eong ajeni ebe ajai ngesi ngina.

Aso kejengi nges, aponi kodumunai ebe abu ngin kitolomik nges toma oremone, abu nges odum eteregege. Abu kitwatana ekesiep koipone kangol. Ibore bon yenapedori ngesi aswam nges aimony mot. Kosodi ngesi alemun ekalaamu koipone kangol, kosodi aimony, "uh, uh, uh." Kosodi aitam aiwadik, komarani koipone kangol, kede akekan nangalei. Esiepike loka okediany, enomit eteregege. Kosodi ngesi aiwadik, akekan: "Itajari Yesu, 1900 ka icebore." Mam kes apedorete amisiikin ngun.

Aso kwana neabu akeberu kotemaria ebe, "Onac Branham, mam eong ajeni nuepeleikinit ngesi kede ngun."

Abu eong atema ebe, "Amucalat Rogers, nuepeleikinit ngesi, arai okaru 1900 ka icebore, nges etajarere nges kosodete aibatis Kokiror loka Yesu 'Ekiror kokwap kangina. Ngin nges ejai aimeda kwana. Mam nges ekuriana atwanare."

Abu eong atema ebe, "Ejakait Edeke, ideu akeijar. Elipi eong ngin Kokiror loka Yesu, ebe ideuni Ijo akeijar." Edokokini nges akanin. Abu eteregege kojalak nges. Abu eremone kobwou. Kosodi ngesi anyoun kotoma ojamu. Ido ebwoi ngesi kwana, einakini ajenanut.

172 Iyataka aiyuunikon, ajokis; iyatak ajokisikon, aijen; toma aijenekon, aitikokina; toma aitikokinakon, atitingikin; toma atitingikininikon, ayongit Edeke; toma ayongitikon Edeke, amin naka einacane; toma aminakon naka einacane, Emoyo Lokalaunan, ido ebuni do Kristo. Naarai, cut kokwapuKe...Emoyo Lokalaunan nges Emoyo loka Kristo kotoma Okanisa, kanu aitodiar ajokisio ngun. Oo, ikatunga!

Kwana kane, idakikan itomon ka lukany akaulo naka isawan ikanykape.

Amina eong...amina eong Nges

Naarai abu Ngesi ageu amin eong,

Kokau cut kalailo, eroko ijo erauna idiobore.

Kosodi aita...(Inyobo abu Ngesi iswama?)...akaitajario

Kokitoi loka Okalvari.

Eipone ali araar eong lo? Naarai abu Ngesi kageu amin eong.

Amina eong Nges, amina eong Nges

Naarai abu Ngesi kageu amin eong..(Ngin nges alibunet.)

Kosodi aitac akaitajario

Kokitoi loka Okalvari.

173 Esumunikini eong, atupuruc na, neejai Ngesi, kede akatau kere, ebe, kede angarakinio kede asianutuKe, elipi eong ebe abuni eong aimo nginipaaran, komam apalari, kiton neapupunio eong nginidiopet kotoma oboro kalu luipudai eleleete kotoma ajautene loka lo lomojong, kiton naepedoria araun aitodiaret naka Kristo lokajaran. Naarai abu Ngesi koraun adiakar kwape keong, tetere eong araun...adolit naka Edeke, kwape ka Ngesi. "Abu Ngesi koyanga aibositika; Ejakait, koinakinai eong ayanga Loke kwana." Naarai ngin nges alosikinet naketwania Ngesi. Imwaas bo aii isumunikinete ibore ngipengin, kanuka asianut naka Edeke? [Kotemari atukos ebe, "Amen."-Ekewa.] Kede akwesiwok ituluritete kwana, kede akaniniwok kuju. "Eong..."

Esumunikini eong ngin, Ejakait, isumunikit ekanisa lo ngin, "Aileleba naka ejautene loka Yesu Kristo!"

Naarai abu Ngesi kageu amin eong

Kosodi aitac akaitajario

Kokitoi loka Okalvari.

Simon Petero ebulesit ka ekiyakia da loka Yesu Kristo, mama ejaas ngul luadumutu aiyuun naketiai loepol naeriakasi kanakosi kotoma adolit naka Edekewok, Eketejarian da Yesu Kristo:

...iyatanakin asianut ka ainapakin mamakus toma ajenun Edeke ka Ejakaitiwok Yesu Kristo.

Kwape ejaar apedor naka edekeoneke nabu koinak oni akiro kere...



[www.messagehub.info](http://www.messagehub.info)

Nuelimonokinit

**William Marrion Branham**

"... toma apaarasia nuka eporoto..." Apuk. 10:7